

萬 有 文 庫

第 二 集 七 百 種

王 雲 五 主 編

五 代 會 要

(下)

王 溥 撰

商 務 印 書 館 發 行

五代會要

(下)

王溥撰

國學基本叢書

編主五雲王
庫文有萬
種百七集二第

五 代 會 要
冊 二

中華民國二十六年三月初版

撰 者 王 溥

發 行人 王 雲 五
上海河南路

印 刷 所 商 務 印 書 館
上海河南路

發 行 所 商 務 印 書 館
上海及各埠

嚴

◆ E六三一

雙

(本書校對者 秦泉聲 徐培生 余大猷)

五代會要卷十五

考功

後唐天成元年十月三日。尚書考功條奏格例如後。一准考課令。諸司外文武官九品已上。每年當司長官考其屬官。應考者皆具錄一年功過行能。議其優劣。定九等考第。京官九月三十日已前校定。外官去京一千五百里內。八月三十日已前校定。三千里內。七月三十日已前校定。五千里內。五月三十日已前校定。七千里內。三月三十日已前校定。萬里內。正月三十日已前校定。本州定訖。京官十一月一日送簿。外官朝集使送簿。限十月二十五日已前到京。考復功過。並入來年。無長官。次官考。縣令已下及關鎮庶官。嶽瀆令。並州考。津非隸監者。亦州考。一准考課令。諸每年考簿集日。考司校勘訖。別爲簿。具言功過。京官三品已上。及同中書門下三品并平章事。奏裁。親王及五大都督府亦同。四品已下及餘外官。並使人量定聞奏單數。仍備狀進中考。並單名錄奏。一准考課令。諸每年尚書省諸司。得州牧刺史縣令。政有殊功異行。及祥瑞災蝗。戶口賦役增減。當界豐儉。盜賊多少。並錄送考司。一准考課令。諸官人治迹功過。應附考者。皆准實錄。其前任有犯私罪。斷在今任者。同見任法。卽改任。應計前任日。爲考者功過。並附其狀。不得過兩紙。州縣長官。須言戶口田地者。不得過三紙。註考正之最。一最已上有四善。爲上上。一最已上

有三善。或無最而有四善。爲上中。一最已上有二善。或無最而有三善。爲上下。一最已上有一善。或無最而有二善。爲中上。一最已上。或無最而有一善。爲中中。職事粗理。善最不聞。爲中下。愛憎任情。處斷乖理。爲下上。背公向私。職事廢闕。爲下中。居官諂詐。及貪濁有狀之類。爲下下。若於善最之外。別有可嘉。及罪雖成殿。而情狀可矜。或雖不成殿。而情狀可責者。省校之日。皆聽考官臨時詳定。一准考課令。諸官人因加戶口。及勤課田農。并緣口功進考者。於後事若不實。縱經恩赦。皆從追改。一准式。校京官考限來年正月內。外官考限二月內者。所司至三月內。申奏了畢。伏以書校內外官考課。逐年申送考簿。各有程期。近年已來。諸道州府。及在京諸司。所送考解。多是稽遲。自今後所申考簿。如違格限二十日不到。其本判官并錄事參軍。伏請各罰一百直。本典句官。請委本道科責。如違一月日已上。不申到本判官。伏請罰二百直。錄事參軍。量殿一選。本直句官。請委本道重加懲斷。在京諸司。如違格限不關牒到者。其本司人吏牒報御史臺。請行追勘。一准格。應所闕縣令。計日成四考。餘官計日成三考。闕。今後州縣官等。並許終三十箇月成三考。自上官後至年終。但滿一百八十日。便與頭考。次二年。卽須兩考。滿足。如頭考滿足。第二考全足。卽許計日成末考。方與三十箇月。事理合同。如過月限。無替人到。准上條處分者。伏以每年書校官員考課格限。則顯有舊條。授上則難爲定制。但以每月之內。皆有除移。今准格。且以六月內上爲準。一應申校內外六品已下。赴選官員考課准格。自上任後。但滿一百八十日。便與成頭考。年終非書考時。須至

來年准格書校時。併申兩考。如六月已前。直至正月到任者。自上任日至校考時。頭考日足。卽考後功過。並入來年。如至書校時。頭考欠日。未成資考。亦至來年准格書校時。併申兩考。如六月已後。至年終上者。並至准格日收計。一考有剩日。不在重使之限。一應經考後。合收次年。以一周歲爲限。如未滿一年。停替者。但及三百四十日與成。如欠日。不在收計之限。一應收末考。但經考後去任時。得及二百日與成。如欠日。不在收計之限。如過月限無替人。並准上條處分。一應申校內外赴選官員考課頭。須具經考已後課績。不得重疊計功。其末考。須具得替年月日。比類升降。一應申校內外六品已下官員考第。以去京地里遠近。逐年書校。申送考解。各有程期。今後應內外赴選官員考第。旣准格依限。逐年比校。卽不合更將州府及本司考牒爲據。其有已前罷任官員。不計年限。考第未經省校者。如有州府及本司考詞考牒全備者。欲據在任年月日檢勘。省司結與牒知。如在任之時。州府及本司向來元不曾書校給牒。祇以解由歷子內批出考數者。欲與檢勘。解由歷子內。不豎過犯。稱在任日。並無公事遺闕。證驗分明。亦據在官年月日。結與牒知。如檢勘無憑者。不在給牒之限。其今年各准格赴集選人。便合請給省校考牒。直至南曹受納告敕已前。並許經所司投狀檢勘。出給其考牒。又准格須奏下當年內出給。如隔年者。不在行使之限。如或實有事故。次年內請給。自今後當年奏下勅考。許至來年內請給。如更違格限。請一年與殿一選。如至三年外不請給者。所司不在出給之限。其已前校奏下內外赴選官員考課。其間有未曾請給考牒者。

並合投狀請給。以備選曹磨勘。如將來選人。今在考第。依前固違格條。不經省司勘校給牒。及已曾奏校下勅考。不請給考牒者。南曹不在檢勘判成之限。一應申投內外官員考課文解。須依格限到省。如申發後。其間或有非時事故停任。所司無以得知。請委本判官并錄事參軍。專切提舉事。由申省。以憑點校錄奏。一准故事校考舊條。內外官員並校考之時。諸道差朝集使應考。內卽差中書舍人給事中監考。伏自校勘不行。往例盡廢。自今後省校之時。伏請中書門下。選差清望官兩員。監校內外官員考課。便同點校申奏。其合經申中書門下兩省准例。各供宣黃。清守舊規。以爲永制。一應申校內外官寮考課。如有過犯。便降書下考。如在任之日。於常課之外。別有異績可稱。比之上下考。如諸道州府及在京諸司。固違格例。不具錄在任事績功過。依限比較。申牒到省。其本判官并錄事參軍。及在京諸司。並請准前殿罰。一應諸司諸流外職掌人等。准令本司量其行能功過。立四等考第。而勉進之。今伏請准新定格內條件內。逐年依限投狀。各具在職功過。書校考第。檢勘錄奏。一應諸司令史及勒留官丁憂。不計有官無官。並一百日後。舉追。如願終喪。不在舉限。除丁憂年一考不附奏。次年便許計選數赴集。其丁憂人仍牒報功及南曹。終喪者計三年憂。一諸色選人。使上考減選。其下考並合殿選。并注令錄銓曹勘驗。祇憑考功報檢。多有差錯。今請每年考功申校上考及下考勅下後。請具單名牒門下省。及申三銓關報南曹。以憑勘會。並須九月已前報畢。從之。

清泰二年五月尙書考功奏奉去年五月勅中外官員宰臣節度使已下並逐年書考僅千餘員當司人吏貧乏乞依三銓例當司歸司官逐月支賜紙筆糧錢勅考功司人吏依三銓例給與糧錢春冬衣賜諸司不得援例從之

周廣順二年十二月二十八日勅節文其省校考牒如是奏下後滿三年不請給考牒者宜令考功准先降勅文不在出給之限

三年三月十四日勅節文起今後諸州府更有功中考簿限格限申到者本判官并錄事參軍各罰五十直其錄事參軍仍殿一選本句典押官典委本州各行科斷如違程限一月已上不申到者仍令尙書考功催促候供申到考帳依例施行所有科罰准前處分若是校考過時即與次年依格奏校又勅州縣官或特勅除授或非時事故停任員闕除官到任者緣赴任不拘期限申發考帳之時但滿一周年便與依例書校一考申省如書校時少欠月日即與欲年附帳申校不得漏落考第姓名如或有違罪本道書考官吏

顯德五年閏七月尙書考功奏奉新勅起今年正月一日後授官並以三周年爲限閏月不在其內者當司所書校內外六品已下赴選官員考第今後以一周年校成一考如欠日不計限滿三周年校成三考如考滿後未有替人在任更一周年與成第四考欠日不在計限兼逐年月日自上已來課績功過第二

考須具經考後課績。不在重疊計功。其末考須是具得替年月日。比類升降。自今年正月一日已前授官到任者。准格例三十箇月。書校三考。今年正月一日後來授官到任者。准新勅三周年爲月限。每一周年。書校一考。閏月不在其內。所有諸道州府校考。申發考帳。及當司校奏。各依前後格勅施行。應諸司諸色。流外出身人等。准格並須待附甲下。然後與申考。近年不經奏考。便至參選。頗啓倖門。應在司見役人等。自今後逐年起六月一日後。正身於所司投狀。請申校勞考。省司據狀。卻牒本司勘會。補奏年月日勅甲頭姓名。見主掌案分公事。牒報省司。將元狀檢勘同。卽與准例申校。仍自此後須逐年九月已前。校奏了畢。不在更與隔年併書之限。其考牒本無紙書寫勅例。今後每年奏下。逐人給省牒一紙。使大張紙書。及併年都給。限據省校勘勅下考牒。方許計考。如書校之日。有公事在外差出。卽本司雜事。須具在職功過。及出外事。申牒報考功。不得有妨逐年考校。如不與申牒。其雜事。令史量情科決。仍殿一選。如無故自不經省投狀。請奏校。不在論訴之限者。當司緣勅促期限。慮恐校考遲違。今後應合校考人。請起自五月一日投狀。限十日畢。至七月三十日已前校奏。餘依元格施行。從之。

兵部

後唐同光二年五月二十五日。尙書兵部奏。重制置收補千牛進馬事。如後。一進馬。准舊例八員。殿中省進馬四員。大僕寺進馬四員。千牛一十二。左仗六員。右仗六員。准格取十三。已上收補。十五已上出伏。各

守三五月限。一准六與千牛備身。及太子千牛。皆取三品已上諸司官四品清官子孫。儀容端正。武藝可稱者補充。今請使二品三品四品清官蔭補。左右僕射。太子少師少傅少保。御史大夫。六行尚書。左右常侍。門下侍郎。中書侍郎。太子賓客。太常卿。宗正卿。左右丞。諸行侍郎。祕書監。國子祭酒。節度統軍。上將軍。金吾大將軍已上。並許補子爲太子千牛。請使東官三品四品清官蔭補。詹事庶子。請使北省二品南省一品正官蔭補。侍中。中書令。太師。太保。太尉。司徒。司空。太子太師。太子太傅。太子太保已上。並許補孫。一見任兵部尚書侍郎。並不得收補子孫。凡請使蔭一官。祇許補一員。不得重疊。更使舊蔭。應請使皇蔭。一品不得過二十年。二品三品四品不得過十年。如過年限。所司不在收補。若是身有殘疾。不在收補之限。一准舊例。每入閣。皆須赴仗。祇候。如三度不到。便除落名姓。一應所請補千牛進馬。先具蔭序品第。於都省投狀。候都發狀到。當司卽引過本行尚書侍郎郎中員外郎點檢年貌。及勘會蔭序。引問習試合格。方得收補。呈引過堂。候過堂了。始可申奏。餘請准格施行。從之。

職方

後唐天成三年閏八月勅。諸道州府。每於閏年合送圖經地圖。今後權罷。長興三年五月二十三日。尚書吏部侍郎王權奏。伏見諸道州府。每遇閏年。准例送尚書省職方地圖者。

頃因多事之後。諸道州府。舊本雖存。其間郡邑。或遷館。遞曾改。添增鎮戍。剏造城池。竊恐尙以舊規。錄爲正本。未專詳勘。必有差殊。伏請頒下諸州。其所送職方地圖。各令按目下郡縣鎮戍城池水陸道路。或經新舊移易者。並須載之於圖。其有山嶺溪湖。步騎舟楫。各得便於登涉者。亦須備載。奉勅宜令諸道州府。據所管州縣。先各進圖經一本。並須點勘文字。無令差悞。所有裝寫工價。並以州縣雜罰錢充。不得配率人戶。其間或有古今事迹。地里山川。土地所宜。風俗所尙。皆須備載。不得漏略。限至年終進納。其畫圖候紙到。圖經別勅處分。

戶部

後唐天成三年閏八月。廢戶部蠲紙。四年五月。尙書戶部狀申。伏緣當司蠲符。近奉勅令。有事功可著者。卽戶部奏聞。又不開逐年及第進士及諸科舉人事例。今據前進士趙彖乞蠲符者。奉勅。凡登科第。皆免征徭。如或雷同。慮傷風化。兼緣近有勅命。不合更乞蠲符。所宜特示明規。務在勸人爲學。除新勅前已給蠲符外。應禮部貢院每年諸道及第人等。宜令逐道審驗。春關冬集。不得一例差徭。其及第人。亦不得虛影占戶名。

長興二年九月二日勅。凡置營田。比召浮客。若取編戶。實案常規。如有係稅之人。宜令却還本縣。應三京諸道營田。祇耕佃無主荒田。及召浮客。此後若敢違越。其官吏及投名稅戶。當行重斷。

三年五月二十九日。尚書戶部奏當司所管天下合貢方物。於長興三年三月。定到七十餘州。舊例。冬至後齊到。正仗前點檢。至元日殿前排列。當司引進。昨點檢今年正仗前。內六十七州至。其餘二十州。自正月至三月。方到京師。其江陵府所貢胎白魚。勘問本道進奏官狀。稱每年臘月。浥道。至正仗未堪供進。其餘州府。未曾嚴加告諭。請行勅命約束。如來年正仗前。貢物不齊。其本州官典。量定殿罰。又棗州合進蘿蘆子。本州稱無本色。折進價錢絹一疋。任土作貢。豈合折錢。其絹價停。勅江陵府胎白魚。許於限內仗進。餘依奏。

應順元年正月。勅諸州府籍沒田宅。並屬戶部。除賜功臣外。禁請射。

晉天福四年閏七月。尚書戶部奏。李自倫義居六世。准勅旌表門閭。當司元無令式。祇先有登州義門王仲昭。六代同居。其旌表有廳事步欄。前列屏樹。烏頭正門。闊一丈二尺。一柱相去一丈。柱端安瓦桶。漆黑號烏頭。築雙闕一丈柱。烏頭之南三丈七尺。夾街十有五步。槐柳成列。今舉此爲例。又不載令文。敕王仲昭正廳烏頭門等事。既非故實。恐紊彝章。宜從令式。祇表門閭。於李自倫所居之前。量地之宜。高其外門。安綽楔。門外左右各建一臺。高一丈二尺。廣狹方正。稱臺之形。塼以白泥。四隅染赤。行列樹植。隨其事。力同籍課役。一准令文。

周廣順二年正月。勅應諸處戶部營田人戶。租稅課利。除京兆府莊宅務。贍軍國權監人戶。兩京行從莊

外其餘並割屬州縣所徵租稅課利官中祇管戶部營田舊徵課額其戶部營田職員一切停廢一應有客戶元佃係省莊田桑土舍宇便令充爲永業自立戶名仍具元佃桑土舍宇牛具動用實數經縣陳狀縣司給與憑由仍放戶下三年差遣若不願立戶名許召主卸佃不得有失元額租課其車牛動用屋舍樹木亦各宣賜官中更不管係一諸處營田戶部院及係賜人戶所納租牛課利其牛每頭具上率納苗課逐年都納秋夏斛斗二萬一千餘石更納錢鞵布稈草等其租牛緣官中係帳不管死損歲月既深轉益貧困所徵牛租起今年後並與除放所有見在牛犢並賜本戶官中永不收係一諸州鎮郭下及草市見管屬省店宅水磴委本處常切管勾其徵納課利不得虧失若有人收買具見直價例申省仍仰本戶承認元本稅錢如是元本稅錢重大卽減價出賣如無稅錢亦仰量事出稅管認輸納其空閑倒塌店宅及空地亦准此指揮所有貨賣宅舍仍先問見居人若不買次問四鄰不買方許衆人收買其元隨宅舍諸般物色亦仰隨本業貨賣其兩京城內及草市屋宅店舍不在此例宜令諸道州府准此其年九月勅京兆府耀州莊宅三白渠使所管莊宅宜並屬州縣其本務職貢節級一切停廢除見管水磴及州縣鎮郭下店宅外應有係官桑土屋宇園林車牛動用並賜見佃人充本業如已有莊田自來被本務或形勢影占令出課利者並勒見佃人爲主依例納租條理未盡委三司區分仍差尙書刑部員外郎曹匪躬專往點檢割屬州縣

度支

周顯德五年閏七月。度支奏當司漕運水陸行程制。陸行馬日七十里。步及驢五十里。車三十里。水行。泝流舟之重者。泝河日三十里。江四十里。餘水五十里。空舟泝河日四十里。江五十里。餘水六十里。沿流之舟。輕重同制。河日一百五十里。江一百里。餘水七十里。其三峽砥柱之類。不拘此限。若遇風水淺不得行者。聽折半功。河南河北河東關內等四道諸州。運租庸雜物等。腳每駄一百斤。一百里。一百文。山陂處一百二十文。車載一千斤。九百文。從黃河及潞河。自幽州運至平州。每十斤泝流十六文。沿流六文。餘水泝流十五文。沿流五文。從豐荊等州至揚州四文。其山阪險難驢少處。每駄不得過一百五十文。平易處不下八十文。有八員處。兩人分一駄。其運向播黔等及涉海。各在本處量定。

延資庫使

梁開平三年九月。以門下侍郎平章事薛貽矩兼延資庫使。至乾化二年五月。以門下侍郎平章事于兢兼延資庫使。

五代會要卷十六

刑部

後唐長興二年八月勅。御史臺每月支錢三百千。充曹司人力紙筆糧課。具大理寺元支二十千。刑部一向未曾支給。宜於兩班罰錢。及三京諸道贓罰錢內。每月支錢一百千。賜大理寺刑部兩司。其刑部官吏不多。兼使紙筆校少。宜於所賜錢內。三分支與一分。其月二十九日。勅刑部大理寺。宜各置法直官兩人。仍召曉法令者充。

四年四月。勅刑部大理寺。御史臺奏三司官每推斷案牘時。特與免朝。恐滯推覆。法官推覆時。不得私行人事。公事畢日。朝參如常。

晉天福三年三月。詳定院奏前守晉州洪洞縣主簿盧粲進策。伏以刑獄至重。朝廷所難。尚書省分職六司。天下謂之會府。諸道決獄。若關人命。卽刑部不合不知。欲請諸州府。凡斷大辟罪人訖。逐季具有無申報刑部。仍具錄案款事節。并本判官馬步都虞候司法參軍法直官馬步司判官名銜申聞。或有案內情曲不圓。刑部請行覆勘。從之。

司門

梁開平三年十月勅。過所先是司門郎中員外郎出給。今寇盜未平。恐漏姦詐。宜令宰臣趙光逢專判。凡出給過所。先具狀經中書點檢判下。卽本司郎中據狀出給。

晉天福三年六月勅。應管關令丞等。宜准唐天成四年四月勅。本司不得差補。祇委關鎮使鈐轄。今日已前差補者。宜令盡時勒停訖奏聞。

漢乾祐元年七月六日勅。左司員外郎盧振奏。請應有經過關津州府諸色人等。並須於司門請給公驗。令所在辨認。方可放過。宜依所陳。頒示天下。仍令司門。准向來舊規。合施行事件。子細條舉奏聞。

禮部

後唐天成三年十一月二十一日。尙書禮部員外郎和凝奏。臣當司管補奏齋郎。今重起請如後。一應諸補齋郎等舊例。當司祇憑都省發到狀。便給補牒。旋團甲申奏。伏緣當司已前久無正官。多是諸司權判。或有投狀多時。並不團奏。或有纔投文狀。卽先團奏。遂積聚人數不少。自同光二年二月後。至今年十月已前。共計一百一十人。未曾團奏。今臣點檢。除有礙格條一官併補兩人三人。并使祖蔭者落下外。猶有一百七十餘人。人數既多。虛謬不少。若取年深者團奏。終成滯積。今欲限一月內。並須正身將已前所受補牒。到當司磨勘後。委是正身。及是嫡子。年顏人材。不繆者。團甲引過中書門下。引驗後。一齊申奏。一合使蔭官。請自今後。若遇改官。須是轉品。卽許更補一人。明言是長子次子。仍須不得過三人。其所補齋郎。

五品已上蔭太廟齋郎。六品蔭郊社齋郎。仍須是嫡子。以姪繼院者。卽初補時狀內言某無子。今以姪某繼院爲子使蔭。一應補齋郎等。祇憑都省發狀。便給補牒。請自今後。須得正身齋狀。到當司比試呈驗。除三省官外。並引驗告敕。及取保任官狀。委是親子。卽給補牒。每年旋於八月上旬。具狀解送赴南曹。仍團奏時。別具子細三代鄉貫。使官蔭狀。齋赴中書門下引驗。候無差繆。卽得團甲申奏。仍每年祇限團甲奏一年一甲三十人。以爲常式。一按六典所補齋郎。並試兩小經。取粗通文義者充。奏補之後。非久爲官。若不達經書。則難通吏理。請自今後。齋郎所投文字狀。並須親書。仍須念得十卷書者。卽得補奏。一使父皇任官蔭者。並須將前任告敕呈驗。仍取在朝三員清資官充保。及移牒所曾任官臺省寺監。勘有此官。及年月日同否。委無虛繆。卽得補奏。仍准千牛進馬例。不得過十年。其所使祖皇任官蔭者。年月深遠。難知子細。今後請不許補奏。從之。

長興二年十月勅。應千牛進馬齋郎。遇有員缺。據資蔭合得先受與收補。後受官者。據月日次第施行。如或徇私公然越次。本人及官吏當行責罰。仍令御史臺常加察訪。

廣順元年八月。吏部南曹先爲去年冬集選人年滿。室長季浦張宗義。爲奏補不依年限。駁放後。便值兵火。失墜補牒優牒。申中書門下取裁。欲判依選人失墜文書例。出給公憑。奉勅。宜令所司各出給失墜文書公憑。候參選日磨勘。理本官選限外。仍各殿兩選。應乾祐元年已來。及自今如有齋郎奏補後。年限滿

合定冬集及改補室長時有違格條不依年限者違一年殿兩選違二年殿三選二年已上不在施行之限。

祠部

後唐長興二年七月勅天下州府應有載祀典神祠破損者仰給公使錢添修

周顯德二年五月六日勅兩京諸州府每年造僧帳兩本一本申奏一本申祠部逐年四月十五日後勒諸縣取索管界寺院僧尼數目申州司攢帳委錄事參軍本判官點檢至五月終已前文帳到京如出限不到及漏略僧尼寺舍申奏鹵莽其本判官及錄事參軍州縣官典並等第科斷今後僧尼籍帳內無名者並勒還俗如有身死還俗逃亡者旋申報逐處州縣次年帳內開脫其餘巡禮行腳出入一切取便其諸州供到僧帳見存寺院二千六百九十四所廢寺院凡三萬三十六見在僧四萬二千四百四十四尼一萬八千七百五十六至五年七月勅今後僧帳每三年一造其程限准元勅施行

三年十一月詔廢天下淫祠仍禁擅興祠宇如有功績灼然合建置廟貌者奏聽勅裁

虞部

後唐長興元年十月國子尙書博士田敏奏請依春秋藏冰頒冰之義以消陰陽僣伏之沴勅藏冰之制載在前經獻廟之儀廢於近代既朝臣之特舉按典禮以宜行田敏所奏祭司寒獻羔事宜依其桃弧棘

矢事久不行。理難備創。其諸侯亦宜准往制藏冰。

祕書省

周顯德五年閏七月祕書省奏。奉今年七月七日勅節文。刪集見行公事。送中書門下者。當省逐季准祠部牒到晝日。預先牒著作局修撰祝文。兼牒太常禮院。詳定神名首尾。及准太常寺牒到逐季五岳四瀆。牒著作郎修撰祝文。牒太常禮院。詳定神名。候太常宗正兩寺供到祝版。及獻官名銜。省司帖著楷書修寫。

殿中省

漢乾祐三年八月。殿中省奏當司儀仗車駕。都洛京時所差。至今管係。逐年分番祇候執擎儀仗。昨京兆府奏依平戶例差使。伏恐忽有大禮。無人供應。勅殿中省執擎儀仗關西道色役人員。地里遐遙。分番勞擾。宜據姓名。並還州縣。今後執擎人缺。別奏取裁。

內侍省

後唐同光元年十一月。以左監門衛將軍判內侍省李紹宏兼內句。紹宏在莊宗皇帝龍潛日。爲中門使。及卽位。命潞州監軍張居翰與郭崇

輅爲樞密使。以紹宏爲宣徽使。心常不足。崇輅知之。乃置內句之名。凡天下錢穀簿書。悉委裁決。州縣供帳煩費。議者非之。

天成元年四月。中書門下奏請廢諸道監軍使。并內句司從之。

太常寺

後唐長興三年正月。太常卿劉岳奏。先奉勅刪定鄭餘慶書儀者。臣與太子賓客馬縞。太常博士段顯田。敏。路航。李居浣。太常丞陳觀等。同共詳定其書。送納中書門下。奉勅。宜差左散騎常侍任贊。右散騎常侍楊凝式。兵部尚書梁文矩。工部尚書崔居儉。太子賓客裴高。尚書左丞王權。尚書吏部侍郎姚顛等七人。與劉岳。再於鄭餘慶書儀內。子細檢詳。除文臣起復。及士庶冥婚。准勅不行外。應篇目一一立出元舊條件。據有合定者。逐件別書出。今詳定式樣。其不可改易者。亦須具言請仍舊施行。

周顯德五年閏七月。太常寺奏。准勅節文刪集見行公事。送中書門下者。謹具如後。每有四季祇應諸郊壇廟御署祝版。並是牒三司起請。却於少府監請祝版。差人吏部抄寫細名銜。牒祕書省寫文。牒閣門進署訖。齋赴祠所。遇鑾駕巡省。准堂判於留守衙書御名。祇應逐年四季。諸州府祭嶽鎮海瀆祝板。當司於進奏院抄寫本州細名銜。具錄牒祕書省撰文書寫。牒閣門進署。分付本州。如鑾駕巡省。亦於留守衙書名。四季諸郊壇廟。黍盛禮料諸般物色。並是逐季計算申請。牒省支給。逐處諸領納太廟禮料庫。逐月却於禮料庫請領。逐祭分劈十數升合。齋赴壇廟祇應。兼句當諸處焚奠火龍。

宗正寺

周顯德五年閏七月。宗正寺奏。准勅節文。刪集見行公事。送中書門下者。謹具如後。見管齋郎室長。逐季

候大饗捧饌行禮。及出給每年行事歷子。見管禮料庫。收貯諸司納到諸郊壇廟祠祭禮料。逐月給付。逐季太廟并別廟祠祭祝版。當寺於少府監請領。送祕書省書寫訖。却將應奉寺祭候年滿。則將齋郎室長。於每年八月。印發文字。解送赴南曹。

光祿寺

周顯德五年閏七月。光祿寺奏。准勅節文。刪集見行公事送中書門下者。謹具如後。逐年四季諸郊壇廟祠祭大祠中祠小祠。并朔望告廟等。逐季所請禮料。並牒省於諸庫務請領。送納入禮料庫。逐月旋具祭數請領。於本庫寺封記。赴祠部造饌。供應四般肉醬并鹿脯。省司元指揮在御廚年支制造。合使升合斤兩。請領供應。皇帝親拜南郊。自太廟朝饗。至郊壇供備。并鑾駕巡幸。准例。城門外軼祭告天地社稷太廟。各合申請禮料供應。

太僕寺

周顯德五年閏七月。太僕寺奏。准勅節文。刪集見行公事送中書門下者。謹具如後。諸郊壇廟祠祭昊天上帝上辛一祭。無羊。太社太稷皇地祇。逐祭各供犢子一頭。羊一口。神州地祇朝日夕月百神。已上四處并太廟。逐祭元供犢子一頭。羊一口。准顯德二年八月勅。皆不用犢。今逐祭供羊一口。黃帝青帝赤帝白帝黑帝。元逐祭祇供犢子一。今亦准勅。用羊一口代。九宮貴神先農風雨五龍文宣王武成王。逐祭各供

羊一口。司寒逐祭供黑羊一口。先牧馬租馬社馬步靈星中雷逐祭各供羊肉一斤半。司中司命司人司祿逐祭各供羊肉六斤。太廟朔望祭逐祭供羊肉七斤半。心肚肺一副。鑾駕出宮城門外軼祭別供羝羊一口。差寺丞一員充獻官。禘饗逐祭供羊二口。已上犢子。寺司申省。准指揮下開封府收買。交付當寺。其羊并肉等。亦准省牒於牛羊司。請領供應。

大理寺

後唐長興二年八月勅。今後大理寺官員。宜同臺省例升進。其法直官比禮直官任使。兼御史臺每月支錢三百千。充曹司人力紙筆糧課。其大理寺先支二十千。與臺中比類錢少。宜於兩班罰錢。及三京諸道贓罰錢內。每月支錢一百千。與大理刑部兩司。其刑部人力不多。所使紙筆校少。仍於所賜錢內三分支與一分。其月十一日。大理卿李延範奏。當寺今有要切事節。謹具逐件如後。一件。寺司每奉勅旨斷案。准格。須委法直司。據罪人所犯。檢定法條。本斷官將所犯罪名。并所檢法律。及法書本卷。對驗不差。然後逐件於法狀上署名。下法定斷。伏見寺司案內。每將法直官所檢條件法狀。備錄在詳斷案。伏准格文。法直官祇合錄出科條。備勘押入案。至於引條判斷。合在曹官。仍不許於斷狀內。載法直官姓名者。自今已後。其法狀。臣欲落下。留充寺司案底。不錄在奏狀中。冀免元勅法狀三重在案。其本斷官。仍於斷狀後具言。臣所斷前件文案。皆是將法直司所驗條法。一一周細詳認。悉是罪人所犯科條。或言將某色律條。比附

詳斷逐件參檢。並無漏落法律。及無欠少案內事節。一件。格文內太和四年十二月三日。刑部員外張颺奏。大理寺官結斷刑獄。准舊例自卿至司直訴事。皆許各申所見陳論。伏以所見者。是消息律文。附會經義。以讞正其法。非爲率胸臆之見。逞章句之說。以定罪名。近者法司斷獄。例皆緝綴詞句。漏略律文。且一罪抵法結斷之詞。或生或死。遂使刑名不定。人徇其私。臣請今後各令尋究律文具載其實。以定刑辟。如能引據經義。辨析情理。並任所見詳斷。若非禮律所載。不得妄爲判章。出外所犯之罪。一件。詳刑定罪。實在法律一科。須是犯人本條。或取比附詳斷。自今後大理寺詳斷文案。祇得以本犯一條法律斷罪。不得更將稍似格律。於本條前後安排。如是罪人合以官品減等官告贖罪之類條件。卽許於法狀內。次第區分。右奉勅。大理寺每有詳斷刑獄案牘。准律須具引律令格式正文。又稱准格詳獄。一切取最後勅爲定。後勅合破前格。今後凡有刑獄。先令律令格式。有無正文。然後詳檢後勅。須是名目條件同。卽以後勅定罪。勅內無正條。卽以格文定罪。格內又無正條。卽比附定刑。先自後勅爲比。事實無疑。方得定罪。或慮律令難明。錄奏取裁。仍當比事平情。取法直官不隱。法文狀在案。本斷官祇據慝狀書法定罪。不得輒使文章。及有徵引。刑部詳覆官法直官亦准此。兼自此御史臺大理寺。准推斷刑獄之際。刑法官及諸朝臣。不得以見所推斷人罪名。合使條格。奏請改易。刑法中或有不便於事者。任其奏聞。餘依李延範所奏。四年二月大理正張瑑奏曰。臣伏見咸通十年二月二十九日大理少卿劉慶初奏。請於法寺置議獄堂。

每寺丞詳斷刑獄。畢集大卿二少卿二正六丞四司直八評事十司於議獄堂參詳。令依典式。其法官中能辨雪冤獄。迹狀尤異者。二人已上者。請書上下考。三人四人已上者。超資與官。今欲望依慶初所奏。法官寺置議獄堂。凡斷公事。並集法官詳議。然後連署奏聞。天下諸州案牘。亦望本判官與副使已下。都廳會議。勅法寺議獄。宜且於寺卿廳內。法官賞罰。宜依所奏。天下州府有疑者。判官集議。尋常案款。則准法施行。

晉天福五年六月二十七日。大理寺申當寺自前每月公案一道。除斷狀外。須全寫三本。內一本申奏。一本送刑部。一本下本道者。伏緣近年諸處公案併多。寺司常慮淹延。況所行斷遣案文。此謂舉明條法。況本道已有元推公案。固不煩備錄施行。今欲祇錄斷狀連勅頒宣。亦不礙於規矩。況刑部大理寺亦是已有具案。元祇以斷覆詞降勅歸司。其諸道元推司。今欲乞准刑部例。祇降斷狀連勅施行。所貴將來免滯刑獄。從之。

鴻臚寺

周廣順三年八月勅。漢容陵潁陵。今後係鴻臚寺管。

大府寺

周顯德五年閏七月。太府寺奏。准勅節文。刪集見行公事。送中書門下者。當寺見管銅斗一隻。銅秤一量。

鑠子一十隻。銅升一隻。銅合一隻。五尺鐵度一條。應斗升尺給付諸道州府。及在京貨賣。收係省錢。卧每隻省司支作料錢三百五十文。依除官賣九百文八十陌。秤每量支作料錢二百三十五文。依除官賣六百三十文八十陌。升每隻支作料錢五十文。官賣一百三十五文八十陌。尺每條支作料錢三十文。官賣一百八十文八十陌。

司農寺

周顯德五年閏七月。司農寺奏。奉勅節文。刪集見行公事。送中書門下者。當寺每年季冬祠祭。合供使芹韭菁葱葵菹等五件。准例。至過藏之時。牒三司支給。寺司請領藏過。準備一冬供應。

少府監

後唐同光三年正月勅。少府監鑄造印文。元屬禮部兩司。互有推注。及諸道使臣廣徵銅炭價錢。自今後凡鑄印。宜令本司限勅到五日內進呈。不計諸道在京。並不得徵納銅炭價值。所破物料。於租庸院請領。晉開運三年二月詔。少府監今後凡修制親王婚禮法物并冊文。出降公主九樹華釵箱盞等。宜令不得用龍鳳紅條帕。

國子監

梁開平三年十二月。國子監奏。修建文宣王廟。請率在朝及天下見任官俸錢。每貫剋留一十五文。

後唐天成三年正月。中書門下奏。伏以祭酒之資。歷朝所貴。爰從近代。不重此官。況屬聖朝。方勤庶政。須宏雅道。以振時風。望令宰臣一員。兼判國子祭酒。勅宜令宰臣崔協兼判。其年八月十一日。宰臣兼判國子祭酒崔協奏。請國子監每年祇置監生二百員。候解送至十月三十日滿數爲定。又請頒下諸道州府各置官學。如有鄉黨備諸文行可舉者。錄其事實申監司。方與解送。但一身就業。不得影庇門戶。兼太學生。亦依此例。不得因此便取公牒。輒免本戶差役。又每年於二百人數內。不繫時節。有投名者。先令學官考試。校其學業深淺。方議收補姓名。勅宜依。

五年正月五日。國子監奏。當監舊例。初補監生。有束脩錢二千。及第後。光學錢一千。竊緣當監諸色舉人。及第後。多不於監司出給光學文抄。及不納光學錢。祇守選限年滿。便赴南曹參選。南曹近年磨勘選人。並不收監司光學文抄爲憑。請今後欲准往例。應諸色舉人及第後。並先于監司出給光學文抄。并納光學錢等。各有所業等第。以備當監逐年公使奉勅。宜准往例。自今後凡補監生。須令情愿於監中修學。則得給牒收補。仍據所業次第。逐年考試申奏。如收補年深。未聞藝業。虛沾補牒。不赴試期。亦委監司具姓名申奏。

清泰三年五月。勅。國子監每歲舉人。皆自遠方來集。不詢解送。何辨是非。其附監舉人。並准去年八月一日勅。須取本處文解。如不及第者。次年便許監司解送。若初投名。未曾本處取解者。初舉落第後。監司勿

便收補。其淮南江南黔蜀遠人。不拘此例。

周顯德元年十一月勅。國子監所解送廣順三年已前監生人數。宜令禮部貢院收納文解。其今年內新收補監生。並仰落下。今後須是監中受業。方得准令式收補解送。

近年有諸州府不得解舉人。卽投監請補。

五代會要卷十七

王府官

後唐長興四年四月。以祕書監劉贊爲秦王傅。前忠武軍節度判官蘇瓚爲秦王友。前襄州觀察支使魚崇遠爲秦王府記室參軍。時言事者請爲秦王置師傅。上顧問近臣。皆以秦王名勢隆盛。不敢置議。請自選擇。方降是命。

致仕官

後唐長興二年八月勅。應內外致仕官。自此凡要出入。不在拘束之限。

雜錄

後唐同光三年八月勅。諸寺監人吏授官。從來祇計勞考。年滿起選。方許離司。近日以來。頗墮條制。到司曾無考課。公事尙未諳詳。便求薦論。深爲僥倖。遂使故事都廢。蓋因舊人不存。豈唯勞逸不均。兼致司局曠敗。自今年除勞考滿三銓官。卽許赴任。非時不得奏薦。如有主掌任重。勞績可稱。許赴司奏聞。當與減選。或是顯然事迹。在司年深。祇役不任。卽許解職赴任。餘依格條處分。

天成四年九月勅。諸司寺監。凡有文簿施行奏覆。司長須與逐司官員同簽署申發。不得司長獨有指揮。其主印官或請假差使。其印須依倫次主簿。不得踰越。

長興二年八月勅。應諸司職掌人吏。前後選授州縣官。考滿日。委本處申奏。各追還司職。依舊執行公事。四年六月十日勅。起今後諸司初除官。勒留職人吏等。並於省員州縣判司簿尉內除授。免侵使見親公事正員。及不支料錢。

周顯德三年十月勅。應諸司寺監。今後收補職役人等。並須人材俊敏。身言可採。書札分明。履行清謹。勅本司關送吏部。引驗人材。校考筆札。其中選者。具引驗可否。連所試書迹。并本州府不係色役迴文及正身。引送中書後。吏部具夾名奏聞。候勅下。勅本司收補。餘係前後格勅處分。每年祇得一度奏補。其諸司寺監舊額人數。仍令所司量公事繁省。於未奏補人數內。酌詳增損。別爲定額。

試攝官

後唐天成元年十月十六日勅。伏以削平區宇。撫育蒸黎。頃當災歉之餘。未絕瘡痍之苦。緬惟邦本。實繫官常。苟未致於雍熙。則曷寧於宵旰。必在求之良吏。委以親人。儻或因循。遂成勞擾。先朝以選門既無。攝官尤多。近年以來。銓注無幾。遂至諸道州縣。悉是攝官。既無考課之規。豈守廉勤之節。而況多因薦托。苟徇請求。替罷不常。迎送爲弊。殘民害物。熾然成風。言念所聞。焦勞何已。宜令三司及諸道州府。據見任攝官。如未有正官。具差攝月日錄名申奏。如已後或爲公事及月限已滿。乞行替移。卽須具因由。并選差將來攝官歷代職任姓名。聞奏替免。無得頻有替換。如有內外臣僚。輒行薦托。當舉憲章。

四年正月勅大理寺近爲陵臺令冒稱試銜。按法以詐假論。又據長定格。選人無出身。未曾任正員官。使虛銜散試官。奏受正員官。及權知權判等官。未得資。自以諸事故解官。並立選集。限勅天下州府。例是攝官。或因勘窮。遂爲詐假。法書中雖云不可。選條內其奈不無。今日已前。或有稱試銜者。一切不問。此後並宜禁止。

晉開運元年十二月。中書門下奏。請司寺監若無私不合一例。差署攝官。況自前元無勅命指揮。又不曾具名奏聞。其太常寺太祝奉禮。逐季祇應祠祭行事。不可缺人。其太常寺已差攝官滿五年者。宜比三傳出身。其餘諸司寺監。今日已差攝官滿五年者。宜比明經出身。今既稱已年滿者。各委本司一月內具所差年月鄉貫三代申奏。下中書追引本司差攝文牒。及親公事文書。點檢不虛。奏覆勅下後。方理選數。仍給與優牒。候合格日。赴選。如攝太常寺太祝奉禮。有已滿三年已上者。亦許一齊奏過。候滿五周年。准前事例施行。其餘諸司寺監。攝未滿五周年者。不在施行。兼今後諸司寺監。不得更差攝官。其太常寺。如正官數少。宜許差前資判司主簿及黃衣選人充。仍先具姓名申奏取裁。不得充原額人數。所攝一任。限周年爲滿。每年與減一選。候罷攝日。准前給與優牒。候本選合格日。執優牒赴選。從之。

三年五月勅。省司差攝官員。今日已前任攝滿五年者。宜追驗本司差攝文牒。及親公事文書。并鄉貫三代點檢者。與授初官。起今後所司。如更有闕。須差攝官者。可具所攝鄉貫三代奏聞。

周顯德元年正月一日敕節文。其諸寺監官。任滿七周年已上。應奉公事無遺闕。文書灼然者。並與同明經出身。如不滿七周年者。任逐便穩。今將寺監。不得以自身署攝。如違。本司官吏。並行朝典。其年十一月二十一日勅節文。起今後諸處州縣官。考限已滿。替人未到。宜令且守本官。執行公事。仍令依舊請俸。不得擅離任所。州府亦不得差署攝官。替下。如有遭憂。停任身故。假滿百日。及非時闕官之時。祇可差人承攝。

六年七月二十三日勅。攝官承乏。或久罄于公勤。因時側揚。宜特行千旌錄。諸處自前應有攝官。曾經五度者。與一時出身。仍先令所司磨勘。須得任親公事文書。解由分明。每攝須及半年已上。方得充爲任數。仍行所司引驗人材。及考試書判。的然堪錄用者。方得施行。

僞官

後唐同光三年閏十二月初。平僞蜀。應僞署官員等。官至太師太傅及三少。并太尉司徒司空侍中。中書令左右僕射已上。並宜降至六尚書。臨時更約高卑。爲六行次第。階至開府特進金紫者。文班降至朝議大夫。武班降至銀青爵。如是舊僞署將相已上。與開國男三百戶。餘並不許有封爵。其有功臣名號。並宜削去。如檢校官至郎中員外郎。兼侍御史已下。如是僞署節鎮。率先向化及立功效者。委行營都統。緣事迹獎任。如刺史。除停罷外。有見任政績可稱者。但許稱使君。不得更有檢校及兼官。其僞署班行正官。

四品已上。依此降黜。五品已下。如不曾經本朝授官。又無族望可稱者。材智有聞。卽許於府縣官中量材任使。如無材智可錄者。並宜收歸田里。若西班牙有稱統軍上將軍者。若本是功臣子孫及將相之後。並據人材高下。與諸衛小將軍率府副率中郎將。次第授任。如是小將軍已下。堪任使者。委西川節度使補衙前押衙。已下職。所有歸降官。除軍前任使下。並稱前衙。續據材行任使。

應順元年三月二十日勅節文。如有賣官買官人等。並准長興四年三月二十七日。斷魏欽緒犯買官罪。決重杖一頓。處死。敕處分。其詐假官及冒名接腳等。並准律文。及天成元年九月十六日勅指揮。

漢乾祐二年四月中書門下奏。准吏部南曹鑠宿內選人中。有契丹會同年號。歷子解由考牒。未審合各令改就天福年號。爲復別有指揮。奉敕。應是僞命文書不在施行之限者。今有緣晉朝受官。契丹年給解由歷子。若執格勅。又慮有廢身名。凡州縣幕府。曾受契丹僞命者。速毀文書。祇取唐晉朝出身文書參選。本選外仍殿五選。降三資注擬。凡唐晉朝諸科及第人。於契丹年號內。出給文書。許追毀換給。仍自新給年月日理選。從之。

御史臺

後唐同光二年三月三十日。御史臺奏。所除諸道節度觀察防禦經略等使。刺史縣令。及諸道幕府。兼諸司帶憲衙兼官。合納光臺錢。謹具本朝元納及減落錢數如後。兼御史大夫元納三十千。減外納一十五

千兼御史中丞元納二十千。減外納一十千。兼侍御史元納八千三百。減外納四千一百五十。兼殿中侍御史元納一十一千三百。減外納五千六百五十。兼監察御史元納一十三千三百。減外納六千六百五十。已前臺司准本朝例及減落後所徵錢數分析如前。應有諸道節度觀察使刺史經略防禦等使及諸道幕府上佐官并諸司班行新受兼官者並合送納前件光臺憲銜禮錢。今欲准例勒辭謝樞使官申報兼牒兵部勒告身案除准宣取外准例候送納光臺禮錢畢朱鈔到方可給付仍轉帖諸道進奏及諸州使院等准前事例申報催徵無致有墮舊規勅從之。

周顯德五年閏七月一日御史臺申見行事件應新除節度防禦團練刺史賓幕州縣官兼帶五院憲銜合徵光臺禮錢如是已曾納過准舊例不徵兼御史大夫元徵三十千今徵六千兼御史中丞元徵二十千今徵四千兼侍御史元徵八千三百今徵一千六百六十兼殿中侍御史元徵一十一千三百今徵二千二百六十兼監察御史元徵一十三千三百今徵二千六百六十。

天成元年十二月十一日御史臺奏本朝舊例合行公事如後應諸道進奏院准本朝例各合置臺巡驅使官一員凡有公事並合申臺巡日逐在臺承應公事應諸道進奏官每四季月初及五月一日冬至并新除大夫中丞並合臺參伏自僞朝以來全墮舊制今准勅命條流請准舊例施行應諸道節度觀察防禦經略團練使及諸州刺史新除赴任及郎幕上佐官等得替及准山進奏到闕及歸本道並合廊參正

衙謝見辭。如遇大夫中丞入臺，並合臺參。凡有公事及到發日，並合申報。如違，追勘進奏官典。右僞朝已來，全墮往制，罕成倫理，頗失規繩。伏乞特降明勅，指揮免令墮紊，從之。

長興三年三月勅：近日累據御史臺奏，陳狀訴屈人，據狀內皆是訊鞫多時，却曉示陳狀人送道，依次第論對。及州府道到本支證，本人又不到彼處，恐紊規繩，須行條理。宜令御史臺今後諸色人論訟，稱已經州府斷遣後抑屈，更不在牒本道勘逐，便可據狀施行。若未經州府論訴，驀越陳狀，可具事由，勒本道進奏官，差人齎牒監送本處，就關連人勘斷訖奏聞。

四年五月二十五日，御史中丞龍敏等奏陳事如後：一、臺司除御史中丞隨行印，及左右巡使監察使并出使印等外，其御史臺印一面，先准令式，卽是主簿監臨。近年已來，緣無主簿，遂至內彈御史權時主持，又常隨本官出入不定，伏緣臺中公事不同諸司，動繁重難，常虞留滯。當申奏申堂之際，及牒州府之時，事無輕重，並使此印。今准令式，逐日有御史一員臺直，承受制勅公文，其御史臺印今後欲勒留臺中，不令在外。選差令史一人，帖司一人，同知此印。凡有諸色大案印發之時，准指揮諸司各置印歷一道，據其事節件數，書在歷中，卽於直官面前點檢印發。其印至夜封閉，俟交直轉付下次直官共議執行。一、御史臺事總朝綱，職司天憲，所管人吏色役最多，上至朝堂，次及班列，或在京勾檢公事，或外地推勘稽遲，監守狴牢，行遣案牘，或隨從出使，或祠祭監臨，凡有係於臺司，皆須藉其人吏，俾無闕事，以贊國容。近年以

來人數極少。及月限者授官出外。爲官滿者追召未來。人力不充。公事停滯。今欲於諸州使院內。量事差取十人。據臺中諸司闕人臨時量材填補者。一其臺中令史。今欲條流凡出官考滿印來歸司者。便具到日。申所司繫其選限。如有經年不到。追召不來。卽具申堂。卽乞除落名姓。奉勅宜依。凡在京百司人吏。考滿歸司。繫其選限。亦宜令准此。

周廣順二年十月勅。今後凡有百姓訴論。及言災沴。先訴於縣。縣如不治。卽訴於州。州治不平。訴於觀察使。觀察使斷遣不當。卽可詣臺省申訴。如或越次論訴。所司不得承接。如有詆犯。准律科懲。

御史大夫

後唐天成元年六月。以李琪爲特進行御史大夫。自後不除。

御史中丞

後唐天成元年十一月。諸道進奏官等狀。臣等今月四日。中丞上事。禮合至臺。比期不越前規。依舊傳語。忽蒙處分通出。尋則再取指揮。要明審的。又蒙問大夫相公上事日如何。臣等云。大夫曾爲宰相。進奏官伏事中書。事體之間。實爲舊吏。若以別官除受。合云傳語。又兼傳指揮。便令通出。臣等出身藩府。罕習朝儀。拒命卽恐有奏陳。遵稟則全隳儀矩。伏恐此後到臺參賀。規則不定者。勅御史臺是中朝執憲之司。乃四海繩違之地。凡居中外。皆俟整齊。藩侯尙展於公參。邸吏豈宜於抗禮。據觀論列。可驗輕誣。但以喪亂。

宏多紀綱。鑿案霜威掃地。風憲銷聲。今則景運維新。皇圖重正。宜加提舉。漸止澆訛。宜令御史臺。凡關舊例。並須舉行。稍不稟承。當行朝典。時盧文紀初授中丞。領事于御史府。諸道進奏官來賀。文紀曰。事例如官之禮。及僞梁將革命。本朝微弱。諸藩強據。人主大臣。皆且姑息。邸吏時中丞上事。邸吏雖至。皆于客次傳語。竟不相見。自經兵亂。漸以爲常。文紀令臺司諭以舊儀相見。據案端簡。通名贊拜。邸吏輩既出。怒不自勝。相率于閣門求見。騰口誣訴。上問趙鳳曰。進奏官比外何官。鳳對曰。府縣發遞。祇候之流。上曰。乃吏卒耳。安得慢吾法官。官乃下此敕。

侍御史

晉天福四年三月。御史臺按六典侍御史掌糾舉百僚。推鞠獄訟。居上者判臺知公廨事。次知西推。賊贖三司受事。次知東推。理匭。伏乞今後准故事施行。勅宜依舊制。尋以尙書駕部員外郎兼侍御史知雜事者。其年五月。御史臺奏尙書郎知錄事之時。赴臺禮上。軍巡邸吏咸集。公參府司兩縣。皆呈印狀。今御史判雜上事。欲准前例。從之。

開運二年八月。勅御史臺准前朝故事。以郎中員外一員。兼侍御史知雜事。近年停罷。獨委年深御史知雜。振舉之司。紀綱未峻。宜遵故事。庶協通規。宜於郎署中。選滿慎強幹者。兼侍御史知雜事。

殿中侍御史

後唐天成二年九月二日。御史臺奏。每遇入閣日。祇一員侍御史。在龍墀邊。祇候彈奏公事。或有南班參

雜失儀點檢不及。難於舉奏者。今欲依常朝例。差殿中侍御史二員。於鐘鼓樓位。各綴供奉官班。出入所事。具爲糾察。從之。

監察御史

後唐同光二年五月。御史臺准本朝故事六察。合行職事如後。吏察。應吏部南北兩曹磨勘選人。各具駁放判成人名銜。牒報分察使。及三銓應鑱銓注官後。具前銜名。擬報分察使點檢。若有踰盜。卽察使舉追本行人推鞠。戶察。應戶部司諸州戶帳貢物。出給蠲符。具事件合報察使。兵察。應兵部公事。一一合報察使。刑察。應刑部法律。赦書德音。流貶量移。斷罪輕重。合報察使。禮察。應禮部司補轉鑄印。諸祠祭料法物。合報察使。工察。應工部司工役。合報察使。右御史臺六員監察。謂之分察使。但緣曠廢。久不舉行。今欲依條貫施行。從之。

御史臺主簿

後唐天成四年八月。御史臺孔目官閻珪狀分析。每大夫中丞奏請雜端主事等官。承前隨廳罷任。其主簿朱頴見任。伏候勅裁。勅諸道賓從。卽隨府罷臺。主簿旣爲正秩。況人選門顯。自勅恩。須終考限。朱頴宜仍舊官。

知班

周廣順三年三月十四日。殿中侍御史賈玘。殿中侍御史劉載。狀申。自漢朝次。每遇內殿起居。臺司定左右。巡使先入起居後。於殿廷左右立定。百官始入起居。有失官儀。使宣彈奏者。今後欲依入閣彈奏儀。折署奏後。宣微使言所奏知。通事舍人喝拜。再拜訖。便退。如兩巡使自有失儀。亦候班退。互相彈奏。

推事

周顯德五年閏七月一日。御史申臺司。見管四推臺。一推臺。二推殿。一推殿。二推臺。或准勅命宣頭堂帖。指揮送到公事。并諸道州府論訴。准例一人已上。三院御史。從上輪次配推。兼具差定推官名銜申奏。申中書門下。如是三人已上。卽本彈推勘。若四推皆有公事外。更有刑獄。卽差以次官推勘。兼逐日輪差官吏臺直。點檢刑獄。

出使

周顯德五年閏七月一日。御史臺申。臺司或准勅命宣頭。委臺司差官出外。推勘刑獄。舊例於監察御史內。從下差定。如是特勅定名。不拘此例。

雜錄

後唐天成四年三月二十日。御史臺奏。臺中舊有格杖。近年不行。每有決遣公事。皆於河南洛陽兩縣。追借人杖。今臺中嘗有囚徒勘責。若一一於兩縣追借。又緣地里遙遠。及候差人往來。各有妨滯。今臺請置

常行人杖。免有住滯公事。從之。

晉開運二年八月勅。今後諸御史。宜令除准式請假外。不得以私故小事。請假離京。并除奉制命差勘公事。及按察外。不得以瑣細事差使出外。

漢乾祐三年五月。殿中侍御史竇文靖奏。臺中糾彈過失。舊有十六僛事。節次不舉明。臣訪聞朝官。有便服徒步城市者。既通閨籍。實污朝風。勅宜令御史臺常加察訪。具以名聞。當行譴逐。隱而不言。與之同罪。周顯德二年四月三日勅。起今後。應有自外新除御史。未經朝謝者。經過州府。不得受館驛供給。及所在公禮。時有庾元晟居秦雍間。拜殿中侍御史。遵人秦州驛受軍州禮。上知之。故有是勅。

五代會要卷十八

史館移置

周廣順三年九月敕。入厚載門內向東橫街東地房宇。宜令弘文館集賢院於此分劈廡署。

諸司送史館事例

後唐同光二年四月。史館奏本朝舊例。中書并起居院諸司及諸道州府。合錄事件報館如右。時政記。中書

門下起居住。左右起居兩省轉對入閣待制刑曹法官文武兩班上封章者。各錄一本天文祥變。占候徵驗。書

司天臺逐月錄報。并每月供送歷日一本。蕃客朝貢使至。鴻臚寺勘風俗衣服。貢獻物色。四夷人役來降。詳瑞禮節逐季錄報。并諸道合畫圖申送。蕃客朝貢使至。道里遠近。并具本國王名錄報。四夷人役來降。

表狀中書錄報。露布兵部錄報。軍還日并主。變改音律。及新造曲調。太常寺具錄所法令變革。斷獄新議。將姓名具攻陷虜殺級數。并所因由錄報。變改音律。及新造曲調。因并樂詞牒報。法令變革。斷獄新議。

赦書德音。刑部逐季具詳斷刑獄。昭雪冤濫。大理寺逐州縣廢置。及孝子順孫義夫節婦。有旌表門閭者。

戶部有水旱蝗蟲。雷風霜雹。戶部封建天下祠廟。敍封進封邑號祠。司封京百司長官刺史以上除授。文

吏部錄報。武諸色宣敕。門下中書兩公王百官定諡。考功錄行狀并諡議宗室任官課績。并公主出降儀。

官兵部錄報。刺史縣令有灼然政績者。本州官錄申應碩德殊能。高人逸士。久在山野。著述文章者。本州縣

秩勸間的實申。應中外官薨已請諡者。許本家各錄行一右乞宣下有司。條件施行。從之。

奏仍具錄報。狀一本申送。

長興三年二月司天臺奏奉中書門下牒令逐年申送史館十一曜細行歷并周天行度祥變等當司舊例祇申星曜事件不載占言勅宜令司天臺密奏留中外其餘凡奏歷象雲物水旱等事及諸州府或奏災祥一並申送史館

前代史

晉天福六年二月敕有唐遠自高祖下暨明宗紀傳未分書誌咸闕今耳目相接尙可詢求若歲月寢深何由尋訪宜令戶部侍郎張昭起居郎賈緯祕書少監趙熙吏部郎中鄭受益左司員外郎李爲先等修撰唐史仍令宰臣趙瑩監修其年四月監修國史趙瑩奉敕同撰唐史起居郎賈緯丁憂請以刑部侍郎呂琦侍御史尹拙同修從之尋改呂琦爲戶部侍郎尹拙爲戶部員外郎令與張昭等修唐史其年四月監修國史趙瑩奏自李朝喪亂迨五十年四海沸騰兩都淪覆今之書府百無二三臣等虔奉綸言俾令撰述褒貶或從於新意纂修須按於舊章旣闕簡編先虞漏略今據史館所闕唐書實錄請下勅命購求況咸通中宰臣韋保衡與蔣仲皇甫燠撰武宗宣宗兩朝實錄又光化初宰臣裴贄撰僖宗懿宗兩朝實錄皆遇國朝多事或值鸞輿播越雖聞撰述未見流傳其韋保衡裴贄合有子孫見居職任或門生故吏曾托纂修聞此撰論諒多欣愜請下三京諸道及中外臣寮凡有將此數朝實錄詣闕進納請察其文武才能不拘資地除一官如卷帙不足據數進納亦請不次獎酬以勸來者自會昌至天祐垂六十年其初

李德裕平上黨。著武宗伐叛之書。其後康承訓定徐方。有武寧本末之傳。如此事類記述頗多。請下中外臣寮。及名儒宿學。有於此六十年內撰述得傳記。及中書銀臺史館日歷制敕冊書等。不限年月多少。並許詣闕進納。如年月稍多。記錄詳備。請特行簡拔。不限資序。臣與張昭等所撰唐史。祇敘本紀。以綱帝業。列傳以述功臣。十志以書刑政。大紀以綱帝業者。本紀之法。始於春秋。以事繫日。以日繫月。以月繫時。以時繫年。刑政無遺。綱條必舉。須憑長歷。以編甲子。請下司天臺。自唐高祖武德元年戊寅。至天祐元年甲子。爲轉年長歷一道。以憑編述本紀。列傳以述功臣者。古者衣冠之家。書于圖籍。中正清議。以定品流。故有家史。家傳。族譜。族圖。江左百家。軒裳輟軌。山東四姓。簪組盈朝。隋唐已來。勳書王府。故士族子弟。多自紀世功。貴載簡編。以光祖考。請下文武兩班。及藩侯郡牧。各敘兩代官婚名諱。行業功勳狀一本。如有家譜家牒。亦仰送官。以憑纂序列傳。十志以書刑政者。五禮之書。代有沿革。至開元刊定。方始備儀。洎寶應以來。典章漸缺。其謁款郊廟冊拜王公攝事相儀之文。車輅服章之數。請下太常禮院。自天寶以後。至明宗朝以來。五禮儀注。朝廷行事。或異舊章。出處增損節文。一一備錄。以憑撰述禮志。四縣之樂。不異前文。八佾之文。或殊往代。隋唐以來。樂無夷夏。乃有文舞武舞之制。坐部立部之名。天寶之初。雲韶大備。天寶之後。音律漸衰。郊廟殿廷。舊章斯缺。及咸秦蕩覆。鍾石淪亡。龍紀及正之年。有司特鑄懸樂。旋宮之義。徒有其文。請下太常寺。其四懸二舞增損。始自何朝。及諸廟樂章舞名。開元十部興廢本末。一一按錄。以憑

撰集樂志。刑名之制。代有輕重。隋唐以來。疏爲律令。累朝繼有制敕。相次增益舊條。格律之文。未能盡一。請下大理寺。自著律令以來。後勅入格條者。及會昌以來所斷疑獄。一一關報。以憑撰述。刑法志。律歷五行。天文災異。史書實錄。前代具書。自唐季亂離。簡編淪落。太史所奏。不載冊書。請下司天臺。自會昌已來。天文變異。五行休咎。歷法更改。更據朝代年月。一一條錄。以憑撰集。天文律歷五行等志。唐初定官品令。三公三師爲第一品。尙書令僕射爲第二品。兩省御史臺寺監長官六尙書爲第三品。自定令以後。官品繼升。比諸令文。前後同異。又有兼攝檢校之例。資授冊拜之文。軍容或盛於朝儀。使務漸侵於省局。以此官無定令。位以賞功。臺府之權。隨時輕重。求諸官志。前代無聞。請下御史臺。自定令以後。文武兩班品秩升降。及府名使額。寺署廢置。官名更改。一一具析。以憑撰述。職官志。唐初守邊。則有都督總管之號。開元命將。則有節度按察之名。故四塞之內。刺史多沒于戎夷。九牧之中。乘寵遂邀於旄鉞。山河異制。名額實繁。請下兵部職方。自開元已來。山河地里。使名軍額。州縣之廢置。一一條列。以憑撰述。郡國志。唐初以降。迄于開元。圖書大備。歷朝纂述。卷帙實繁。若不統而論之。何彰文雅之盛。請下祕書省。自唐以來。古今典籍。經史子集。元撰人名氏。四部大數報館。以憑撰述。經籍志。右所陳條例如前。請下所司。從之。其月起居。郎賈緯奏曰。伏以唐高祖至代宗。已有紀傳。德宗亦存實錄。武宗至濟陰廢帝。凡六代。唯有武宗錄一卷。餘皆闕略。臣今按訪遺文。及耆舊傳說。編成六十五卷。目爲唐朝補遺錄。以備將來史官條述。至開運二

年六月。史館上新脩前朝李氏書紀志列傳共二百二十卷。并目錄一卷。都計二十帙。賜監脩宰臣劉昫。脩史官張昭遠直館王申等。繪綵銀器各有差。

脩國史

後唐天成三年十二月。史館奏據左補闕張昭狀。嘗讀國書。伏見懿祖昭烈皇帝。自元初之初。獻祖文景皇帝。於太和三際。立功王室。陳力國朝。太祖武帝。自咸通後來。勤王戮力。剪平多難。頻立大功。三換節旄。再安京國。莊宗皇帝。親平大憝。奄有中原。儻闕編脩。遂成湮墜。伏請與當館脩撰參序條綱。撰太祖莊宗實錄者。伏見前代史館。歸於著作。國初分撰五代史。方委大臣監脩。自大歷後來。始奏兩員脩撰。當時選任。皆取良能。一代之書。便成于手。其後源流失緒。波蕩不還。冒當脩撰之名。曷揚褒貶之職。及乎編脩大典。卽云別訪通才。況當館職在編脩。合令撰述。敕宜依。

四年七月。監修國史趙鳳奏。當館奉勅脩懿祖顯祖太祖莊宗四帝實錄。自今年六月一日起手。旋具進呈。伏以凡關纂述。務合品題。承乾御宇之君。行事方云實錄。追尊冊號之帝。約文祇可紀年。所脩前件史書。今欲自莊宗一朝。名爲實錄。其太祖已上。竝目爲紀年錄。從之。其年十一月。史館上新脩懿祖太祖紀年錄共二十卷。莊宗實錄三十卷。監脩宰臣趙鳳。修撰張昭遠呂咸休。各賜繪綵銀器等。應順元年閏正月。平章事兼脩國史李愚。與脩撰判館事張昭遠等。進新修唐功臣列傳三十卷。

清泰三年二月。門下侍郎平章事監修國史姚顛。上明宗實錄三十卷。同修撰官張昭遠李祥。直館左拾遺吳承範。右拾遺楊昭儉等。各頒賚有差。

漢乾祐二年二月。敕左諫議大夫史館修撰賈緯。左拾遺直史館王仲。宜令同修高祖實錄。仍令宰臣蘇逢吉監修。至其年十月。修成實錄二十卷。上之。其年十二月。勅宜令監修國史蘇逢吉。與史館修撰賈緯。并竇儼王仲等。修晉朝實錄呈進。從宰臣竇正固奏請也。

周廣順元年七月。史館新修晉高祖實錄三十卷。少帝實錄二十卷。上之。

顯德三年十二月。敕太祖實錄。并梁均帝唐清泰二主實錄。宜差兵部尚書張昭修。其同修撰官委張昭定名奏請。至四年正月。兵部尚書張昭奏。奉勅編修太祖實錄。及梁唐二末主實錄。今請令國子祭酒尹拙。太子詹事劉溫叟。同編修。伏緣漢隱帝君臨太祖之前。其歷試之績。並在漢隱帝朝內。請先修隱帝實錄。又梁末主之上。有郢王友珪。篡弑居位。未有紀錄。請依宋書劉劭例。書爲元兇友珪。其末帝請依古義。書曰。後梁實錄。又唐末主之前。有應順帝。在位四月出奔。亦未編紀。請書爲前廢帝。清泰主爲後廢帝。其書並爲實錄。從之。

五年六月。兵部尚書張昭等。修太祖實錄三十卷。上之。

後唐長興四年正月十一日。史館奏當館承前脩史事例。應合編錄文書。分配在館修撰直館官員。逐人紀述。內修撰一員。充判館事。自除修撰外。應館中著述及諸色公事。都專主專監。修宰臣通判。前修撰直館等。其間勤恪者著述不閑。怠惰者自因循度日。祇藉館中敷歷。以資身事進趨。或別除官。或因出使。便將自己分合撰史籍。送付後人。後人效尤。依前懈惰積疊。不了公事。爲弊滋多。須設規程。庶無曠敗。謹具起請如左。自判館修撰已下。見充職任。及此後充館。請以二周年爲限。據在職館中文書繁簡。逐季分配纂修。如月未滿。公事未闕。卽當館給與公憑。仍旋申中書門下。請別商量。其職限內。遇本官本省署有遞遷。請不妨其序進。卽請令依前充職。終其月限。並請不許未終職限。特更除官。如職限滿。有公事未了。不計幾月。請不別與院官及差使。并與遞遷本官。其曠職甚者。仍請量事殿罰。如據所分配文書修撰外。別能採訪得皇后功臣事實。及諸色合編集事。著撰得史傳。堪入國史者。請量其課績。別加酬獎。如當館於職限滿官員中。籍令充職者。則旋具奏聞。乞就加陞陟。應此日已前曾充館職。配過文書。除了憂官員。則請與均分代修撰。其未了別除官者。所欠文書。不計多少。並與令本官修撰。速須了畢。其今日已前曠惰之過。特乞矜容。起今後若更將已前未了公事。遷延不速修撰了者。則別具奏聞。仰候聖裁。右奉敕宜依。仍付所司。其年七月。以著作佐郎尹拙爲左拾遺。直史館。王慎徽爲右拾遺。直史館。從監修宰臣李愚奏也。故事以本官直者。皆爲畿縣。今諫官直館。自拙等始也。

史館雜錄

後唐同光二年四月。史館司四庫書。自廣明年後散失。伏乞許人進納。仍中書門下。降勅條件。勅進書官。納到四百卷已下。皆成部帙。不是重疊。及紙墨書寫精細。已在選門。未合格人。每一百卷。與減一選。無選減者。注官日優。與處分。無官者。納書及三百卷。特授試銜。

天成二年八月。起居郎趙熙奏。今後凡公事及詔書奏對。應不到中書者。伏乞委內臣一人。旋具抄錄。月終關送史館。勅宜令樞密院學士。月終錄送。

長興二年三月二十八日。史館奏。當館應諸處及諸關。送到合編錄公事外。伏準舊例。國朝有時政記。并起居注。并合送館。以備纂修。近代以來。缺行此事。祇以每遇入閣。兼內殿起居。朝臣待制轉對公事。逐人抄送當館。如是顯有頒行。逐司關報到者。旋逐件於日歷。一一收豎。其有直下所司。并不行之事。當館無由得知。若祇憑本官。俱到所奏狀本。未免簡編不備。本末難窮者。前件待制轉對公事等。除顯有頒行。關送到館外。應有直下所司。及不行未行之事。伏乞宣付當館。旋依次第編錄。其時政記起居注。并內廷逐日合書日歷。亦乞相次施行。奉敕。朝臣起居入閣。奏對公事。覆奏後。宣付史館。宜依其時政記起居注。候別敕處分。其年十一月四日。史館奏。當館昨爲大中已來。迄於天祐四朝實錄。尙未纂修。尋具奏聞。謹行購募。敕命雖頒於數月。圖書未貢於一編。蓋以北土州城。久罹兵火。遂成滅絕。難可訪求。竊恐歲月漸深。

耳目不接。長爲闕典。過在攸司。伏念江表列藩。湘南奧壤。至於閩越。方屬勳賢。戈鋌自擾於中原。屏翰悉全於外府。固多羣士。富有奇書。其兩浙福建湖廣。伏乞特降詔旨。委各於本道。採訪宣宗、懿宗、僖宗、昭宗以上四朝野史。及逐朝日歷。除自銀臺事宜。內外制詞。百司沿革簿籍。不限卷數。據有者抄錄進上。若民間收得。或隱士撰成。卽令各列姓名。請議爵賞。從之。

四年正月十一日。史館奏當館先奉敕修撰功臣列傳。元奏數九十二人。館司分配見在館官員修撰。其間亦有不是。中興以來功臣。但據姓名。便且分配修撰。將求允當。須在品量。其間若實是功臣。中興社稷者。須校其功勳大小。德業輕重。次第纂修。排列先後。今請應不是中興以來功臣。汎將行狀送館者。若其間事有與正史實錄列傳內事相連絡者。則請令附在紀傳內。簡略書出。其無功於國。無德於人。但述履。行身名。或述小才末伎。儻無可以垂訓者。並請不在編修之限。伏自有史傳以來。歷代咸有著述。皆存定制。不可更張。如前漢止述蕭曹絳灌之流。後漢但書寇鄧耿賈之列。並同翼戴。咸共匡扶。爵號功臣。先爲列傳。其餘宗室外戚文苑儒林游俠逸人。循吏酷吏之屬。名目甚衆。各有篇題。並隨其次第撰述。其大惡大善之人。有善若周孔夷齊。惡若敦玄莽卓。亦各特爲著撰。不附傳紀編修。或爲世家。或爲列傳。蓋欲取監前代。垂則後人。不可雷同。請令區別。其功臣未納到行狀者。館司見更催促。候到卽更分配修撰。大凡行狀。皆是門人故吏敘述。多有虛飾文華。今請此後所納行狀。並須直書功業。不得虛文飾詞。其已納到

行狀合著撰者仍請委修撰官略其浮辭探其實事從之。

應順元年正月敕今後三館所闕書並訪本添寫其進書官權宜停罷。

晉天福四年十一月史館奏按唐長壽二年右丞姚璿奏帝王謨訓不可闕文其仗下所言軍國政事令宰臣一人撰錄號時政記至唐明宗朝又委端明殿學士撰錄逐季送付史館伏乞遵行者宜令宰臣一員撰述。

周顯德元年十月監修國史宰臣李穀奏今之左右起居郎卽古之左右史也唐文宗朝命其官執筆立於殿階螭頭之下以紀政事後則明宗朝命端明殿及樞密院直學士皆輪流日歷旋送史館以備纂修降及近朝此事皆廢今後欲望以諮詢之事裁制之規別命近臣旋具抄錄每當修撰日歷卽奉封送史臣從之因命樞密院直學士起今後於樞密使處逐月抄錄事件送付史館。

二年十二月詔曰史館所少書籍宜令本館諸處求訪補填如有收得書籍之家並許送納其進書人據部帙多少等第各與恩澤如卷帙小者量給資帛如館內已有之書不在進納之限仍委中書門下於朝官中選差三十人據見在書各求真本校勘刊正舛誤仍於逐卷後署校勘官姓名宜令館司逐月具功課申中書門下。

後唐同光三年七月，弘文館奏請依六典故事，改弘文館爲崇文館，敕崇文館比與弘文館並置，今名改稱，頗協舊典，從之。時樞密院樞密使郭崇韜亡，父名弘豆，盧革希意奏改之，故有弘文並置之言。

集賢院

唐應順元年閏正月，集賢院奏准敕書創修凌煙閣，又奉正月二十二日詔，問閣高下等級，謹案凌煙閣都長安時，元在西內三清殿側，畫像皆北向，閣有中隔，隔內面北寫功高宰輔，南面寫功高諸侯王，隔外面次第圖畫功臣題贊，自西京傾陷，四十餘年，舊日主掌官吏及畫像工人淪喪，集賢院元管寫真官畫真官人數不少，自遷都洛京，並皆省廢，今將起閣，特請先定佐命功臣人數，下翰林院，預令寫真本及下將作八作，與畫工相度間架修蓋，緣院內有先寫真官沈居隱，畫真官王武瓊二人，身死，卽日無人應用，伏候敕旨，敕集賢御書院，復置寫真官畫真官各一員，餘依所奏。

五代會要卷十九

留守

晉天福七年九月敕留守之任委寄非輕凡降絲綸宜同將相今後除留守宜降麻制

留守降麻自安彥威始也

開封府

梁開平元年四月二十三日敕升汴州爲東京置開封府以開封浚儀兩縣爲赤縣其餘屬縣爲畿縣是月敕東京諸城門宜賜名額宋門爲觀化門尉氏門爲高明門鄭門爲開明門梁門爲乾象門酸棗門爲興和門封邱門爲舍曜門曹門爲建陽門

後唐同光元年十二月復降開封府爲宣武軍節度至天成四年五月敕汴州宮殿並去鴟吻賜本道節度使爲治所其衙署諸門園亭名額並廢

晉天福三年十月敕汴州宜升爲東京置開封府以開封浚儀兩縣復爲赤縣其餘屬縣爲畿縣應舊制開封府時管屬縣分並可仍舊其月敕東京諸城門宜署名額南面尉氏門爲薰風門西面鄭門爲金義門梁門爲乾明門北面酸棗門爲玄化門封邱門爲宣陽門東面曹門爲迎春門宋門爲仁和門其牌額宜令翰林院書敕呈進

周顯德五年五月，賜東京城門名。南面三門，曰未明門、景風門、畏景門。西面二門，曰迎秋門、肅政門。北面三門，曰玄德門、長景門、愛景門。東面二門，曰寅賓門、延春門。又以大內舊匾賓天門爲通苑門。

河南府

後唐同光三年，詳定院奏：近升魏州爲東京，臣檢故事，須先定兩府。未審依舊以京兆及河南爲兩府，太原與唐爲次府，惟復以興王之地，別定府名。勅故事，雍州爲西京，洛州爲東都，太原府在兩府之次。近以中興大業，以魏州爲京，興唐府權名東都爲洛京。今後依舊以洛京爲東都，魏州改爲鄴都，興唐府與北都太原府並爲次府。

長興三年四月，中書門下奏：本朝都長安，以京兆府爲上，今都洛陽，以河南府爲上，從之。
晉天福三年十月，勅改東都爲西京。

京兆府

梁開平元年四月，改京兆府爲大安府，長安縣爲大安縣，萬年縣爲大年縣，仍置祐國軍節度使額。始命韓建
爲祐國軍節度使。至二年五月，改祐國軍爲永平軍。

後唐同光元年十二月，廢永平軍額，復爲西京京兆府，大安縣爲長安縣，大年縣爲萬年縣。
晉天福七年十月，勅改西京爲晉昌軍，留守爲節度觀察使，仍依舊爲京兆府，在七府之上。

漢乾祐元年三月改晉昌軍爲永興軍。

周廣順元年六月降京兆府同五府長安萬年縣爲次赤縣。

大名府

後唐同光元年四月升魏州爲東京都督府曰興唐府元城縣爲興唐縣貴鄉縣爲廣晉縣至三年三月改爲鄴都興唐爲次府。

天成四年五月勅先升魏州爲鄴都有留守王城使及宮殿諸門園亭名額並廢。

晉天福二年九月改興唐府爲廣晉府興唐縣爲廣晉縣。

三年十一月勅魏州廣晉府復升爲鄴都置留守廣晉元城兩縣爲赤縣其餘屬縣爲畿縣。

七年四月勅鄴都諸門宜賜名額羅城南墉門爲廣運門觀音門爲金明門橙槽門爲清景門寇氏門爲永芳門朝城門爲景風門大城南門爲昭明門觀音門爲廣義門北河門爲靖安門魏縣門爲膺福門寇氏門爲迎春門朝城門爲興仁門上斗門爲延清門下斗門爲適遠門。

開運二年四月勅鄴都依舊爲天雄軍節度管內觀察處置等使鄴都留守廣晉尹。

漢乾祐元年三月改廣晉府爲大名府廣晉縣爲大名縣。

周廣順元年六月以大名府元城縣爲赤縣。

顯德元年正月廢鄴都留守依舊天雄軍大名府爲京兆府之下其屬縣地望官吏品秩並同京兆府

諸府

後唐長興三年四月中書門下奏案十道圖以關內道爲上遂以鳳翔爲首河中成都江陵興元爲次中興初升魏州爲興唐府鎮州爲真定府皆是創業興王之地請北升二府於五府之上合爲七府仍以興唐爲首真定鳳翔成都江陵興元爲次從之

都督府

梁正明六年閏六月敕宋州升爲大都督府其年八月勅升福州爲大都督府

後唐長興三年四月中書門下奏天下舊有八大都督府按十道圖以靈州爲首陝幽楊潞鎮徐等州爲次其魏鎮已升爲七府兼具員內越杭福潭等州亦相次升爲都督府望以十大都督府爲額仍據升降次第以陝爲首餘依舊制從之

周廣順三年正月四日勅頃者淮海陸梁舉干戈而入寇湖湘覆沒致黎庶之倒懸惟彼武陵素稱雄鎮連營比屋皆懷勇烈之心戮力協謀盡復江山之境宜降褒崇之命以升忠義之邦俾列大藩永率南夏其朗州宜升爲大都督府在潭桂之上

後唐同光二年中書門下奏。刺史縣令有政績尤異。爲衆所知。或招復戶口。能增加賦稅者。或辨雪冤獄。能全人命者。或去害物之積弊。立利世之新規。有益時政。爲衆所推者。卽仰本處逐件分明聞奏。當議獎擢。或在任貪猥。誅戮生靈。公事不治。爲政怠惰。亦加懲罰。其州縣官任滿三考。卽具關申送吏部格式。候敕除銓注。其本道不得差攝官替正授者。從之。

天成元年十二月十九日敕。尙書吏部侍郎裴暉所請。刺史三考。方可替移。免有迎送之勞。若非歲月積深。無以彰明臧否。自此到任後。政績有聞。卽當就加渥澤。如或爲理乖謬。不計月限。便議替除。

三年五月勅。刺史以二十五月爲限。仍以到任日爲數。

四年六月。左散騎常侍蕭希甫奏。請條流縣令。凡死罪已下得專之。刺史部內有犯死罪一人得專之。觀察使部內有犯死罪五人已下得專之。敕。刺史旣爲屬部。安可自專。案牘旣成。須申廉使。餘依所奏。

應順元年三月二十日勅。刺史縣令丞尉得替。自今後如是見任官。將已分錢物。資送得替人。卽勿論。其或率斂吏民。以受所監臨財物論。加一等。如以威刑率斂。以枉法論。其去任受財人。減二等。

周廣順二年八月勅。今後刺史縣令。顯有政能。觀察使審詳事狀聞奏。朝廷當議獎擢。百姓僧道。不得舉請。一切止絕。

縣令上錄事參軍附

梁開平四年四月敕天下諸州鎮使官秩無高卑在縣令之下。

乾化二年三月詔曰夫隆興邦國必本於人民惠養疲羸尤資於令長苟選求之踰濫固撫理之乖違如聞吏部擬官中書降授或緣親舊所請或爲勢要所干姑徇私情靡求才實念茲蠹弊宜舉條章今後應中書用人及吏部注擬並宜省藩身之才業驗爲政之臧否必有可觀方可任用如或尙行請說猶假貨財其所司人吏必加推窮重加懲斷。

後唐天成元年八月勅中書先條奏州縣令錄正衙謝後合趨內殿謝辭者如令錄是除授宜令給事中引對。如是指授者準舊例委三銓尙書侍郎各自引對仍須前一日閣門進狀。

三年九月十九日勅近聞藩鎮幕職內或有帶錄事參軍兼鄴都管內諸州錄事參軍從前並兼防禦判官設官分職激濁揚清若網在綱各司其局督郵從事兼處尤難沒階則賓主之道虧下榻則軍州之禮失須從改革式振紀綱宜令今後諸州府錄事參軍不得兼職如或才堪佐幕節度使須具聞奏不得兼錄事參軍鄴都管內刺史州不合有防禦判官之職今後改爲軍事判官如刺史帶防禦團練使額卽得奏署防禦團練判官仍不得兼錄事參軍如此則珠履玳簪全歸客禮提綱振領不紊公途仍付所司。三年二月二十三日中書奏應天下縣令逐年夏秋兩稅徵科公事伏以縣令之職徵賦爲先若違限逋懸自有罰責如及期了畢不謂功勞況今無疆名之科徭絕虛係之稅額百姓據見苗輸納官中有指限

程期。蓋緣每及徵科事歸煩擾。未容輸納。已切催驅。州郡則推勘吏人。縣邑則禁繫人戶。雖云提舉責在徵求。動涉旬時。固須妨事。縱及期限。倍困黎民。自今後請祇委主簿縣令句當。不得更置監徵。每一州之中。止限畢日。委錄事參軍磨勘。取最後逋欠縣分。具令佐名銜。申三司使舉奏。明行責罰。其所欠稅額。如是本道長吏及判官衙內節級。并形勢莊田。不伏縣司徵督者。縣令卽須自經本州論列。如依前不納。便可直申三司責罰之時。以定輕重。其縣令到官之初。須准迎勅交割戶口帳籍。至受替之時。比較多少。如或增多。卽量加酬獎。致逋竄。則別示科刑。所冀賞罰不涉於過差。公務率歸於修舉。其本判官都孔目官糧料使等職。固不在親入公事。止於提舉。每至徵科之日。皆須一例獎勸。或有徵督逋。縣令佐獨當之。伏請今後凡是徵科畢日。比較功過。只歸令佐。如是一郡之內。諸縣皆及期程。公事修舉。其錄事參軍亦請量加甄獎。如管內諸縣。併有闕遺。其錄事參軍亦請量加責罰。從之。其年八月二十五日及十月十五日勅。條流公事數內一件。縣令化洽一同。位居百里。在專勤課。撫育疲羸。苟或因循。是孤委任。宜令隨處州府長吏。逐縣每年考課。如增添得戶稅最多者。具名申奏。與加章服酬獎。如稍酷虐。輒恣誅求。減落稅額者。並具奏聞。當行朝典。其縣令仍勒州司批給解由。歷子之時。具初到任所交得戶口。至得替增減數額。分時批鑿。將來除官及參選。委中書門下併銓曹磨勘。宜令三京及諸道州府準此。

四年五月五日。戶部奏三京鄴都諸州府逐年所徵夏秋稅租。兼鹽麴折徵諸般錢穀。先定格流如後。一

若限滿後十分中係欠三分已上者。本判官罰五十直。錄事參軍罰七十直。本曹官罰五十直。縣令罰一百直。勒停簿尉罰七十直。攝開官州縣押司錄事本典及鄉里正孔目書手各徒二年。仍配重役。本孔目句押官典杖七十。都孔目官句押官杖六十。並退職。衙前收管。一若限滿後十分中係欠二分者。本判官罰三十直。錄事參軍罰五十直。本曹官罰四十直。縣令罰七十直。移攝開官簿尉罰五十直。州縣押司錄事本典及鄉里正孔目書手等杖八十。本孔目官句押官典等杖六十。孔目官句押官笞五十一。限滿後十分中只欠一分已下者。本判官罰二十直。錄事參軍罰三十直。本曹官罰二十直。縣令罰五十直。簿尉罰四十直。州縣押司錄事本典及鄉里正孔目書手等杖七十。本孔目句押官各罰五十直。以上所立條件。若是本判官錄事參軍本曹官孔目句押官典等。即取一州都徵額上比較。其縣令簿尉及典押以下。即將本縣欠數比較。一所徵夏秋兩稅。依省限了絕者。本判官典申奏。改轉官資。錄事參軍縣令申奏。與量留一年。或界分已滿去。即轉兼官。如一任之內。稅賦不牽。即奏加章服。若是攝官。亦委本處長史。更令攝任一年。如更立勞能。具狀申省。以憑申奏。必降真命。本曹判司簿尉。即申奏請減兩選。或一任之內。稅租總了絕。或是攝官。委逐處申省點勘聞奏。別行獎酬。州府都孔目官句押官本孔目句押官典等。以軍職轉選。其都孔目官句押官。如已至押衙職名。或舊有官資。亦議申奏獎酬。州司并逐縣徵科典押。每處與賞錢三十貫。均勻分俵。

長興元年七月勅訪聞諸道州府縣官自徇虛名不惜人戶皆於省限前行帖催驅須令人戶貴買充納此後徵科事辦亦不酬勞本處不得申奏如違限稽慢卽准條流責罰如添得廨宇招得流民無害於公私者當以名聞特行恩獎

二年八月二十三日諸道奏薦州縣官前銜內有賜紫金魚袋者奉長興元年九月十七日勅州縣官若循常例十六考方得敍緋儻或已佩金章固難卻爲令錄必若藉其才器則可別任職資須協通規免踰定制宜令今後諸道州府不得以著紫宜身奏薦爲縣官者奉勅文資官階銜內已有紫金尙不許卻爲州縣官其武職銀青階銜亦宜條理宜令諸道州府自此詳文資賜紫例不得更以帶武職銀青階銜奏薦爲州縣官員仍付所司

五代會要卷二十

縣令下錄事參軍附

晉天福五年六月二十日。詳定院奏。准刑法統類。大中二年正月三日勅。天下州府官吏犯賊。皆遞相蒙蔽。不肯發明。縱有申聞。百無一二。自今後管內縣令有犯賊事發。州府不舉者。連坐。錄事參軍有賊犯。刺史不舉者。連坐。刺史有賊犯事發。觀察使不舉者。連坐。廉使又準大中二年二月十七日。刑部起請。今後縣令有賊犯。錄事參軍不舉。錄事參軍有賊犯。刺史不舉。刺史有賊犯。觀察使不舉。其所司奏聽勅旨。臣等參詳設縣司本典。知情並同罪。告事人放三年租稅差徭。仍將放免數。卻配蓋藏罪。其錄事參軍不舉者。請減縣令所犯罪二等。勅起今後如有縣令犯賊。錄事參軍知而不舉者。宜准勅文處分。不知者不在此限。

八年三月十八日勅。諸道州府令佐。在任招攜戶口。比初到任交領數目外。如出得百戶以上。量添得租稅者。縣令加一階。主簿減一選。出二百戶以上。及添得租稅者。縣令加兩階。主簿減兩選。出三百戶以上。及添得租稅者。縣令加兩階。減兩選。別與轉官。主簿加兩階。減一選。出四百戶至五百戶以上。及添得租稅者。縣令加朝散大夫階。超轉官資。罷任後許非時參選。仍錄名送中書。如已授朝散大夫。及已出選門。

者。卽別議獎酬。主簿加三階。其出剩不及一百戶者。據戶口及添租稅數。縣令加一階。參選日超一資。注官。主簿加一階。如是一鄉收到三十或五十戶以上。一村收到三戶五戶以上者。及本鄉村節級等。與免本戶二年諸雜差使科配。如是一鄉收到一百戶以上。一村收到十戶以上。本鄉村節級等。與免本戶三年諸雜差徭。如願且充節級。所由未得差替。如願歸農。便與免放。仍仰本縣准勅。分明給與憑據。自災沴已來。戶口流散。如歸業者。切在撫安。其浮寄人戶有桑土者。仍收爲正戶。其歸業戶。天福五年已前逃移者。放一年夏秋租稅。并二年諸雜差遣。天福七年已前逃移者。放一年夏秋一半租稅。并放一年雜差遣。其剋收戶。如先有租稅。卽依元額輸納。如元無租稅。卽據所營地畝。且收半稅。并放二年差徭。如鄉村妄剋戶。及坐家破逃亡者。許人糾告。勘責不虛。其本府與鄉村所由。各決脊杖八十。刺面配本處牢城執役。縣司本典知情。並同罪。告事人放三年租稅差徭。仍將放免數。卻配蓋藏。剋戶及坐家破逃戶。本鄉所由。均分輸納。今後天下州縣。所收新添戶口租稅。限十二月二十日以前。申送戶部點檢。如違限。本處判官錄事參軍。罰五十直。仍削一級。孔目官。句押人。本案人吏。杖七十。降一資。

周廣順元年二月勅。今後應諸道州府錄事參軍判司縣令主簿等。宜令本州府以到任月日。旋具申奏。及報吏部。此後中書及銓司。以到任月日用闕。永爲定制。其見在州縣官。限勅到。仰便具先到月日。一齊分申及報吏部。其有諸色事故及丁憂。并請假十旬滿闕。亦仰旋具申奏。兼報吏部。其新授官。準令式給。

程限外。如不到任參上。致本處無憑申奏到任月日。便仰吏部同違程不上。收闕使用。其諸色見闕。亦不得差官權攝。輒便隱留。如違敕條。罪在本條官錄事參軍孔目官以下。其年八月勅。起今後秋夏徵賦。省限滿後十分係欠三分者。縣令主簿罰一百直。勒停錄事參軍本曹官。罰七十直。殿兩選。孔目官罰七十直。降職。次本孔目官。旬押官典決停。本判官罰七十直。若係欠三分以上。奏取進止。係欠三分以下者。等第科斷殿罰。其州縣徵科節級所由。委本州重行決責。其本判官錄事參軍本曹官孔目旬押官典。卽取一州上比較。縣令主簿。卽取本縣都徵上比較分數。應州縣令錄佐官。在任徵科。依限了畢者。至參選日。四選已上者。減一選。不及四選。卽與轉官。其年九月勅。應州縣所招添到戶口課績。自今日以前罷任者。並準晉天福八年三月十日敕施行。其漢乾祐三年七月二十五日勅不行。起今後罷任縣令主簿。招添到戶口。其一千戶以下縣。每增添滿二百戶者。減一選。三千戶以上縣。每三百戶減一選。其四千戶以下縣。每四百戶減一選。萬戶以下縣。每五百戶減一選。并所有增戶口及租稅。並須分明於歷子解由內錄都數。若是減及三選以上。更有增添及戶數者。縣令與改服色。已賜緋者。與轉官。其主簿與加階轉官。顯德五年十月詔。淮南諸縣令。仍舊兼知鎮事。從江南之舊制也。

簿尉

後唐長興四年五月勅。諸道馬步判官。不得差攝官。如闕人。須於前資正官判司簿尉中。選性行平允者。

補授。

中外加減官

梁開平元年四月勅開封府錄事參軍及六曹椽屬宜各置一員兩畿赤縣置令簿尉各一員。

二年十月省諸道州府六曹椽屬存戶曹參軍一員通判六曹。

後唐同光元年十一月中書門下奏諸寺監各請只置大卿監少卿監祭酒司業各一員博士兩員其餘官屬並請權停唯太常寺事關大禮大理寺事關刑法除太常博士外許更置丞一員其王府及東宮官屬司天五官正奉御之類凡不急司存並請未議除授其諸司郎中員外郎應有雙曹處且置一員左右散騎常侍諫議大夫給事中起居郎起居舍人補闕拾遺各置一半三院御史仍委御史中丞條理申奏即日停罷朝官仍各錄名銜具罷任月日留在中書候見任滿二十五日並據資品卻與除官從之。

二年三月勅其先減省員官除已別授官外左散騎常侍李文矩等三十人宜卻復舊官太子詹事石瓘五人宜以本官致仕將作少監岑保嗣等一十四人候續勅處分其年四月三銓奏準本朝故事州府官員府有司錄事參軍外置工曹倉曹戶曹法曹兵曹士曹六員州有錄事參軍外亦置六曹縣置令丞主簿各一員尉三員分判公事自後除兩京外都督府及諸州各置戶曹一員餘四員並省縣置令主簿各一員丞尉並省除合格選人外有郊天行事人數倍多況州官事簡椽曹請依舊只置兩員縣局務繁請

添佐官一員。其間有尉無簿者。請添置主簿一員。其赤縣次赤縣畿縣次畿縣。並準此除四京外。其判司只置司戶司法兩員。從之。

四年三月勅。三川涇鳳秦隴等州縣。官置數目絕多。其上佐官。自少尹以下。依本朝舊制。各具在任員闕。申奏。其州準近勅。置錄事參軍司戶參軍各一員。縣置縣令主簿各一員外。錄事官並停。其餘替選任。一準三銓常式。時初平僞蜀故也。

周顯德五年十一月勅。兩京五府少尹司錄參軍。先各置兩員。今後各置一員。六曹判司內。只置戶曹法曹各一員。其餘曹官及諸州觀察使兩藩判官。並宜省廢。

量戶口定州府等第

周廣順三年十一月勅。天下縣邑。素有等差。年代既深。增損不一。其中有戶口雖衆。地望則卑。地望雖高。戶口至少。每至調集。不便銓衡。宜立成規。庶協公共。應天下州府及縣。除赤縣畿縣次赤次畿外。其餘三千戶以上爲望縣。二千戶以上爲緊縣。一千戶以上爲上縣。五百戶以上爲中縣。不滿五百戶爲中下縣。選人資敍。合入下縣者。許入中下縣。宜令所司。據今年天下縣戶口數。定望緊上中下次第。聞奏。吏部格式。據戶部今年諸州府所管縣戶數目。合定爲望縣者六十四。緊縣七十。上縣一百二十四。中縣六十五。下縣九十七。欲依所定移報銓曹。從之。

州縣望

京兆府醴泉縣後唐長興元年五月勅京兆雲陽縣富平縣三原縣後唐天成二年七月敕富平等三縣

元屬邑降為望縣宜依河南府新安縣後唐天成二年二月升為應州金城縣鴈門縣混源縣寰清縣唐

舊為次赤且屬耀州天成四年九月勅升應州為望州金城鴈門為望縣曹州濟陰縣後唐天成四年十一月涇州平涼縣慶

混源為上縣寰清為次縣以明宗潛龍鄉里故也州司川縣安州吉陽縣晉天福二年正月尚書吏部奏自清泰三年鄭州管城縣顯

德六年十月升為新鄭縣周顯德元年八月升為後唐天成三年十二月勅真定府屬縣準河中鳳翔例升為次畿真定縣升為次赤

晉天福二年正月勅應京畿及諸州縣舊有唐朝諸帝陵并真源等縣並不為次赤卻以畿甸緊望為定

其逐縣令不得以陵臺結銜考滿日仍依舊出選門官吏處分隔任後卻據資格準格例施行

開運二年六月吏部奏其四輔州鄭汝州仍舊為輔州同華州準敕既廢雍京不合為輔州欲定為望州

滑州曹州比類近京欲升為輔州從之

州縣分道改置

後唐長興三年四月中書門下奏據十道圖舊制以王者所都之地為上本朝都長安以關內道為上今

宗廟宮闕皆在洛陽請以河南道為上關內道為二河東道第三河北道第四劍南道第五江南道第六

後唐長興三年四月中書門下奏據十道圖舊制以王者所都之地為上本朝都長安以關內道為上今

淮南道第七山南道第八隴右道第九嶺南道第十從之

河南道

滑州。酸棗縣。長垣縣。梁開平三年二月割隸汴府。後唐同光二年二月酸棗縣割隸開封府。鄭州。中牟縣。陽

武縣。梁開平三年二月割隸汴州。後唐同光二年二月割隸開封府。襄邑縣。後唐同光二年二月割隸汴州。

州。晉天福三年十月開平二年二月割隸汴州。後唐同光三年二月割隸開封府。鄆陵縣。梁開平三年二月割隸汴州。

年。二月。鄆陵縣。開平三年十月並割隸開封府。陳州。太康縣。梁開平三年二月割隸汴州。後唐同光三年

府。單州。楚邱縣。梁開平四年四月。碭山縣。後唐同光二年二月割隸汴州。後唐同光三年二月割隸開封府。

襄城縣。後唐同光二年十二月。租庸使奏二縣元屬汝州。今隸臨汝縣。周顯德三年三月廢密州。輔唐縣。梁開平二

縣。晉天福七年七月改爲膠西縣。避國諱也。濟州。兗州。任城。中都。單州。金鄉。等縣。隸之。至其年十二月。又

割鄆州。鄆城縣。隸之。濱州。爲上直屬京。割棣州。勃海。蒲臺。兩縣。隸之。

關內道

京兆府。奉先縣。梁開平三年二月割隸京兆府。武功縣。好時縣。後唐長興元年五月勅併渭南縣。周顯德

月。割屬同官縣。唐開平三年三月割隸京兆府。美原縣。後唐同光三年。華州。洛南縣。河中府。同光三年六月

澄城縣。僞梁割屬當府。其澄城縣。今請郤屬同州。韓城。郤陽。縣。隴州。汧陽縣。汧源縣。吳山縣。後唐長興元年

割隴州涇州平涼縣後唐清泰三年正月涇州奏平涼縣自吐蕃陷渭州權于平涼縣為渭州理所途罷平涼縣又安國權武兩鎮兼屬平涼其賦租節目並無縣管今請卻置平涼縣管安國隴州涇州平涼縣後唐清泰三年二月原州刺史翟建奏本州自陷吐蕃權於臨涇縣為理所臨涇原屬耀武兩鎮臨涇縣後唐清泰三年二月原州刺史翟建奏本州自陷吐蕃權於臨涇縣為理所臨涇原屬入戶從之臨涇縣涇州刺史只管捕盜其人戶即涇州管縣既無屬縣刺舉何施伏乞割臨涇屬當州從之

河東道

絳州梁開平四年四月割隸晉州後唐絳州限州後唐同光二年儀州梁開平三年閏八月勅兗州管內六年七月并沁州割隸太原州解州河中府聞喜安邑解三縣為屬邑河中府稷山縣後唐同光二年州作城縣呂香縣周顯德三年三月降

河北道

鎮州後唐同光元年四月改為北幽州北平縣後唐長興三年八月滄州長蘆縣乾符縣周顯德三年十月無棣縣周顯德五年高縣周顯德六年二月武水縣周顯德三年十月深州博野縣周顯德四年五月澤州梁開平二年六月割隸河德州晉就長河縣為理所至晉開運二年九月移就滿城縣至陽四年二月卻隸潞州河德州移就長河縣為理所至晉開運二年九月移就滿城縣至周廣順二年二月廢州雄州霸州周顯德六年五月大成二縣隸之地望並為中州時初平關南故也

劍南道

蜀州唐興縣梁開平二年八月改為陶胡縣後彭州唐昌縣梁開平二年十月復為唐昌縣後

江南道

杭州臨安縣梁開平二年正月福州閩清縣梁乾化元年十月蘇州吳江縣梁開平三年閏八月兩置縣明州望海縣梁開平三年閏處州松陽縣梁開平四年五月秀州晉天福三年十月兩浙錢元全州晉天福四年四月奏以湘川縣置州仍置清湘縣并割澧陽縣隸之

淮南道

壽州周顯德四年移于頂州下蔡縣仍以壽春縣盛唐縣梁開平二年八月改為潞山縣下蔡縣為倚郭以舊壽州為壽春縣後唐同光元年十月復為盛唐

山南道

復州梁乾化二年十月割隸荆南後唐天成二年五月果州後唐天成二年唐州慈邱縣周顯德三年鄧州臨湍縣漢乾祐元年正月改菊潭縣向城縣周顯德三年商州乾元縣漢乾祐二年六月改襄州樂鄉縣周德六年二月并入宜城

隴右道

秦州天水縣隴城縣後唐長興三年二月秦州奏見管長道成紀清水三縣外有十一鎮徵科並係鎮將赤砂鎮復置舊天水縣其白石大澤良恭三鎮割屬長道縣從之成州同谷縣栗亭縣後唐清泰三年六月秦州奏階州元管同谷縣餘並是鎮便係

徵科今欲取成州西南近便鎮分併入同谷縣其東界四鎮別創一縣者州西南有府城長豐魏平三鎮其地東至泥陽鎮界二十五里北至黃竹路金沙鎮界五十里南至興州界三十里西至白石鎮界一百一十里西南至舊階州界砂地嶺四十五里其三嶺管界並入同谷縣廢其鎮額州東界有勝仙泥陽金沙栗亭四鎮東至鳳州姜瞻鎮界十五里南至果州界二十里北至高橋三十五里西至同谷界三十五里北至秦州界六十七里欲併其四鎮地於栗亭縣其徵科委縣捕盜委鎮司從之

嶺南道

潘州茂明縣梁開平元年五月改爲越常縣至桂州純化縣梁開平元年五月改爲歸化縣後邕州晉天年七月改爲溥州晉開元三年三月升桂州全義縣爲州仍改全義縣爲德昌縣誠州避廟諱溥州并割桂州臨川廣明義寧等三縣隸之從湖南馬希範奏也

選事上

後唐同光二年八月。中書門下奏。吏部三銓下省。南曹廢置。甲庫格式。流外銓等司公事。並繫長定格。循資格。十道圖等格式。前件格文。本朝勑立。檢制姦濫。倫敍官資。頗謂精詳。久同遵守。自亂離之後。巧僞滋多。兼同光元年八月。車駕在東京。權判南曹工部員外郎盧重本。司起請一卷。益以興復之始。務切懷來。凡有條流。多失根本。以至多集。赴選人。并南郊行事官。及陪位宗子。共一千三百餘人。銓曹檢勘之時。互有援引。去留之際。不絕爭論。若又依違。必長訛濫。望差權判尚書省銓左丞崔沂。吏部侍郎崔貽孫。給事中鄭韜光。李光序。吏部員外郎盧損等。同詳定舊長定格。循資格。十道圖。務令簡要。可久施行。從之。天成二年三月二十四日。銓司奏。據南曹駁放選人。累經銓及經中書門下論訴。準堂判具新舊通格年。

限。分析申上者。伏以選人或有出身。或因除授。各拘常例。方赴調集。多因遠地兵戈。兼以私門事故。遂致過格。固非願爲。新條標在七年。舊格容於十載。臣等參詳其選人過格年限。伏請且依舊格。不問破憂。停集本數。過格十年外。不在赴選之限。從之。其年十二月二十九日。中書門下條流。應諸道選人等。選人中。有過格年深。無門參選者。準天成二年十月二十三日德音。並委吏部南曹磨勘。如實曾阻兵戈者。許令注擬。如或詐稱。不在此限者。凡是選人。專思合格。不肯固踰選限。自滯身名。縱阻干戈。須在州縣。有應過格人等。仰吏部南曹。子細磨勘。曾阻兵戈州府去處。或曾假攝。卽有隨處文牒。一一詣實。卽便送銓司。亦須參詳。先授告身攝牒。及審驗年貌。方可注擬。參銓注擬。自有常規。從前或有宰臣占著好州縣官員。闕不令銓曹注授。今年應是元闕。並送銓曹。候移省之時。若有好闕尚在。必議勘尋。其請託及受囑人等。當行黜責。選人之內。族類甚多。歷任之中。資考備在。應南暫判成人等。仰三銓各據逐人出身。入仕文書。一比驗年貌。灼然不謬。方與注官。據長定格。選人中有隱憂者。殿五選。伏以人倫之貴。孝道爲先。既有負于尊親。定不公于州縣。有傷風教。須峻條章。今後諸色官員。內有隱憂冒榮者。勘責不虛。終身不齒。所有入仕已來告勅。並赴所司焚毀。從之。

五代會要卷二十一

選事下

後唐天成三年正月十七日。吏部格式司申當司先準敕及堂帖指揮。應焚毀告身勘同及墜失文書等。請重給告身。仍先檢敕甲。如無敕甲。卽取同敕甲告身。勘驗同。卽與出給。若是本朝授官。及同光元年後授官。勘驗同。卽與告身。如是僞朝授官。勘驗不虛。亦與出給。公憑便同告身例處分者。伏以再給文書。實爲難重。有司考驗。務在周防。當司近曾申堂。請出給告身公驗。旋具選人出身歷任行止。牒甲庫永爲證明。奉判申其所進。取到選人授官敕甲。或同敕甲告身。勘驗既同。須準前指揮出給。見有敕甲者。便須注出給事。由年月日。若不批注。慮恐選人卻爲失墜。告身參選。刺檢敕甲文書浩大。所司難爲一一考驗。如是引驗同敕甲人。告身出給。又慮佗後卻將前來失墜。告身赴選。甲庫無憑應驗。其同敕甲人。告身欲於後面粘紙。亦須使印批注。仍牒報南曹。以憑將來檢勘者。仍全具出給告身公驗聞奏。其年五月。敕先準同光二年十二月勅。北京及河北諸道攝官內。有御署一任。簡牒分明。前銜先有正官告身者。便與據正官資敍。依資授一任官。其無正官告赤者。與黃衣初任官。與兩任已上簡牒分明。兼有正官告赤者。特與超資授一任官。其無正官告赤。亦只有兩任三任簡牒者。與據從黃衣第二任官。從各領取近罷攝任處。

州府文解任詐非特赴選者前件攝官等當任使之際共副憂勤及開泰之期豈宜升降凡有先皇帝御署兼朕署攝簡牒每一任同一任同官赴任日依資注擬宜令諸道州府知委餘准元敕處分

四年五月十五日敕今後應前資州縣官有出身及兩除官可依常調赴選兼有莊宗并朕御署亦準近敕赴選其一任除官未入選調若無定制難以進身宜約所守官資序高卑許令同有出身人合格年限求官赴京日仍須本道申送其解由考牒罷任年月分明別與除第二任官兩除後便准常調選人例如藉才升擢不在此限

長興元年五月敕應除授州縣官引見磨勘須召命官三員爲保然後奏擬仍於告身內豎保官名銜據本官所通三代并出身無出身歷任告赤逐任告數若是本朝及僞朝所授者祇於將來新告身內一收豎如告赤文書自中興以來或有失墜卽須於失處州縣投狀具三代名諱及出身歷任請公憑赴京勘會甲庫同卽重與出給如或公然拆破印縫不計與人不與人將來事並合焚毀其本人當行極典自茲凡受新命並依此例施行其見內外文武朝臣及諸司職守諸州府判官并軍州職員有曾改名所授本朝及僞署官告勅牒歷任文書亦須送納入官祇以中興已來文書敘理其見任州縣及諸色前資官等所有歷任文書亦仰速便送納委所司點勘無違礙則準前收豎給與公憑聽來求事參選其秦王茂正墨制官員並須得本道覆驗具歷職申奏所司點勘不虛亦給與公憑將來降資授官仍限一周年內

改正。其興元已西。曾受僞蜀爵命。緣地里遙遠。許勅到後一周年爲限。仍各於本罷任處州府投狀。具三代名諱出身歷任。一一分析申奏。到日點勘。準前指揮。如出限外。縱有申送文書。並不敘理。兼諸道亦不得以此身名奏薦。如違。罪在本判官。其本人別加嚴斷。

二年正月勅。吏部南曹奏。前齊州臨邑縣令趙誣等十八人。納到歷任文書。合給公憑者。其公憑仰所司以綾紙脩寫。取本行尙書侍郎列署。已出給者。候將來赴選。依此重給。其年五月二十六日。中書奏。吏部南曹狀申。準勅換給諸色官員告身公憑。伏緣點檢選人歷任文書中。其間多有違礙事節。若旋具姓名申覆。竊恐人數繁多。互有陳論。遂成壅滯。當曹不敢施行者。中書據南曹所申。逐件條流如後。一據申選人納到今任文書。多於解由。及歷子內批書考第。準天成四年四月二十一日勅。新格已前。卽許施行。自新格已後。多有解由歷子內批豎考數。本處元不給到考牒。格前特許施行。甚爲優假。格後更聞違越。須重條流。今日已前。有此色選人。宜且與收豎。此後選人。如有解由及批得歷子無考牒者。殿一選。有批得歷子。無解由考牒。殿兩選。如祇有解由考牒。不批得歷子。殿三選。如無前項三件文書。並同有過停官。一據申諸色選新格下後批歷子後。時及五年者。不在磨勘之限。今有格前罰任。及新格下後罷任者。格下經六年七年。方批入仕歷子。或有全不批歷子。祇給到公憑。今日已前有如此者。特與磨勘施行。此後纔罷任一月內。須批給得解由歷子。違過一月。殿一選。過三月不批。給得者亦同有過停官。一據申應諸色承

出身及童子及第例是擡年陷歲兼幼補身應名引驗之時多有差異者。今日前已有此色人並須引驗辨認及召保官委是正身別無謬妄則與改正詣實年幾施行。此後更有此色身名並同謬濫處分。一據申河北諸色官員納到告赤文書例稱本據元不較考祇有解由河東河北及鳳翔已西不如選格須明告諭仍令吏部南曹各寫一本解由歷子考牒解狀式樣編下諸處。此後並須文書周備如今後公然違犯並準前殿選今日已前不在此例。一據申諸色前資官員告身今任入歷歷子或批到上任月日或是有名假故多無觀察使及刺史具銜押署祇有錄事參軍批署者選處長吏自此後並須依格文押署違者本人殿兩選其今日已前違程式者宜特與磨勘收豎一據申諸色官員歷官兩任至五任文書備足內有一任至兩任失墜前任解由或考牒歷子又無公憑及稱元不給得既別有公據自此但祇認中興已來所授告身為定其已前或有歷任稱失墜如是傳授他人有人糾告其所司點勘彰露並準累行勅命科罪今日已前失墜考牒解由歷子如有公憑者亦與收豎如無公憑將來選時特降資注官自此後選人更有失墜則須卻於本處具所失因由重具批給如違準前殿選一據申選人有今任文書備足祇歷子內批到上任月日不批得替罷任月日即別有解由或公據文書證據分明今日已前並準前項指揮收豎此後更有此色人並同有過停官右奉勅宜依吏部南曹具此分明曉諭及編下諸道州府應是選人各令知委如守官滿日未給得解由歷子文書隨等不得便令辭謝如逐處州府輒有邀難不便須

至出給。罪在本判官并錄事參軍。其年九月勅。應進策人等。若是選人。所進內一事可行。與減兩選。兩事減四選。三事已上。依資與官。如無選可減。及所欠選數則少。可行事件則多。據等第更優與恩獎。其諸色舉人。不在進策之限。

四年二月中書門下奏。諸道州府縣官。甚有闕員。前資官皆資考限。所宜振滯。以示推恩。若欠一選者。無選可減。親公事成資考者。宜優與恩命。未有資考者。準格施行。兩選三選者減一選。四選五選者減兩選。六選七選減三選。八選九選者減四選。十選十一選者減五選。十二選減六選。千牛進馬童子齋郎。宜準元和格處分。逾年後。竟以選人煩多。喧訴相接。乃追罷此勅。

四年五月中書奏。準長興元年二月二十一日南郊赦書。準長定格。應經學出身人。在任日雪得冤獄。許非時參選。超資注官。仍賜章服。今詳勅凡云冤獄者。所司推鞠。定罪不平。廻曲作直。已成案牘。或經長吏慮問。或是讎家訴冤。重經推訊。始見情實。迴死爲生。始名雪冤。仍須元推官典招伏情罪。本處檢案牘事。卽給與公據。便爲考牒。內豎出候。本官滿日。便準近勅。非時參選。若活得一人。超一資注官。二人已上。加章服。已有章服。加檢校官。如在任除冤雪獄外。限內徵科了絕。減得一選已上。或招添戶口一分已上。並許酬獎。如加至五品已上。許奏聽勅旨。如雖雪得冤獄。徵科達限。合殿選者。亦待殿選滿月。與敍雪冤之賞。或逃卻戶口。亦降等敍官。如本司小小刑獄。未經別司。縱能處斷。不得援例。從之。

應順元年閏正月。中書門下奏。準天成二年十二月勅節文。準長定格。應經學出身人。一任三考。許入下縣令。下州錄事參軍。亦入中下州錄事參軍。兩任四考。許入中下縣令。中州錄事參軍。兩任六考。許入上縣令。緊州錄事參軍。凡爲進取。皆有緣因。或少年便受好官。或暮齒不離卑任。況孤貧進士。或年四十始得經學。及第八年赴調。方受一官。於一任之中。多不成三考。再來赴選。年已蹉跎。有一生不至令錄者。若不改革。何以發揚。自此經學出身。請一任兩考。許入中下縣令。下州錄事參軍。勅其經學出身。一任兩考。元勅入下縣令。下州錄事參軍。今後更許入中下縣令。中州下州錄事參軍。一任三考者。於人戶多處州縣注擬。如於近勅內資敍無相當者。卽准格循資考入官。其兩任四考者。準二任五考例入官。餘準格調處分。

晉天福二年四月勅。今後諸州前資官州縣官等。若是資考已出選門。及一任除官。未入選門。并一考前丁憂。及活得冤獄。準元勅年限滿日。許經中書陳狀。當與檢看事理施行。此外須令並依前後勅格程限。赴吏部參選。或有公材異績。臨時賞擢。不在此限。其年九月。吏部銓奏。奉長興四年五月勅。應諸州府馬步判官。令於前資簿尉判司正官中選差。近日不多遵守。今後須於前資正官中任使。若滿二周年無遺缺者。與減二選。仍委本州府給與公憑。如欠三選已下者。仍便給與文解赴選。所司自前差攝官。充馬步判官。已二年無遺缺者。亦令本州府給與公憑。仍便申奏。更四年後。給與文解赴選。比擬初官。過一周年。

者。勅到後。宜令本州府別差前正官充替。清泰二年三月二十四日勅。停廢前資攝正官充馬步判官。其勅已封鎖不行。勅清泰二年三月已前。諸州府所差馬步判官有勤績者。宜準元勅赴吏部參選。不得於中書陳狀。

二月十二日敕。唐長興二年四月五日節文。應州縣官纔受新命。及到任一考前丁憂。服闋日便與除官者。此後應一考前丁憂州縣官等。服闋後準格赴選。不得於中書陳乞。

開運三年四月。吏部侍郎王易簡奏。伏見禮部貢院。逐年先書板榜。高立省門。用示舉人。俾知狀樣。臣欲請選人文解條例。各下諸州知委。南曹詳定解樣。兼備錄長定格。取解條例。各下諸州。如禮部貢院板樣書寫。立在州院門。每遇選人取解之時。各準條件遵行。仍依板樣給解。從之。

周廣順元年二月。吏部三銓奏。去年冬南曹判成選人三百八十一人。經十一月二十二日。兵火散失。磨勘了歷任文字。或有送納文書未抄。及取到南曹失墜公憑。銓司若依格例磨勘。恐選人訴論。今欲祇舉南曹失墜給到公憑。便與施行。從之。其年五月。中書門下奏。據司勳郎中許懸申。權主判吏部格式選人。皆稱直去年十一月內失墜告牒。雖尋舊式。有例檢行。竊緣官員上任日。祇憑告赤簽符。罷任之時。卽藉解由歷子。既失官牒。得以檢其勅甲。若無解由。難知真僞。今後請若無解由歷子考牒者。候牒本道州府。勘尋有何殿最。候回文。與陳狀。官員理事同。卽依牒申銓。取保再給憑由。從之。

三年五月勅。應前後出選門州縣官內。有十六考。敍朝散大夫階次勅令。并歷任中曾升朝。及兩使判官。五府少尹。罷任後一周年與除官。曾任兩藩營田判官。書記支使。防禦團練判官。罷任後一周年與除官。並許經中書陳狀。選期既近。不得依常選人例。更理減選。仍須批書歷子。請給解由。若是逃失戶口。降書考第。及顯有過犯。必行殿降。應諸色人過犯三選已上。及未成功開宿。引納家狀。慮成淹滯。今後纔南曹鑰宿後。先榜示選人。預納家狀。其合保文狀。使識官司使印。限開曹後兩日內。赴銓送納。須得齊足。如限內不納到家狀。保狀。試紙人。便具姓名落下。不在續納之限。據納到文狀。至十月二十二日。已前鑰銓。先準格例。鑰銓後。便榜示引驗正身。告赤文書。三引共九日。如三度引不至者。便落下銓司。今後鑰銓日。便牒示選人。至次日引驗正身。及告赤文書。限三日內三引畢。如不到者。便落下。每年南曹判成選人中。多有託故不赴銓引。銓司準格例伺候。須及三引計九日不至者。方始落下。今後有此色人。逐引不到。便據姓名落下。先準格諸色人三引畢後。齎使印保狀赴銓。併合保後令錄。重引驗合保。審其才術者。銓司欲三引後次日。重內引驗令錄。審其才術。及合保。如限內不至者。據姓名落下。銓司引驗後。本行準格勅。及將銓狀。歷任告赤文書。限三日內點檢。無違礙。具姓名關報。試判注擬。所有選人。歷任省。於未注官已前。寫帖送過院。選人所合注使員缺。鑰銓後。便具狀申中書門下。乞降指揮。應選人試判。今欲鑰銓內。預準勅於中書省。請印到逐人試紙。候點檢畢。開報名銜齊足。此日便定日試判三場。逐場次日申奏後。限兩

日內供納宣黃。次日乞降。可否勅命銓司。自前注擬諸色選人。準格三注。每一注內有不伏官者。限人三日內具狀通退。三注共九日者。銓司自今後第一第二注榜出後。各限次日內具通官文狀。便具姓名落下。第三注畢日開銓。不在開通官之限。三注共五日。準格銓司逐年二月二十五日送門下省畢。三月十五日過官資考丁憂課績。無選可減者。宜令自於吏部南曹投狀。準格磨勘。無違礙。申送中書門下。並與除官。其州縣恐虧損年限資序。願歸選門者。亦聽自便。如曾任推巡軍事判官。并諸出選門官。並據見任選數敘理。取解由赴集。依格勅磨勘。送中書門下。於銓司注擬前。先次除官。所有諸色尙選人。今後不得妄有陳乞。及不伏格勅理論功課。如違。當行舉勘。若特恩除授。擢才委任。不拘此例。

選限

周顯德五年正月十日勅。諸道幕府州縣。起今日正月一日後所授官。並以三周年爲限。閏月不在其內。其每年常調選人。及諸色求任人。取十一月一日已前。到京下納文解。及陳乞文狀。委所司依舊例磨勘。注授。至十二月上旬中並了畢。便令赴官。限二月終已前到任。若違程。本處不得放上。且舊官在任。如是無故違限。依格殿選。其有故違程者。須分明出給得所在憑由。許至前冬赴集。今年赴任者。不在此限。其特勅除授。及隨幕判官赴任。不拘日限。應授官人。至滿日。替人未到間。宜且令守本官。主張公事。依舊請俸。州縣亦不得差置攝官替下。如是遭喪停任。身故假滿。非時缺官之時。祇可差前資正官。及前有出身。

人承攝。如逐處無正官及有出身人。卽選清彊官承攝。仍依正官例。支與俸錢。具名聞奏。其年閏七月。吏部流內銓狀。申見行條件公事。銓司先準格例。南曹十一月末開宿。判成選人後。先具都數。申銓。銓司舉狀。便榜示選人。引納京諸司官使印家狀。及試判紙。三度榜引得齊足。方至十二月上旬內。定日鑱銓者。銓司若候南曹十月內畢。三月三十日進黃移省畢。三擬畢後省甲案。便於格式司。逐旋覆闕入官。過院修寫省歷。至十月十四日已前。牒送門下省畢。銓司門下省押定。牒到取兩日。祇候取判過堂。次日乞降可否堂帖。其黃甲限四日內修寫句勘印署。至十二月六日。牒送門下省。至十二月九日進黃畢。所有衙謝對敷。在格限內應行內諸司公事。或有干繫。申銓取裁。銓司便準勅格指揮。如銓司難議裁酌。卽申堂取裁。

五代會要卷二十二

吏曹裁製

後唐長興二年七月。吏部南曹奏前守鄆州盧縣令李玘。曾兩任秘書丞。一任國子毛詩博士。雖前任有升朝官。今任合準格五選集。敕應州縣官有曾在朝行。及曾佐幕。罷任後。準前資朝官賓從例處分。其帶省御已上。并內供奉裏行。及諸色出選門官。或降授令錄者。罷任日。並依出選門例處分。不在更赴常調。便與除官。兼州縣其間書得十六考者。敕格敍加朝散階。自此準出選門例處分。如不書得十六考。雖過朝散階。不在此例。

周顯德五年閏七月。吏部南曹狀申所行事件。畫一如後。一每年十月一日入選。限判曹員外郎。準例免常朝。一新起請十月一日。鑱曹磨勘。選至至開曹日。使具判成名銜榜示。及申中書門下申銓。兼牒門下省。一鑱內有違礙選人。準久例。至開曹日。曉示駁放。及申堂申銓牒臺刺省。課績官。準敕經曹投狀。不欠選限。及磨勘無違礙者。申送中書門下減選。諸色選人成資考丁憂。及過三年已上。準敕經曹投狀。磨勘無礙。申中書門下除官。一每年及第舉人。自於官誥院納官錢一千。買綾紙五張。并縹軸。於當曹寫印。縫給於官誥院。卻每人牒送朱膠錢三百到曹。支備銓中及當司公使。一官誥院牒送到朱膠錢一千內。

抽二百文刺送都省充抽貫錢。一每年及第舉人於省內試判二道後具判申堂及具成狀申銓團奏請定冬集。一齋郎挽郎請定冬集者當堂試判二道後申堂及申銓請團奏。一外州府牒到亡沒官姓名當曹使牒取官誥文書等批注亡沒年月一準格主掌逐年選人歷任家狀一本以備他年磨勘。一出給逐年三旬選人赴任歷子各一道判曹員外郎印署判銓侍郎通押後當曹使印繳連新舊告身文書等當曹出給特勅除官歷子據本官納到歷任家狀及新舊告身檢點同祇是判曹員外郎印押一鎖宿內具判成選人細銜申銓及牒門下省當曹旬勘銓司院寫錄團奏選人黃甲無差誤卽判曹員外郎署名及使印背縫一磨勘三旬選人及非時投狀人等並準例詳驗正身及取有官三人保明識官司使印文狀及勾當人狀如有疾病於成狀內收豎申送。

雜處置

後唐天成三年八月。中書舍人劉贊奏請令選人依舊試判從之。其年十二月勅選門官吏濫進者多。自今已後並令各錄三代家狀鄉里在朝骨肉先於南曹印署納吏部中書門下三庫各一本候得判印狀卽許所司給付新籤告兼本任處及鄉里亦具一本納逐處州縣。四年十月勅其諸道選人宜令三銓官員都在省子細磨勘無違礙後卽具格同商量注擬連署申奏仍不得準前於私第注官不分三銓注官自此始也其年十二月勅三銓公事宜準近敕指揮仍祇使吏部尙書銓印並宜付中書門下封送禮部權收管訖奏。

長興元年三月敕其判成諸色選人黃甲下後將歷任文書告身連粘宜令吏部南曹逐縫使印都於後面粘紙具前後歷任文書都記多少紙數兼具年月判成授官去處繳尾訖給付本人盧分假於人故也其年十月中書奏吏部流外銓諸色選先條流試判兩節並以優劣等第申奏文優者宜超一資注擬次者依資又其次者以同類官注擬理道全疏者以人戶少處州縣同類官中比擬仍準元敕業文者任徵引今古不業文者但據公理判斷可否不當罪在有司兼選人或有元通家狀內鄉貫不實候將來赴選並令改正一一依本屬鄉縣及有無出身一奏一除官等宜並不加選限從之其年十一月吏部南曹關試今年及第進士李飛等七十九人內三禮劉瑩李誥李守文明算宋延美等五人所試判語皆同尋勘狀稱晚逼試偶拾得判草寫淨實不知判語不合一般者勅貢院擢科考詳所業南曹試判激勸校官劉瑩等既不攻文合直書其事豈得相傳藁草侮瀆公場載考情由實爲忝冒及至定期覆試果聞自擅私歸且令所司落下其所給春關仍各追納放罪許後放舉自此南曹凡有人及第試判之時更效此者準例處分二年五月勅舉選之衆例自艱辛曾因兵火之餘多無敕甲不有詳延之路永爲遷棄之人其失墜告身者先取本人狀當授官之日何人判銓與何人同官上任與何人交代仍勘歷任處州縣如實卽刻取命官人三人保明施行

三年五月勅今後合格選人歷任無違礙者並仰吏部南曹判成如文解差繆不合式樣罪在發解官吏

其年十二月二日敕。準近勅。應前資朝官。及諸道節度觀察判官。罷任一周年後。許求官。其出選門官。雖准格例送名。未定別與除官年限。自此應除選門官等。罷任後。亦宜一周年後。許更除授。仍令於所司投狀磨勘。申送中書門下。

晉天福二年十月勅。選人試判二道。

三年敕。今後選舉人文解差謬。過在發解州府官吏。其選人舉人。亦準格處分。

五年三月。詔令四時聽選。吏部三銓擬官旋奏。不在團甲之限。

漢乾祐二年八月勅。今後諸色選人。年及七十者。宜注優散官。年少未歷資考者。不得任注縣令。

三年七月勅。吏部南曹。今後及已前。應有令佐。招添點檢出戶口據數。須本處合徵稅賦錢物數目。於解由歷子內。一一開坐批書。方得準天福八年三月十日勅條施行。如不合前後勅例。不在施行之限。

周廣順元年十月敕。選部公事。比置三銓。所有關員選人。分爲二處。每至注擬之際。資敘難得相當。況在今年。選人不多。宜令三銓公事。併爲一處。委本司長官同共判署施行。

甲庫

周顯德五年閏七月。吏部甲庫奏。見行公事。甲庫先有專知官一人。於長興二年停廢。後來於令史內。選差一人。承受主管諸雜制敕。及逐季抄錄。關報史館。所有選人受官。黃甲備錄。關送吏部。出給告身。及具

名銜關牒。送格式。收附員闕。準格出給授令錄。判司主簿籤符本官。每官納朱膠錢一百二十。依除內每貫二百。刺送都省。除外供應三銓及本司公使廢置。準勅格應內外官員亡父追贈。及南曹逐年駁放選人。準長定格節文。牒吏部選差五考已上諳事令史五人。共行詳斷。及州縣官名犯廟諱御名。並準格例改正。

制舉

周顯德四年十月詔曰。制策懸科。前朝盛事。莫不訪賢良於側陋。求讜正於箴規。殿廷之間。帝王親試。其或大裨於國政。有益於時機。則必待以優恩。縻之好爵。拔奇取異。無尙於茲。得士者昌。於是乎在。爰從近代。久廢此科。懷才抱器者。鬱而不伸。隱耀韜光者。晦而不出。遂致翹翹之楚。多至於棄捐。皎皎之駒。莫就於縻繫。遺才滯用。闕孰甚焉。應天下諸色人中。有賢良方正。能直言極諫。經學優深。可爲師法。詳閑吏理。達於教化者。不限前資。見任職官。黃衣草澤。並許應詔。其逐處州府。依每年貢舉人式例。差官考試。解送尙書吏部。仍量試策論三道。共三千字已上。當日內取文理具優。人物爽秀。方得解送。取來年十月集上都。其登朝官亦許上表自舉。先是兵部尙書張昭上章請設制科故有是詔

宏詞拔萃

後唐天成二年四月二日中書奏尙書禮部貢院申當司奉今月六日敕吏部流內銓狀申據白院狀申

當司先準禮部貢院牒稱據成德軍解送到前進士王蟾狀請罷設深州司公參軍應宏詞舉前件人準格例應重科合在吏部其王蟾并解送牒吏部請準例指縱者當司道具狀申堂奉判送吏部分析近年事例如何者伏緣近年別無事例今檢登科錄內於偽梁開平三年應宏詞登科二人前進士余渥承旨舍人李遇考官二人司勳郎中崔景員外郎張貽憲再具狀申堂奉判送吏部準例指揮其前進士王蟾請宏詞伏自近年以來無人請應今詳格例合差應考官二人又緣祇有王蟾一人應請銓司未敢奏請差官者奉中書門下牒奉勅宜令禮部貢院就五科舉人考試者伏以舉選公事皆有格調準新定格節文宏詞拔萃準長慶二年格吏部差考試官二人與知銓尙書侍郎同考試聞奏又準格節文內準太和元年十月二十三日勅應禮部諸色貢舉人及吏部諸色科目選人凡無出身及未有官祇合於禮部應舉有出身有官方於吏部赴科目選其請應宏詞舉前進士王蟾當年放及第後尋已聞過吏部乞若應宏詞侍南曹判成卽是科選之人以理合歸吏部況緣五科考試官祇考學業難於同考宏詞者奉勅王蟾宜令吏部準往例差官考試

長興元年八月三日尙書吏部據禮部貢院牒稱送到附試請應書判拔萃前虢州盧氏縣主簿張岫對六節判四通二麤準例入第五等上其所試判今錄奏聞奉敕宜付附所司今後吏部所應宏詞拔萃宜並權罷其貢院據見應進士九經並五科童子外諸色科名亦宜停罷

進士

梁開平三年四月。敕賜劉斤同進士及第。仍編入今年榜內第八人。其年五月。敕禮部所放進士薛均是。左司侍郎薛延規。男方持省轄。固合避嫌。其薛均宜令所司落下。

後唐同光三年三月。敕今年新及第進士符蒙正等。宜令翰林學士承旨盧質。就本院覆試。仍令學士使楊彥璠監試。其月。勅禮部所放進士符蒙正等四人。既慊羣情。實干浮議。詩賦果有疵瑕。若便去留。慮乖激勸。倘無升降。卽昧甄明。況王微體物可嘉。屬詞甚妙。桑維翰差無紕繆。稍有詞華。其王微升爲第一。桑維翰第二。符蒙正第三。成僚第四。禮部侍郎裴皞放。今後應禮部每年所試舉人雜文策等。候過堂日。委中書門下子細詳覆奏聞。

天成二年十二月。勅新及第進士。有聞喜宴。今後逐年賜錢四百貫。

五年正月二十三日。禮部貢院奏。當司準天成三年十二月十八日勅文內。準近勅自此進士試雜文後。據所習本經。一一考試。須帖得過三已上者。卽放及第者。奏勅進士帖經。本朝舊制。蓋欲明先王之旨趣。閱多士之文章。近代已來。此道稍墜。今且上從元輔。下及庶僚。雖百藝者極多。能明經者甚少。恐此一節。或滯羣才。旣求備以斯難。庶觀光而甚廣。今年凡應進士舉。所試文策及格。帖經或不及通三。與放及第。來年秋賦。詞人所習一本經。許令對義目多少次第。仍委所司條例聞奏。其今年本經內對義。義目五道。

考試通二通三準帖經例放入策。其將來秋賦諸寺監及諸州府所解送進士第亦準去年十月一日勅。考其詩賦義目帖由等並解送赴省。如或不依此解送當司準勅並不引送試。奉勅宜依。

五年二月九日勅。近年文士輕視格條。就試時疏於帖經。登第後恥於赴選。宜絕躁求之路。別開獎勸之門。其進士科已及第者。計選數年滿日。許令就中書陳狀。於都堂前各試本業詩賦判文等。其中才藝灼然可取者。便與除官。如或事業未甚精者。自許準添選。

長興二年二月勅。其進士並令排年齊入就試。至閉門試畢內有先了者。上歷□時□旋令先出。其入策亦須畫試。應諸科第對策。並依此例。其餘唯準前勅處分。

清泰二年九月。禮部貢院奏。奉長興二年二月勅。進士引試。早入晚出。今請依舊例。進士試雜文。并點門入省。經宿就試。從之。

周廣順三年正月。戶部侍郎權知貢舉趙交泰奏。進士元試詩賦各一首。帖經二十帖。對義五道。今欲罷帖經對義。別試雜文二首。試策一道。從之。至其年八月。刑部侍郎權知貢舉徐台符奏。請別試雜文二首外。其帖經對義亦依元格。從之。

顯德二年三月勅。禮部貢院奏。今年新及第進士李覃嚴說何儼武允成王紛閻邱舜卿楊徽之任惟吉趙鄰幾周度張慎微王翥馬文劉選程浩然李震等一十六人。所試詩賦文論策文等。國家設貢舉之司。

求俊茂之士務詢文行。以中科名。比聞近年以來。多有濫進。或以年勞而得第。或因謀勢以出身。今歲所貢舉人。試令看詳。未見紕繆。須至去留。其李覃、何儼、楊徽之、趙隣、幾等四人。宜放及第。其嚴說、武允成、王紛、閻、邱舜卿、任惟吉、周度、張慎微、王翥、馬文、劉選、程浩然、李震等一十二人。藝學未精。並宜黜落。宜令苦學。以俟再來。禮部侍郎劉溫叟。失於選士。頗屬因循。據其過尤。宜令譴謫。尙示寬恕。特與矜容。劉溫叟放罪。將來貢舉公事。仍令所司據條理奏聞。其年五月。尙書禮部侍郎知貢舉竇儀奏。其進士請今後省卷。限納五卷已上。于中須有詩賦論各有一卷。餘外雜文歌篇。並許同納。祇不得有神道碑誌文之類。其帖經對義。並須實考通三已上爲合格。將來卻覆畫試。候考試中場。其不及人以文藝優劣。定爲五等。取文字乖舛。詞理紕繆最甚者。爲第五等。殿五舉。其次者。爲第四等。殿三舉。以次者稍優。爲第三等。第二等第一等。並許次年赴舉。其所殿舉數。並於所試卷子。上朱書封送中書門下。請行指揮。及罪發解試官監官等。其諸科舉人。若合解不解。不合解而解者。監官試官爲首罪。勒停見任。舉送長官。聞奏取裁。監官試官如受賂。及今後進士。如有倩人述作文字應舉者。許人言告。送本處色役。永不進仕。同保人知者。殿四舉。不知者。殿二舉。受倩者。如見任官。停任。選人。殿三選。舉人。殿五舉。諸色人量事科罪。從之。

五年三月詔曰。比者以近年貢舉。頗是因循。頻詔有司。精加試揀。所冀去留無濫。優劣昭然。昨貢舉院奏今年新及第進士等。所試文書。或有臧否。爰命詞臣。再加考覈。庶涇渭之不雜。免玉石之相參。其劉坦、單

貽慶、李慶、徐緯、張觀等詩賦稍優。宜放及第。王汾據其文詞未至精敏。念以頃曾駁落。特與成名。熊若谷、陳保衡皆是遠人。深可嗟念。亦放及第。郭峻、趙保雍、楊丹、安玄度、張助、董咸則杜思道等未甚精者。並從退落。更宜修進。以俟將來。知貢舉右諫議大夫劉濤。選人不當。有失用心。可責受右贊善大夫。俾令省過。以戒當官。先是濤於東京放榜後。率先及第進士劉坦已下一十五人。來赴行在。且以所試詩賦進呈。上以其詞多紕繆。命翰林學士李昉復試。故有是命。

五代會要卷二十三

緣舉雜錄

梁開平元年七月勅。近年舉人。當秋薦之時。不親試者。號爲拔解。今後宜止絕。四月十一日。兵部尙書姚洎。知貢舉。奏近代設文科。選胄子。所以綱維名教。崇樹邦本也。今在公卿親屬。將相子孫。如有文行可取者。請許所在州府薦送。以廣毓材之路。從之。

乾化三年十二月。以尙書左僕射楊涉。知禮部貢舉。非常例也。前代自武德正觀之後。但委考功員外郎

士李涯所詆毀。由是中書奏請以禮部侍郎專焉。間或以他官領。多用中書舍人及諸司四品清資官。惟會昌中命太常卿王起主貢舉時。亦檢校僕射。

後唐同光二年十月中書奏請停舉選一年。勅舉選二門。國朝之重事。但要精確。難議權停。宜準常例處分。

天成元年八月勅。應三京諸道今年貢舉人。可依常年例取解。仍令隨處量事。津送赴闕。

三年七月四日。尙書工部侍郎任贊奏。今後伏請宣下諸州府。所有諸色舉人。不是家在遠方。水陸隔越者。逐處選賓。從官僚中。藝學精博一人。各於本貫一例分明比試。如非通贍。不許妄給文解。勅宜令今後諸色人。委逐處觀察使。慎擇其詞藝及通經官員。各據所業考試。及格者。卽與給解。仍具所試詩賦帖經。

通粗數。一一申省。未及格者。不得徇私發解。兼承前諸道舉人。多於京兆府寄應。例以洪固鄉貴胄里爲戶。一時失實。事久難明。自此各於本道請解。具言本州縣某鄉某里爲戶。如或寄應。須其本貫入狀。不得效洪固貴胄之例。文解到省後。據所稱貫屬州府戶籍內。如無名。本人并給解處。官吏必行重責。京百司給解就試。準前指揮。兼下貢院。其本朝舊格諸色舉人。每年各放幾人及第。到日續更詳酌處分。其年十月三日勅。每年訪聞及第舉人。牒送吏部。關試判題。雖有判語。全無祇見。各書未詳。仍或正身不至。如斯乖謬。須議去除。此後應關送舉人。委南曹官吏準格考試。如是進士并經學及第人。曾親筆硯。其判語卽須緝搆文章。辨明治道。如是無文章。許直書其事。不得祇書未詳。如關試時正身不到。又無請假字。卽牒貢院申奏停落。

四年七月中書門下奏。今年及第人。先曾守攝職官者。宜所司於守攝文書內。豎出應舉及第年月日。或改名不改名。分各印押。其中曾受正官銜署。并佐幕者。仍約前任資序。與除一任官。如自中興已來。諸科第人。曾受職官。並令所司追納文書。及到日。準今年及第人例處分。已受官者。不在此限。兼勒貢院。將來舉人納家狀內。各分析曾爲官及不曾爲官。改名不改名。其曾爲職官者。先納歷任文書。及第準例指揮。從之。其年七月勅。今年應新及第人。給春關。並於敷政門外宣賜。慮所司邀其年十月一日。中書門下條流貢舉人事件如後。一應諸道州府。解送諸色舉人。須準元敕。差有才藝公正官。考試及格。然後給解。仍

其所試詩賦義目帖由送省。如逐州府解內。不豎書前件指揮事節。所司不在引試之限。禮部貢院考試諸色帖經舉人。今後據所業經書對義之時。逐經須將生卷與熟卷中半考試。不得依徃例祇將熟卷試問。今後主司不得受內外官寮書題薦託舉人。及安排考官。如或實在知有才學精博者。任具奏聞。若受書題囑託。致有屈人。其主司與發書人。並加黜責。其所舉人。別行朝典。三銓南曹。亦不得受諸色官員薦託選人。如違。並準前指揮。應諸色落第人。此後所司具所落事由。別張文榜。分明曉示。除諸州府解送舉人外。餘有於河南府寄應。及宗正寺國子監生等。並須準上指揮。其中有依託朝臣者。于解內具言在某官姓名門館。考試及第後。並據姓名覆試。一應諸色舉人。至入試之時。前照日內。據所納到試底。本司印署訖。送中書門下。取中書省印印過。卻付所司。給散逐人就試。貢院合請考官試官。今後選學業精通。廉慎有守者充。如在朝臣門館人。不得奏請奉敕宜依。

長興元年六月中書門下奏。此後賓貢。每年祇請放一人。兼及第舉人放榜時。並須據才藝高低。從上依資安排。不得以隻科取鼎島嶽斗之名。兼不得呼春官爲恩門師門。不得自稱門生。除賜宴外。不得輒有率斂。別謀歡會。赴舉落第人。不得改名。將來舉人。並依選入例。據地里遠近。於十月中納文解。如違。不在受納之限。從之。

三年正月敕。今後落第舉人。所司已納家狀者。次年便赴貢院就試。並免再取文解。兼下納文解之時。不

在拘三旬。但十月內到者。並與收納。其年十二月三十日。禮部貢院奏。準會要長壽二年十月十日。左拾遺劉承慶上疏曰。伏見比年已來。天下諸州府所貢物。已至元日。皆陳在御前。唯貢人獨於朝堂列拜。伏請貢人至元日。列在貢物之前。以備充庭之禮。制曰。可。近年直至臨鑾院前。赴應天門外朝見。今後請令舉子復赴正仗。仍緣今歲已晚。貢士未齊。欲具見到人點引牒送四方館。至元日。請令通事舍人一員。引伸朝賀。列於貢物之前。或以人數不少。卽請祇取科解頭一人就列。其餘續到者。候齊日別另朝見。如蒙俞允。當司祇於都省點引習儀。奉勅。宜準元敕處分。餘宜依。

四年二月十六日。禮部貢院奏。今後試舉人日。請令皇城司公幹人。於省門外聽察。叫呼稱屈。及知貢院有倖門者。引赴皇城司勘問。如是的實虛妄。請嚴加科斷。兼今年放榜後。及第人看畢。便綴行五鳳樓前。列行舞蹈謝恩訖。赴國學謝先師。然後與知貢舉相識期集。祇候敕命。兼過堂及過樞密院。又舊例。侵晨張榜後。知貢院官及考試官。已下使出。請今年張榜後。知貢舉官并考試官。至晚出奉敕。宜令敕下後。於朝堂謝恩。卽赴國學。其試舉人日。宜令御史臺差人。聽其放榜日。知貢舉官送出。自此永爲定制。及第舉人過樞密院。宜不施行。

清泰二年九月。禮部貢院奏奉。長興元年敕。進士五經九經明經五科童子外。諸色科目並停。緣由有明算道舉人。今欲施行。又奉長興三年正月敕。每落第舉人。免取文解。今後欲依元敕格。請並再取解。十月

十五日到省畢。違限不收。又奉天成四年勅。諸色舉人。入試前五日納試紙。用中書印。印訖。付貢院司緣。五科所試場數極多。旋印紙。鑰宿內中書往來不便。請祇用當司印。從之。

三禮 三傳附 原闕

開元禮 原闕

明經 原闕

童子

晉天福五年四月。禮部侍郎張允奏。童子一科。伏請停廢。從之。

開運元年八月。復童子科。

周廣順三年正月。戶部侍郎權知貢舉趙上交奏。童子凡念書二十四道。今欲添念書通前五十道。念及三十道者。放及第。從之。

顯德二年五月。禮部侍郎知貢舉竇儀奏。其童子科。請依晉天福元年敕。停罷。任改就別科。赴舉。從之。

明法

後唐長興二年七月一日敕。其明法科。今後宜與開元禮科同其選數。兼赴舉之時。委貢院別奏。請會諸法試官。依格例考試。

晉天福六年五月十五日勅。明法一科。今後宜令五選集。合格注官日。優與處分。

周廣順三年正月。戶部侍郎權知貢舉趙上交奏。明法元帖律令各十五帖。對義二十道。今後罷帖律令。試墨義六十道。從之。至其年八月。刑部侍郎權知貢舉徐台符。卻準元格帖律令各十五帖。對墨義二十道。從之。

科目雜錄

後唐同光四年正月。五科舉人許維嶽等一百人進狀。伏見新定格文。三禮三傳。每科止放兩人。方今三傳一科五十餘人。三禮三十餘人。三史學究一十人。若每年祇放兩人及一人。逐年又添初舉。伏見咸通長慶年。放舉人元無定式。又同光元年春榜。亦是一十三人。請依元年例放人。敕從之。

天成二年正月二十七日。尙書禮部貢院奏。五經考試官。先在吏部日。長定格合請兩員數屬。貢院準新定格文。祇令奏請一員。兼充考試。伏緣今年科目人數轉多。卻欲依舊請考試官各一員。如蒙允許。續具所請官名銜申奏。奉敕宣依。

三年二月十日。禮部貢院奏。當司據鄉貢九經劉英甫。經中書陳狀。請對經義九十道。以代舊格帖經。奉堂判令詳狀處分者。當司伏準格文。九經祇帖九經書各一十帖。并對春秋禮記口義各一十道。今準往例。並不曾有應排科講義九經。若便據送到引試排科講義。即恐有違格例者。奉敕。劉英甫請以講義。便

代帖經。既能鼓篋而來。必有撞鐘之應。宜令禮部貢院考試。其年七月十三日敕。應將來三傳三禮三史。開元禮學究等考試。本業畢後。引試對策時。宜令主司於時務中。採取要當策題。精加考校。不必拘於對屬。須有文章。但能詞理周通。文字典切。卽放及第。如不及此格。雖本業粗通。亦須黜落。應九經五經明經帖書文格後。引試對義時。宜令主司於大義汎出。經問義五道。於簾下書試。祇令隔簾解說。但不失註疏義理。通二通三。然後便令念疏。如是熟卷。並須全通。仍無失錯。如得入簾。亦須於時務中。選策題。精加考校。如粗於筆硯留意者。則任以四六對。仍須理有指歸。言關體要。如不會於筆硯致功。卽許直書其事。申明利害。不得錯使文字。其義問念疏對策。逐件須有去留。

長興四年二月十六日。禮部貢院奏新立條件如後。一九經五經明經呈帖由之時。試官書通之後。有不及格者。喝落後。請置筆硯。將所納帖由。分明卻令自閱。或是試官錯書通。不當於改正。如懷疑者。便許請本經當面檢對。如實是錯。卽便于帖由上書名而退。一五科常年放榜出。多稱屈塞。今年並明書所對經義墨義云。第幾道不通。第幾道粗。第幾道通。任將本經書疏照證。如考試官去留不當。許將狀陳訴。再加考校。如合黜落。妄有披述。當行嚴斷。一今年舉人。有抱屈落第者。許將狀披訴於貢院官。與重試。如貢院不理。卽詣御史臺論訴。請自試舉人日。令御史臺差人。受舉人訴屈文狀。并引本身勘問所論事件。或知貢舉之官及考試之官已下。敢有受貨賂。升擢親朋。屈抑藝能。陰從請託。及不依格去留。一事有違。請行

朝典一懷挾書策。舊例禁止。請自今後入省門。搜得文書者。不計多少。準例扶出。殿將來兩舉。一遙口受人。迴換試處。及義題帖書時。諸般相救。準例扶出。請殿將來三舉。一藝業未精。準格落下。恥見同人。妄扇屈聲。擬爲將來基址。及他人帖對過場數多者。便生誣玷。或羅織毆罵者。並當收禁。牒送御史臺。請賜勘鞠。如知貢舉官及考試官。事涉私徇。屈塞藝士。請行朝典。若虛妄者。請嚴行科斷。牒送本道重處。色役仍永不得入舉場。同保人亦請連坐。各殿三舉。奉敕宜依。

周廣順二年二月。禮部侍郎趙上交奏。貢院諸科。今欲不試汎義。其口義五十道。改試墨義共十道。處分從之。

三年正月。戶部侍郎權知貢舉。趙上交奏。九經舉人。元帖經一百二十道。墨義二十道。今欲罷帖經。於諸經。墨義對一百五十道。五經元帖經八十帖。墨義二十道。今欲罷帖經。令對墨義一百道。學究元念書二十道。對義五十道。從之。至其年八月。刑部侍郎權知貢舉。徐台符又奏。九經請都對墨義六十道。其帖經對策。依元格。五經亦請對墨義六十道。帖經對策。依元格。從之。

五代會要卷二十四

樞密使

梁開平元年五月改樞密院爲崇政院。始命敬翔爲院使仍置判官一人自後不置判官置副使一人

二年十一月置崇政院直學士二員選有政術文學者爲之。始以尙書吏部郎中吳邁尙書兵部郎

後唐同光元年十月崇政院依舊爲樞密院。命宰臣郭崇韜爲樞密使亦置院使一人

晉天福四年四月以樞密副使張從恩爲宣徽使權廢樞密院故也。先是上以宰臣桑維翰兼樞密使懇

讓代之每有奏議多不稱旨又以處讓丁內憂乃以樞密院印付中書門下故有是釐革

開運元年六月依舊置樞密院其見在中書元係樞密院職司人吏各勒仍舊應合行公事委本院奏取

指揮以宰臣桑維翰兼樞密院使。從中書門下奏請也

周顯德六年六月命司徒平章事范質禮部尙書平章事王溥並參知樞密院事

建昌宮使

梁開平元年四月置建昌院以博士王友文判院事。以太祖神武元聖孝皇帝在藩時四鎮所管兵車

年五月。中書門下奏請以判建昌院事爲建昌宮使。仍以東京太祖舊潛龍宅爲宮

二年三月以侍中韓建判建昌宮事。至十月以尙書兵部侍郎李皎爲建昌宮副使。

三年九月以門下侍郎平章事薛貽矩判建昌宮事。至四年十二月以李振爲建昌宮副使。

乾化二年五月以門下侍郎平章事于兢判建昌宮事。其年六月廢建昌宮。以河南尹魏王張宗奭爲國

計使。凡天下金穀兵戎舊隸建昌宮者悉主之。至後唐同光四年二月以吏部尙書李琪爲國計使。按實錄自後廢其名額不置。

後唐同光二年正月敕鹽鐵度支戶部三司凡關錢物委租庸使管轄。其年三月左諫議大夫竇專上疏

曰臣伏見天下諸色錢穀比屬戶部度支金部倉部各有郎中員外支計分劈自後以租賦殷繁添置司

之額自唐天寶中安史作亂民戶流亡征賦不時經費多闕惟江淮嶺表郡縣完全總三司貨財發一使

征賦在處勘覆目曰租庸纔收京城尋廢職務廣明中黃巢充斥僖宗省方依前以江淮征賦又置租庸

使催征及至車輅還京旋亦停廢僞梁不知故事將四鎮節制征輸置宮使名目管係既廢宮後改置租

庸雜以掊斂相兼加之出放生利況戶口什一之稅是太平之日規繩租庸總三司合勘因喪亂之時制

置在京無此名目乃是出使權宜若要委一官之能何妨總三司合判伏請敕郡縣重集戶口計定租稅

令鹽鐵卻歸三司收其征賦務使仍舊會計到京且使上供何須直進既戶口不失則增賦倍多致海內

有久遠之安示天下爲一家之治。事雖不行然有識者甚疑之。

天成元年四月敕停廢租庸院名額依舊爲鹽鐵戶部度支三司委宰臣一人專判仍廢租庸院大程官

及放猪羊柴炭戶其括田竿尺一依偽梁制度仍委節度使通申三司不得更差使檢括州使公廩錢先被租庸管係者一切卻還州府

長興元年八月勅會計之司國朝重務總其使額以委近臣貴使一時寧循往例張延朗可充三司使班位在宣徽使之下

唐朝以戶部度支掌泉貨鹽鐵則特置使名戶部度支則尚書省本司侍郎郎中判其事天寶中楊慎矜王鉞揚國忠雖承恩顧各守本官別帶使額下及劉晏第五琦亦如舊制自後又以宰臣各判一司不帶使額乾符之後天下兵興隨置租庸使以掌調發兵罷則停僞梁不閑典故乃置租庸使總天下征賦莊宗亦踵其事暨今上登位削去使名命重臣一人專判曰判三司至是延朗自許州入掌國計自於樞密便請置三司使宣下中書門下宰臣以非故事擬授延朗充諸道鹽鐵轉運使令兼判戶部度支上不從故特降是命三司置使名自延朗始也

四年正月三司使奏當省有諸道鹽鐵轉運使額職員極多見有左右都押衙及客司通引今欲從正押衙設省職爲轉遷之序正押衙同押衙衙前兵馬使討擊副使衙前虞候衙前子弟者敕衙前兵馬使已下名目皆是軍職不合係於省司其正押衙同押衙衙前虞候衙前子弟宜依

宣徽使

梁開平元年五月宣旨下徽院收管供奉官殿前受旨官宣左右內直等後唐清泰元年七月殿直都知趙處愿承旨都知蔣德隣恩謝令具欄笏

晉天福六年七月敕宣徽院供奉官殿直人數不少今後諸道行軍副使不得奏請宣補骨肉

皇城使

梁開平三年七月勅。內皇城諸門。宜各差控鶴官兩人守把。其諸司使并諸色人。並勒于左右銀臺門外下馬。不得將帶人入門。逐日諸道進奉客省使。于千秋門外排當訖。勒控鶴官擡至內門前。令董門殿直已下昇進。其章善門。仍令扃鎖。不用逐日擅自開閉。

乾化元年五月。詔曰。闌是正門也。宜以時開閉。用達陽氣。委皇城使準例檢校啓閉。車駕出。則闔扉。

元帥

後唐長興四年。以秦王從榮爲天下兵馬大元帥。其年九月中。書門下奏。秦王加天下兵馬大元帥。自歷朝以來。無天下兵馬大元帥公事儀注。或專一面之權。或總諸道之司。其儀注規程公事條目。載詳故實。未見明文。臣等謹沿近事。伏見招討使總管兼受副使。已下囊鞬庭禮。今望令諸道節度使已下。凡帶兵權者。見元帥。階下具軍禮參見。皆申公狀。其使相者。初相見。亦以軍禮一度。已後客禮相見。應天下諸軍務公事。元帥府行帖指揮。其判六軍諸衛事。則行公牒往來。其元帥府所置官屬。補授軍職。則委元帥奏請。從之。

諸道節度使軍額

滑州唐光啓二年四月。改爲宣義軍節度。許州。梁開平二年。改爲匡國軍。後唐。陝州。梁開平二年。改爲鎮光三年。復。邢州。梁開平二年六月。建爲保義軍節度。割洛忠。宋州。梁開平三年五月。升爲宣武軍節度。割爲保義軍。邢州。二州隸之。至後唐。同光元年。改爲安國軍。

爲歸鄧州梁開平三年五月升爲宣化軍節度割瀘隨復鄧四州隸之與襄州分江心晉州梁開平四年
 德軍節度以絳沁二州隸之至滄州進歸順故也至後唐同光元年改爲華州唐初爲感化軍至後
 昌唐同光元年改爲建雄軍梁貞明元年十二月改爲崇州升爲靜勝州節度至後唐同光元年改爲
 鎮國軍刺史直屬京耀州爲順義軍至二年三月降爲團練州節度二年降爲刺史直屬京潞州
 月降國軍刺史直屬京耀州爲順義軍至二年三月降爲團練州節度二年降爲刺史直屬京潞州
 同光元年復爲安義軍至長興元年三月復舊名昭義軍安州後唐同光五年七月降爲防禦使所管新州割隸
 許州以李金全叛命故也至漢天福十二年六月復爲新州軍節度以媯儒武三州隸之應州後唐天
 爲安懷軍節度至周顯德元年十月又降爲防禦州隸之陳州晉開運二年六月降爲刺史直屬京潞州
 升爲章國軍節度以興雲州大開運二年七月復爲陳州晉開運二年六月降爲刺史直屬京潞州
 唐軍爲襄州以隸之與雲州大開運二年七月復爲陳州晉開運二年六月降爲刺史直屬京潞州
 升爲防禦州二年七月復升曹州爲刺史至周廣順二年七月復升爲彰信軍節度至漢天福十二年六月
 爲鎮安軍節度以潁州隸之曹州爲刺史至周廣順二年七月復升爲彰信軍節度至漢天福十二年六月
 福七年降爲防禦州直屬京所管均房二州割隸鄧州以安從青州晉開運三年二月降爲防禦州與
 進叛命初平故也至漢天福十二年六月復爲山南東道使青州晉開運三年二月降爲防禦州與
 初平故也至漢天福十二年六月復爲山南東道使青州晉開運三年二月降爲防禦州與
 六月復舊爲平盧軍節度貝州晉天福三年十二月復爲山南東道使青州晉開運三年二月降爲防禦州與
 厚薨乃割相州建節一尋軍亂以地歸後唐莊宗御爲屬郡隸魏兗州周廣順二年五月降爲防禦州與
 州至晉天福三年十一月復升爲防禦州移理所於德勝渡至九年八月以慕容彥超叛命初平故也
 州改掌州爲常山郡應軍額館驛帶州名者並改爲常山鎮寧軍以濮州隸之鎮州晉天福七年
 國軍節度改常山郡應軍額館驛帶州名者並改爲常山鎮寧軍以濮州隸之鎮州晉天福七年
 以安重榮叛命初平故也至漢天福十二年八月復爲成德軍府州漢天福十二年四月降爲永安軍節
 州至周顯德元年代州軍節度以初歸降故也汾州周顯德元年五月升爲寧州後唐天福七年
 五月復舊軍額代州軍節度以初歸降故也汾州周顯德元年五月升爲寧州後唐天福七年
 楚州月升爲順化軍節度壽州升後唐忠正軍節度十月閩州升後唐保寧軍節度十月虔州升後唐昭信軍節度

洮州後唐長興四年十一月升為保順軍節度溫州晉天福四年八月升為靜海金州晉天福四年五月升為懷德軍節度湖州周顯德二年六月升為宣德軍節度從兩浙錢弘俶奏也

雜錄

後唐天成元年十一月敕雄武軍節度使官銜內宜兼押蕃落使

二年七月勅頃因用本朝親王遙領方鎮其在鎮者遂云副大使知節度事但年代已深相沿未改今天下侯伯並正節旄惟東西兩川未落副大使字宜令今後祇言節度使

親王遙領節度使

後唐清泰元年六月以皇子重美遙領成德軍節度鎮冀深趙等州觀察處置北面水陸轉運制置等使兼河南尹判六軍諸衛事

晉天福八年以皇弟重睿為開封尹充管內河堤使時重睿以年幼未出閣命左散騎常侍邊蔚權知府事逐月支錢七十千米麵縑千人馬十匹草粟別支公用米二十石麥五十石羊二十口每年麵三千斤錢四百千

開運二年五月又遙領雄武軍節度秦階成等州觀察處置押蕃落管內營田制置等使至三年正月改領忠武軍節度許蔡申等州觀察處置使

三年三月以皇子延煦遙領鎮寧軍節度澶相等州觀察處置管內河堤等使至其年十一月改領保義

軍節度陝虢等州觀察處置等使

漢乾祐元年六月以皇弟勛領山南西道節度管内觀察處置等使興元尹。

宰相遙領節度使

後唐同光元年十月以侍中監修國史郭崇韜兼領成德軍節度鎮冀深趙等州觀察處置等使真定尹。

都護府

後唐長興三年四月中書門下奏據十道圖有大都護除單于北庭等府久不置外今具員內節度使中見有兩員外守安北都護安東都護今請祇以四大都護爲定額仍以安東大都護爲首奉勅宜依其安南大都護安西大都護安北大都護次之。

軍

梁開平元年十二月於輝州碭山縣置崇德軍。太祖榆社凡在碭山置使以領之始命朱彥讓爲軍使。

晉天福四年五月改舊威州爲清遠軍。

六年八月改澶州頓邱鎮爲德清軍鎮使爲軍使其年九月以新修胡梁渡爲大通軍。初置浮橋故也。

七年四月降雄州爲昌化軍警州爲威肅軍其軍使委命本道差補。

周顯德元年十月以萊蕪監爲廣利軍從前監使張崇謙奏請也。至六年十一月復廢爲萊蕪治。

二年三月以李晏口爲靜安軍

李晏口當契丹入寇之路築城屯軍爲邊防人甚賴之

其年六月廢景州爲定遠軍所管東光弓高

兩縣隸滄州安陵縣隸德州其年七月廢環州爲通遠軍

三年五月以渦口鎮爲鎮淮軍

五年六月以鄂州漢陽縣爲漢陽軍

以時平淮南之地以江爲界

六年十一月以鳳州固鎮爲雄勝軍

諸使雜錄

奏薦附

梁朝諸司使名崇政院使租庸使宣徽院使客省使天驥使飛龍使莊宅使大和庫使豐德庫使儀鑾使乾文院使文思院使五防如京使尙食使司膳使洛苑使教坊使東上閣門使西上閣門使內園栽接使弓箭庫使大內皇城使武備庫使引進使左藏庫使西京大內皇城使閑廐使宮院使翰林使

梁開平元年五月改御食使爲司膳使小馬坊使爲天驥使文思院使爲乾文院使同和院使爲儀鑾使

至三年十一月乾文院御置使其年九月敕近年文武諸道奉使皆分外停留今後兩浙福建廣州安南邕容等道使到

發許住一月湖南洪鄂黔桂住二十日荆襄固雍鎮定青滄許住十日其餘近輔歇泊三五日如是往來

道路據里數日行兩驛如遇疾患及江河阻隔委所在長吏具事由聞奏仍仰御史臺覺察

三年十月置左右軍巡使以段明遠爲左軍巡使鄧成爲右軍巡使時以選部之給凡吾河南尹侍衛諸軍雖合差人巡警京都往往濫發分曹異職多擾於民乃置左軍巡管水北右

軍巡管水南各置巡院罷諸軍巡檢人員仍令判六軍諸衛張宗奭都管轄

乾化元年十二月以大理卿王鄴爲安南送旌節官告使舊制巡撫黜陟册命賑卹吊贈入番等使選朝臣爲之其宣慰加官送旌節卽以中官爲之今

以三品送旌節新例也

後唐同光二年二月。中書門下奏。今後大鎮節度使。管三州已上者。每年許奏管內官三人。管三州已下者。許奏二人。仍須是考績尤異。如止於徵科及限。檢損無瑕。祇得書考。不得奏薦。其防禦使。每年許奏一人。刺史無奏薦之例。更有將前資官請他處除授者。謂之橫薦。亦宜止絕。如有遠越。中書不在施行之限。從之。其年三月。中書門下奏。儀仗法物使李肅。是僞梁置此使額。使令主持。又無考限。況主持法物。各有本司。請准舊停廢。從之。

天成元年九月。以尙書都官郎中庾傳美爲三川撻訪圖籍使。其月北京奏準宣命于係省賣麴錢上。每

貫割留二百。充本府公使。初朱守殷爲河南尹。官兼平章事。與宰執貴要交歡。屢有宴會。及告安重誨以司府無利。潤支費。遂議割麴錢。奏從之。諸府因以爲例。

二年三月二十一日。敕諸道州府所有專差人。持禮往來。皆具申奏。況列藩交聘。諸侯結歡。乃自古之通規。亦明朝之舊事。近日皆宜章奏。稟命朝廷。旣旌敦好之風。兼表睦隣之好。且道非越境。何勞上聞。宜令徧降勅命。指揮諸道州府。自今後應是諸道差人。持禮來去。並令不要申奏。

四年五月。勅今後諸州諸使。凡於廨署。並須專切增修。不得信任摧毀。凡所置辦。亦令勒具年月。編於帳

籍交代之際。分明交領。不得因此接便擾人。其年六月勅。諸州侯伯所請賓從。及主事元隨。並令奏其名。姓。或參佐道虧。各令加罪。其年七月勅。諸道州府不得奏薦將校職員。乞行恩命。如顯有功效。卽列奏以聞。

長興元年五月勅。今後凡有除移。準宣詔遣差外。其餘須候人到彼。點檢交割軍州公事了日。卽可發離本處。仍令逐道觀察使散管內諸州準此。

二年五月勅。今後應內外臣僚。不計在朝出使。並不得輒發書題。妄行請託於諸處安排公人。宜令三司及諸道州府節使防禦團練使刺史等。或有人不畏條敕。猶躡舊踪者。並仰立具姓名聞奏。發薦者貶所任府官。求薦者配於邊遠州縣。常知所在。如逐處長吏。自徇人情。顯違敕命。祇被替本人詣闕上疏。勘問不虛。長吏罰兩月俸。發薦人比前例更加一等。被替人卻令依舊。仍從再句。當後三年內。除別顯有罪名外。不得妄有替移。其長興二年五月一日已前所犯。不在上訴之限。兼敕到後。但是州府。並於鋪驛及顯要處。粉壁具錄勅命曉諭。常令申舉。永使聞知。況蒙國爵待人。惟賢是舉。稍聞俊乂。必命獎升。其有端士正人。雄文大學。言可以經綸王道。行可以規矩人倫。但當顯陳表章。明具論薦。名始得正。功不棄材。所期絕彼倖人。豈可滯諸賢者。其年七月勅。諸道奏薦州縣官。各定員數。今宜增益。以廣擡揚。帶使相節度使。每年許薦三人。今加至五人。不帶使相節度使。許薦二人。今許薦三人。直屬京防禦團練使。許薦一人。今

加薦至二人。卽不得薦。新罷任及過格之人。如未曾有官者。當別比擬。

清泰元年八月敕。凡關差使。須示均平。今後文武百官充使者。宜令依例輪差。中書置簿。不得重疊。其內降宣

論不拘此例。若當使自緣有事。或不欲行注簿。便當一使長興三年正月後。已曾奉使者。便著爲簿首。已後差

使。次第注之。

晉天福二年二月敕。今後中外臣寮。或因差使出入。不得薦囑人于藩鎮。希求事任。如有犯者。準長興二年敕條處分。其月敕。諸道馬步都虞候。今後朝廷。更不差補。委逐州府于衙前大將中。選久歷事任。曉會刑獄者充。仍以三年爲限。不得於元隨職員中差補。其今日已前見在任者。如無罪犯。宜令終其月限。候將來得替。仰本道於衙前收管。不得赴闕。

五年六月敕。承旨者。承時君之旨。非近侍重臣。無以稟命。是以大朝會。則以宰臣承旨。草詔書。則以學士承旨。若無區別。何表等威。除翰林學士承旨外。殿前承旨。改爲殿直。樞密院承旨。改爲承宣。御史臺三司。關門客省承旨。並令別定其名。其年七月二日敕。應內外諸使。諸司及諸州府。凡有諸色公道事。須具奏聞。今後不得白狀及劄子。記事申覆。如事關機密。卽準元降宣命。實封斜角。不題事目。通下。其合申中書。及中書勘會公事所申狀。亦須是本司及逐處官員印署。不得將白狀及記事劄子。兼令司局抄劄子申。宜令御史臺及宣徽院三司侍衛司諸道州府準此。

漢乾祐三年五月勅。諸防禦團練州。申奏公事。除朝廷以軍期應副。則不及聞於廉使。如尋常公事。不得自專。須先申本官。斟酌以聞。今後州府。不得違越。其月敕。諸道州府。宜差散從官。大府五百人。下州二百人。宜量戶口多少。差團集本處管係。立節級。點檢教習。警備州城。至周廣順元年三月敕。其諸道州府。所差散從官親事官。並放歸農。自去年四月已前。州縣元管係入數。一切仍舊。其遞鋪。如已前招召到者。且仰仍舊。今後更不得招召。其諸處場院。並不得影庇兩稅人戶。所有河北諸州府。及澤潞晉絳慈隰解等州。於先差散從親事官內。選弓箭手。祇且留住本州管係。其餘放差。先漢隱帝命諸州于百姓內。差散從官親事官。又差力及人戶充遞鋪。又下三司諸場務。召人戶替占。役兵皆不便於民。故放之。其年七月敕。應諸道州府鎮務。祇差補鎮符一員。都虞候一員。餘並除廢。因書都官郎中曹謙吉上章。故降是勅。

周廣順元年五月勅。今後諸州府。不得奏薦無前資及無官。并無出身人。如有奇才異行。亦許具名以聞。便可隨表赴闕。當令有司考試。朕當親覽。

顯德五年四月六日勅。應諸道州府進奏。逐月合請俸料及紙筆等錢。宜令今後于本州公使錢內支給。不得分配人戶。及州縣門戶。如本州公使錢少。不便支給處。祇不要置進奏官。仰於衙前。差有名糧職員。充進奏聞。院副知仍二周年替罷。本州優與安排。

五代會要卷二十五

幕府

後唐同光二年八月八日。中書門下奏。諸道除節度副使。及兩使判官。除授外職。其餘職員。并軍使判官。伏以翹車著詠。蔑帛垂文。式重弓旌。以光樽俎。由是副知己之薦。成接士之榮。必當備悉行藏。習知才行。先奉幕中之畫。以稱席上之珍。爰自僞梁。頗乖斯義。皆從除授。以佐藩宣。因緣多事之秋。慮爽得人之選。將期推擇。式示更張。今後諸道除節度副使判官兩使除授外。其餘職員并諸州軍事判官等。並任本道本州各當辟舉。其軍事判官仍不在奏官之限。

天成元年八月十一日。勅。諸道開置幕府。皆有舊規。奏薦官寮。亦著前式。苟或隳紊。難正澆訛。從前諸道奏請判官。若遇移鎮。便合隨去。若無除授。亦隨府罷。近年流例。有異從來。使府雖遇除移。判官元守舊職。今後若朝廷除授者。卽不係使府除移。如是自請充職者。便須隨去。如遇府罷。其職亦罷。又往例。藩鎮帶平章事。奏請判官。殿中已上。許奏緋。中丞已上。許奏紫。不帶平章事。亦同帶平章事例處分。如是防禦團練使。奏請判官。自員外郎已下。不在奏緋之限。其所奏判官州縣官。並須將前任告赤。隨奏到京。若是未曾有官。須假試銜者。亦隨奏狀內言。並未有官。如是節度觀察留後。及權知軍州事。並不在奏請判官之

限。如刺史要奏州縣官。並須申本道請發表章。不在自奏之限。今日諸道奏請從事。本無官署。妄結虛銜。不計職位高卑。多是兼請朱紫。不惟紊亂。實啓倖求。深蠹彝章。須行釐革。宜令諸道州府。仍下管內諸州。準敕命處分。

四年六月敕。諸道節度行軍司馬。名位雖高。或帥臣不在。其軍州事。節度副使權知。

長興元年五月十六日敕。去年相次有諸道前資掌書記。已下賓從。到京求官。人數極多。或自述行止。或得替節度使論薦。兼有已於郊天行事者。卽目朝班中無員闕安排。前件官等。皆隨府罷職。相次到京。當奏辟之時。慎選盡由門館。及替閑之後。安排須告朝廷。若不特議區分。卽恐久令淹滯。宜令于諸道掌書記已下。據有員闕處。各除授一員。仍自此凡是朝官及諸州府判官。得替一周年後。得求官擢才。持勅不在此限。其年十二月十九日。太常丞孔知邵奏。諸道行軍副使兩使判官。及防禦團練軍事判官。並請依考限。欲滿一月前。本處聞奏朝廷除替。從之。兼上佐令錄判司主簿。亦準此指揮。或有丁憂及不赴任。因事停官身死。並具月日申奏。如不依指揮。罪本處判官。

二年二月中書門下奏。準天成四年六月二十日勅。使準舊例。以三年爲限。其少尹上佐官。以二十五月爲限。府縣官準長定格。以三十月爲限。其行軍副使兩使判官。已下賓僚。及防禦團練副使判官。推官軍事判官。並宜以三十箇月爲限。如是隨府。不在此限。其年十一月勅。今後兩使判官。罷任後一年外。與比

擬書記支使防禦團練判官等二年外。推巡防禦團練推官軍事判官等。並三年與比擬。仍每遇除授。量與改轉官資。或階勳職次。若文學智術。超羣軼倫者。不拘年月之限。才器俾陋。階緣得事者。卽於州縣官中比擬。若州縣官中有文學雄奧。識略優深者。亦與班行諸道判官中比擬任使。

清泰二年七月中書門下奏。自今年三月後。諸州刺史奏軍判官九人。行之有礙。新勅慮在外未知。勅來判官。宜令本州刺史。自選擇舉奏。初且除本職。未得與官。或與刺史連任相隨。顯有勞能。許本州刺史以聞。量事獎擢。仍不得枉有論薦。其三月後九人。且與施行。

晉天福二年二月敕。前任諸道行軍副使等。今後替罷一年後。方得赴闕。其先替在京者。宜令中書門下據見有關員除授。仍勅諸道知。

四年七月勅。今後防禦團練刺史所奏從事。無官名者。不在申薦。

漢乾祐元年正月勅。其諸道行軍副使兩使判官。今後不得行奏薦。委中書門下。選帶使相節度使。許奏節度掌書記觀察支使節度推官。不帶使相節度使。只許奏節度掌書記。節度推官。其防禦團練判官等聽奏。今須精擇才能。其奏薦州院官。帶使相許薦三人。不帶使相許薦二人。防禦團練刺史許薦一人。仍舉唐朝晉朝勅。永爲規制。

周廣順元年三月敕。副留守節度副使行軍司馬兩京少尹留守判官兩使判官。共許差定當直人力。不

得過十五人。諸府少尹掌書記支使防禦團練副使不得過一十人。節度推官防禦團練軍事判官不得過七人。並取本廳舊當直人力充。若數少不及新定數目。祇仰舊人數差定。仍令逐處係帳收管。此外如不遵條制。額外占差人戶。本官當行朝典。

顯德二年六月詔。兩京諸道州府留守判官兩使判官少尹防禦團練軍事判官。今後並不得奏薦。如隨郡已歷前件官職任者。不在此限。其防禦團練刺史。州各置推官一員。

租稅

後唐同光三年二月勅。魏府小菘豆稅。每畝減放三升。城內店宅園囿。比來無稅。頃因僞命。遂有配徵。後來以所徵物色。添助軍裝衣賜。將令通濟。宜示矜蠲。今據緊慢去處。於見輸稅絲上。每兩作三等。酌量納錢貫。與充本迴圖收市軍裝衣賜。其絲仍與除放。其年閏十二月。吏部尚書李琪上疏曰。臣聞古人有言。穀者人之司命。地者穀之所生。人者君之所理。有其穀則國力備。定其地則人食足。察其人則徭役均。知此三者。爲國之急務也。軒黃已前。不可詳記。自堯壘洪水。禹作司空。于是辨九等之田。收什一之稅。其時戶口一千三百餘萬。定墾田約九百二十萬頃。最爲太平之盛。及殷革夏命。重立田制。每私田十畝。種公田一畝。水旱同之。亦什一之義也。洎周室立井田之法。大約百里之國。提封萬井。出車千乘。戎馬四千匹。畿內兵車萬乘。馬四萬匹。以田法論之。亦什一之制也。故當成康之世。比堯舜之朝。戶口更增二十餘萬。

非他術也。蓋三代之前，皆量人以爲出，計農以爲軍。雖逢水旱之災，而有凶荒之備，降及秦漢，重稅工商，急關市之征，倍舟車之算，人口旣以減耗，古制猶復兼行。按此時戶口尙有千二百餘萬，墾田亦八百餘萬頃。至乎三國並興，兩晉之後，則農夫少於軍衆，戰馬多於耕牛，供軍須奪於農糧，秣馬必侵于牛草。于是天下戶口，止有二百四十餘萬。洎隋文之代，與漢比崇，及煬帝之年，又三分去二。唐太宗文皇帝，以四夷初定，百姓未豐，延訪羣臣，各陳所見。唯魏徵獨勸文皇帝力行王道，由是轉徭薄賦，不奪農時，進賢良，悅忠直，天下斗粟值兩錢，自貞觀至於開元，將及九百萬戶，五千三百萬口，墾田一千四百萬頃。比之近古，又多增加。是知救人瘼者，以重斂爲病源，料兵食者，以惠能爲軍政。仲尼云：百姓足，君孰與不足。臣之此言，是魏徵所以勸文皇也。伏惟深留宸鑒，如以六軍方闕，未可輕徭，兩稅之餘，猶須重斂，則但以折納爲事，一切以本色輸官，又不以紐括爲名，止以正稅加納。天下幸甚。敕本朝徵科，唯配有兩稅，至于折納，所不施爲。宜依李琪所論，應逐稅合納錢物斛斗鹽錢等，宜令租庸使指揮，並準元徵本色輸納，不得改更。若有移改，卽須具事由聞奏。

天成元年四月，赦節文應納夏秋稅子，先有省耗，每斗一升。今後止納正稅數，不量省耗。四年五月五日，戶部奏三京鄴都諸道州府，逐年所徵夏秋稅租，兼鹽麴折徵諸般錢穀等，起徵條流如後四十七處，節候常早，大小麥麩麥豌豆，五月十五日起徵，八月一日納足。正稅匹帛錢鞵地頭權麴蠶

鹽及諸色折料。六月五日起徵。至八月二十日納足。河南府華州耀陝絳鄭孟懷陳齊棣延堯沂徐宿汝申安滑漢澶襄均房雍許邢洛磁庸隨郢蔡同鄆魏汴潁復鄜宋亳蒲等州二十三處。節候差晚。隨本處與立兩等期限。二十三處州郡未見。一十六處節候較晚。大小麥麩麥豌豆。六月一日起徵。至八月十五納足。正稅匹帛錢鞵地頭權麴蠶鹽及諸色折料。六月十一日起徵。至八月二十五日納足。幽定鎮滄晉隰慈密青鄧淄萊邠寧慶衍七處。節候尤晚。大小麥麩麥豌豆。六月十日起徵。至九月納足。正稅匹帛錢鞵權麴錢等。六月二十日起徵。至九月納足。并潞澤應威塞軍大同軍振武軍。其月敕百姓今年夏苗。委人戶自通供手狀。具頃畝多少。五家爲保。委無隱漏攢連狀。本州具狀送省。州縣不得送差人檢括。如人戶隱欺。許令陳告。其田倍令并徵。

長興二年六月勅。委諸道觀察使屬縣。于每村定有力人戶充村長。與村人議。有力人戶出剩田苗。補貧下不迨頃苗者。肯者。卽具狀徵收。有詞者。卽排段檢括。自今年起。爲定額。有經災沴。及逐年逋處。不在此限。

三年十二月。三司奏請諸道上供稅物。充兵士衣賜不足。其天下所納斛斗及錢。除支贍外。請依時折納綾羅絹帛。從之。

晉天福四年正月勅。應諸道節度刺史。不得擅加賦役。及於縣邑別立監徵所。納田租。委人戶自量自概。

周顯德三年十月宣三司指揮諸道州府。今後夏稅以六月一日起徵。秋稅至十月一日起徵。永爲定制。五年七月詔曰。朕以寰宇雖安。烝民未泰。當乙夜觀書之際。校前賢阜俗之方。近覽元稹長慶集。見在同州時所上均田表。較當時之利病。曲盡其情。俾一境之生靈。咸受其賜。傳於方冊。可得披尋。因令製素成圖。直書其事。庶公王親覽。觸目驚心。利國便民。無亂條制。背經合道。盡繫變通。但要適宜。所冀濟務。繫乃助舊。共庇黎元。今賜元稹所奏均田圖一面。至可領也。是時上將均定天下民租。故先以均田圖遍賜諸侯。其年十月。賜諸道均田詔曰。朕以干戈旣弭。寰海漸寧。言念地征。罕臻藝極。須議並行均定。所冀永適重輕。卿受任方隅。深窮治本。必能副寡昧平分之意。察鄉閭致弊之源。明示條章。用分寄任。矧令集事。允屬推公。今差使臣往彼檢括。餘從別勅。乃命左散騎常侍艾穎等三十四人于諸州檢定民租。

雜錄

後唐長興元年三月十三日勅。天下州府受納程草。每束納錢一文足。一百束納拘子四莖。充積年供使。棗鍼一莖。充稔場院。其草併柴蒿一束。納錢一文。其納絹絕布綾羅。每匹納錢一十二文足。絲綿紬子麻皮等。每一十兩。納耗半兩。鞵每量納錢一文足。見錢每貫納七文足。省庫收納上件前物。元條流見錢每貫納二文足。絲綿紬子。每一百兩納耗一兩。其諸色匹段。並無加耗。二年閏五月敕。今後諸州府所納程草。每二十束。別加耗一束。充場司耗折。其每束上舊納盤纏錢一文。

仰官典同供繫豎。一一分明上歷。至納遺了絕已來。公使不得輒將出外。

周廣順元年三月二十八日勅。諸道州府牛皮。今後犯一張。本犯人徒三年。刺配重處色役。本管節級所由。杖九十。兩張以上。本人處死。本管節級所由。徒二年半。刺配重處色役。告事人賞錢五十千。其人戶有牛死者。其本戶報告本地方所由節級鄰保人。仰當日內同檢驗過。令本主晝時剝皮。及申報本處官吏。限十日內。須送納畢。其筋骨不得隱落。

二年十一月勅。應天下人所納牛皮。令將逐年所納數。三分內減收二分。其一分子人戶苗畝上配定。每秋夏苗共十頃。納連角牛皮一張。其黃牛納乾筋四兩。水牛半斤。犢犝皮不在納限。其皮人戶自詣本州送納。所司不得邀難。所有牛馬驢騾皮筋骨。今後官中更不禁斷。並許私家共使買賣。祇不得將出化外敵疆。仍仰關津界首。子細覺察。捕捉所犯人。必加深罪。其州縣先置巡檢牛皮節級。及朝廷先降條法。一切停廢。

顯德三年五月勅。應天下今後公私織造到絹帛細布綾羅錦綺。及諸色匹帛。其幅尺斤兩。並須合向來制度。不得輕弱假偽。罔冒取價。如有物色以上等。限一百日內。並須破貨了絕。如限外敢有違犯織造貨賣者。仰所在節級所由。擒捉送官。其年十月勅。舊制織絕絹布綾羅錦綺紗縠等。幅闊二尺。起來年後公私織造。並須及二尺五分。不得夾帶粉藥。宜令諸道州府。嚴切指揮。來年所納官絹。每匹須及一十二兩。

河北諸州並萊登沂密州須及一十二兩。絕紬正要夾密停勻。不定斤兩。絕紬絹長。依舊四十二尺。四年二月六日勅節文。諸道州府所管屬縣。每年秋夏徵料了畢後。多是却追縣典。上州會末文鈔。因茲科配斂掠。宜令今後秋夏徵料了足日。仰本州府但取倉場庫務內欠文鈔。如無異同。不在更追官典。諸道州府管內縣內鎮。每有追攝公事。自前多差衙前使院職員。及散從步奏官。今後如是常程追攝公事。祇令府□□承受遞送。不得更差專人。若要切公事及軍期。不在此限。三年六月四日勅。諸道州府應有商賈興販牛畜。不計黃水牛。凡經過處。竝不得抽稅。如是貨賣處。祇仰據賣價每一千抽稅錢二十。不得別有邀難。

團貌

周顯德五年十月詔。諸道州府令團併鄉村。大率以百戶爲一團。選三大戶爲耆長。凡民家之有姦盜者。三大戶察之。民田之有耗登者。三大戶均之。仍每及三載。卽一如是。

帳籍

梁開平三年三月尚書戶部奏。請詔天下州府。準舊章申送戶口帳籍。從之。晉天福九年八月勅。天下諸州。各以係省錢穀秋夏徵科爲帳籍。一季一奏。一年賦稅及限。其藩侯郡守。更委在任一年。次年又不逋欠。聽三周年爲滿。三年皆辦。別議遷陟。

逃戶

後唐天成三年十二月十日。殿中監李延範奏。請指揮諸道州府。每逃戶歸業後。委州司各與公憑。二年內。放免兩稅差科。如有違。許州論許勘責。若州縣官招得五百戶已上。乞等第獎勵。從之。

長興三年七月二十七日。勅。應諸處凡有今年爲經水澇逃戶。莊園屋舍桑棗一物已上。並可指揮州縣。散下鄉村。委逐村節級鄰保人。分明文簿。各管見在。不得輒令毀拆房舍。斬伐樹木。及散失動使什物等。候本戶歸業日。却依元數責令交付。訖具無欠少罪結狀。申本州縣。如元數內稱有事欠少。許歸業戶陳狀訴論。所犯節級并鄉鄰保人等。並科違勅之罪。仍勅備償。或至來年春入務後。有逃戶未歸者。其桑土。卽許鄰保人請佃。供輸租稅。種後本主歸來。亦准上指揮。至秋收後還之。

周顯德二年正月二十五日。勅。應自前及今後有逃戶莊田。許人請射承佃。供納租稅。如三周年內。本戶來歸業者。其桑土不以荒熟并莊田交還一半。五周年內歸業者。三分交還一分。應已上承佃戶。如是自出力別蓋造到屋舍。及栽種到樹木園圃。並不在交還之限。如五周年外歸田者。莊田除本戶墳塋外。不在交付。如有荒廢桑土。承佃戶自來無力佃蒔。祇仰交各與歸業人戶佃蒔。一近北諸州。自契丹離亂。鄉村人戶。多被番軍打虜向北。近來多有百姓。自番界迴來。其莊田已被別戶請射。無處歸託。令後如有五周年內。其本主還來識認。不以桑土荒熟并莊園三分中交還二分。十周年內來者。交還一半。十五周年

內來者。三分中交還一分。應上項承佃戶。如自出力別蓋造到屋舍。及栽種到樹木園圃。並不在給還之限。如十五周年外歸業者。其莊田除本戶墳塋外。不在交還。如有荒廢桑土。承佃戶自來無力佃蒔。祇仰交割與歸業人戶佃蒔。一應有坐家破逃人戶。其戶下物業。並許別戶陳告。請射承佃。供納租稅。充爲永業。不限年歲。不在論認之限。所有本戶及鄉村節級。重行斷決。一諸州應有冒佃逃戶物業。不納租稅者。其本戶歸業之時。不計年限。並許論認。仰本縣立差人檢勘交割與本戶爲主。如本戶不來歸業。亦許別戶請射爲主。所有冒佃人戶。及本縣節級。重行科斷。如冒佃人戶。自來陳首承認租稅者。特與免罪。一顯德二年正月二十五日。已前。應有逃戶拋下莊田。自來全段無人承佃。曾經省司指揮開闢租稅者。宜令本州縣招携人戶歸業。及許別戶請射爲主。與免一年差科色役。至第二年已後。據見在桑土。及租蒔到見苗。詣實供通。輸納租稅。

雜錄

後唐天成二年十二月三日敕。率土黎甿。並輸王稅。逐年上計。祇在春時。深虞所在之方。或有無知之者。不自增修產業。輒便攪擾鄉鄰。既撓公門。須嚴定制。宜自今後。凡關論認桑土。二月後州縣不得受狀。十月後閒方許論對。仍令逐處官吏。準前後條格。據理斷割。周顯德四年七月敕。起今後。應有人論訴物業婚姻。自十一月一日後許承狀。至二月三十日權停。自二

月三十日已前。如有陳訴。至權停日公事未了絕者。抑本處州縣。亦與盡理勘逐。須見定奪了絕。其本處官吏。如敢違慢。並當重責。其三月一日後。至十月三十日已前。如有婚田詞訟者。州縣不得與理。若是交相侵奪。情理妨害。不可停滯者。不拘此例。

奴婢

後唐同光二年二月敕。應有百姓婦女。俘虜他處爲婢妾者。不得占留。一任骨肉識認。天成元年十月三日敕。京城諸道。若不是正口。不得私書契券。輒使良人。

周顯德五年七月。新定刑統。該誘良口。勾引逃亡奴婢。與貨賣所資衣裝者。其該誘勾引之人。伏請處死。良口奴婢。並準律格處分。如是居停主人。元不是勾引之人。請行重斷。其或分受贓物。至三匹已上者處死。如有將良口於番界貨賣者。居停主人。明知賣與番界。不告官者。亦請處死。

道路

後唐天成三年二月。興元府奏修斜谷閣道二千八百餘間。四月洋州奏重開入蜀舊路。比今官道近三十五驛。五月夔州奏開新路至房州。

長興二年八月勅。準儀制令。道路街巷。賤避貴。少避長。重去避來。宜令三京諸道州府。各遍下縣鎮。準舊儀制。于道路分明刻牌。于要會坊門。及諸橋柱。曉示路人。委本界所由官司。共加巡察。有違犯者。科違敕。

之罪。

四年三月。西京留守王思同進擬開駱谷路圖。上指山險。謂侍臣曰。如此之險。何以開通。左右奏曰。據

里如從駱谷自雍京直抵興元。糧戍稍便。然此路險阻尤甚。以此竭力開通。將來霖雨亦煩修葺。上偏勉從其奏。竟無成功而止。

及轉餉大散。修開斜谷路。迂迴校五百

五代會要卷二十六

街巷

後唐同光二年八月敕。在京應有空閒地。任諸色人請射蓋造。藩方侯伯。內外臣寮。於京邑之中。無安居之所。亦可請射。各自修營。其空閒有主之地。仍限半年。本主須自修蓋。如過限不見屋宇。亦許他人占射。其月敕。諸道觀察防禦團練等使刺史。出司土宇。入覲朝廷。將壯宸居。須崇甲第。宜於洛京修宅一區。長興二年六月八日。據左右軍巡使奏。諸廂界內。多有人戶侵占官街。及坊曲內田地。蓋造舍屋。又不經官中判押憑據。廂界不敢懸便止絕。切恐久後。別有人戶。更於街坊占射。轉有侵占。不惟窄狹。兼恐久後。別有人戶。及致人戶爭競。近日人戶係稅田地。多被軍人百姓作空閒田地。便立封疆。修築牆壁。占射。又無判押憑據。及本主或有文契典賣。兼云占射年深。或有稅額。及無稅空閒攔悵。不令修蓋。以此致有爭競。廂界難以止絕者。其在京諸坊曲。應有空閒田地。先降勅命。許人戶請射蓋造。及見種蒔公私田地。如是本主自有力。便令蓋造舍屋。若無力。卽許人請射修蓋。自後相次諸色人陳狀。委河南府勘逐。如實是閒田。及不侵占官街。然後指揮劈畫交付。今所稱諸色人侵占街坊。及於見有主稅地內。占射蓋造。必慮有妨車牛過往。及恐百姓互爭議論。須定規繩。各令稟守。京城應天街內。有人戶見蓋造得屋宇外。此後

並不得更有蓋造。其諸坊巷道兩邊常須通得牛車。如有小小街巷亦須通得車馬來往。此外並不得輒有侵占。應諸街坊通車牛外。卽日或有越衆。迥然出頭。牽蓋舍屋棚閣等。並須晝時毀拆。仍據攔截外。具留街道闊狹尺丈。一一分析申奏。此後或更敢侵占。不計多少。宜委地分官司。量罪科斷。其街道內除水渠外。不得穿掘取土。若已有穿掘。各勒逐地分人戶。速速填平。京城內諸坊曲。除見定園林池亭外。其餘種蒔及充菜園。并空閒田地。除本主量力自要修造外。並許人收買見定。已有居人諸坊曲內有空閒田地。及種蒔并菜園等。如是臨街堪蓋店處。田地每一間破明間七椽。其每間地價宜委河南府估價收買。除堪蓋店外。其餘若是連店田地。每畝宜定價錢七千。更以次五千。其未曾有蓋造處。宜令御史臺兩街使河南府。依已前街坊地分。劈畫出大街。及逐坊界分。各立坊門。兼挂名額。先定街巷闊狹尺丈後。其坊內空閒。及見種田苗。并充菜園等田地。亦據本主自要量力修蓋外。並許諸色人收買修蓋舍屋地宅。如是臨街堪蓋店處。田地每一間破明間七椽。其每間地價亦委河南府估價。准前收買。除堪蓋店外。其餘連店田地。每畝宜定價錢七千。以次近外每畝五千。更以次三千。未有人買處。且勒仍舊。遠僻處或欲置菜園。任取穩便。兼應本主所留諸色人置到田地等。並限三箇月內修築蓋造。須見次第。仍不得兩處收買田地。其地祇許修造宅院。并其間小小栽植竹木外。不得廣作園圃。及種植田苗。仍令御史臺常加覺察。如有故違。仰具姓名申奏。當作嚴斷。其所置田地。如是本主種田苗。及見菜園。候收刈及冬藏畢。方許

交割據交割日限後修蓋其已定田地內所有苗稅等宜令據畝數出除其所買田地除本主自要修蓋外有合賣數目如妄託形勢輒有逗留分外邀頡固心占恡者許買地人經臺論訴勘逐不虛所犯之人當行重斷其地仍準價例畫時交與所買之人其所買賣田地仍令御史臺委本處巡按御史旋旋給與公憑仍免稅契右宜令御史臺兩街使河南府專切依次第劈畫曉示或有利便亦可臨時詳奪奏聞其月勅京城坊市人戶菜園許人收買切慮本主占佃年多以鬻蔬爲業固多貧窶豈辦蓋造恐資豪猾轉傷貧民若是有力人戶及形勢職掌曹司等已有居地外於別處及連宅買菜園令人主把或典賃於人並準前勅價例出賣如貧窮之人買得菜園自賣菜供衣食者卽等第特添價值仍賣者不得多恡田土買者不得廣占田地各量事力須議修營

周顯德三年六月詔輦轂之下謂之浩穰萬國駿奔四方繁會此地比爲藩翰近建京都人物喧闐閭巷隘陬雨雪則有泥濘之患風旱則多火燭之憂每遇炎熱相蒸易生疾沴近者開廣都邑展引街坊雖然暫勞終獲大利朕自淮上迴及京師周覽康衢更思通濟千門萬戶靡存安逸之心盛暑隆冬倍減寒燠之苦其京城內街道闊五十步者許兩邊人戶各於五步內取便種樹掘井修蓋涼棚其三十步已下至二十五步者各與三步其次有差

橋梁

晉天福二年六月置浮梁橋於德勝渡。

關

梁開平元年七月勅建國稱都俾新其制。況山川之險表裏爲防。今二京俱在關東爲內。仍以潼關隸陝州。復置河潼軍使。命虢州刺史兼領之。其月勅改武牢關爲軍。仍置虎牢軍使。

市

後唐天成元年十一月二十一日勅在京市肆。凡是絲絹斛斗柴炭一物已上。皆有牙人。百姓將到物貨。賣致時物騰貴。百姓困窮。今後宜令河南府一切禁斷。如是產業人口畜乘。須憑牙保。此外仍不得輒置。仍委兩軍巡使覺察。切加捉獲。如違並當嚴斷。

周廣順二年十二月開封府奏商賈及諸色人訴稱被牙人店主引領百姓賒買財貨。違限不還。其亦有將物去後。便與牙人設計公然隱沒。又莊宅牙人亦多與有物業人通情。重疊將產宅立契典當。或虛指別人產業。及浮造屋舍。僞稱祖父所置。更有卑幼骨肉不問家長。衷私典賣。及將倚當取債。或是骨肉物業自己不合有分。倚彊凌弱。公行典賣。牙人錢主通同蒙昧。致有爭訟。起今後欲乞明降指揮。應有諸色牙人店主。人引致買賣。並須錢物交相分付。或還錢未足。祇仰牙行人店主明立期限。勒定文字。遞相委保。如數內有人前却。及違限別無抵當。便仰連署契人同力填還。如諸色牙行人內有貧窮無信行者。恐

已後。凡累。卽却衆狀集出。如是客旅人自與人商量交易。其店主人牙行人。並不得邀難遮占。稱須依行店事例引致。如有此色人。亦加深罪。其有典質倚當物業。仰官牙人業主及四鄰同署文契。委不是會將物業。印稅之時。於稅務內。納契白一本。務司點檢。須有官牙人鄰人押署處。及委不是重疊倚當。方得與印。如有故違。關連人押行科斷。仍徵還錢物。如業主別無抵當。仰同署契行保鄰人均分代納。如是卑幼不問家長。便將物業典賣倚當。或雖是骨肉物業。自己不合有分。輒敢典賣倚當者。所犯人重行科斷。其牙人錢主。並當深罪。所有物業。請準格律指揮。如有典賣莊宅。準例房親鄰人。合得承當。若是親人不要。及著價不及。方得別處商量。不得虛擡價例。蒙昧公私。有發覺一任親人論理。勘責不虛。業主牙保人並行重斷。仍改正物業。或親鄰人不收買。妄有遮悞。阻滯交易者。亦當深罪。從之。

城郭

後唐天成元年四月。勅京都之內。古無郡城。本朝多事已來。諸侯握兵自保。張全義土功斯設。李罕之砦地猶存。時已擴清。固宜除剗。若特差夫役。又恐擾人。宜令河南府先分劈出舊日街巷。其城壕許占射平填。便任蓋屋宇。其城基內舊有巷道處。便爲巷道。不得因循。妄有侵射。仍請射後。限一月。如無力平剗。許有力人戶。占射平填。

周廣順二年正月。詔開封府修補京師羅城。率畿內丁夫五萬五千版築。旬日而罷。

顯德二年四月詔曰。惟王建國。實曰京師。度地居民。固有前則。東京華夷輻輳。水陸會通。時向隆平。日增繁盛。而都城因舊。制度未恢。諸衛軍營。或多窄狹。百司公署。無處興修。加以坊市之中。邸店有限。工商外至。絡繹無窮。僦賃之資。增添不定。貧乏之戶。供辦實多。而又屋宇交連。街衢湫隘。入夏有暑濕之苦。居常多煙火之憂。將便公私。須廣都邑。宜令所司。於京城四面。別築羅城。先立表識。候將來冬末春初。農務閒時。卽量差近甸人夫。漸次修築。春作纔動。便令放散。或土功未畢。卽次年修築。今後凡有營葬。及興窰竈。并草市。並須去標識七里外。其標識內候官中。劈畫定軍營街巷倉場諸司公廨院務了。卽任百姓營造。至三年正月。發畿內及滑曹鄭之丁夫十餘萬。築新羅城。仍使曹州節度使韓通都部署大役。

館驛

晉天福五年九月。改東京上原驛爲都亭驛。

周廣順二年十二月勅。諸道所差知管驛人。不得於州縣別差人戶貼助。致擾貧民。

顯德四年四月。改赤倉驛爲通吳驛。初世宗始議圖南。命於赤倉置驛。至是以其名識之。

五年五月。以城東新驛爲懷信驛。待江南也。

鹽

後唐同光三年二月勅。魏府每年所徵隨絲鹽錢每兩與減放五文。逐年俵賣蠶鹽食鹽大鹽甜次冷鹽。

每斗與減五十。樂鹽與減三十。

天成元年四月敕。諸州府百姓合散蠶鹽。今後每年祇二月內一度俵散。依夏稅限納錢。

晉天福元年十一月敕。節文。洛京管內逐年所配人戶食鹽。起來年每年減放十文。

七年十一月宣旨。下三司。應有往來鹽貨。悉稅之。過每稅斤七文。住稅每斤十文。其諸道應有係屬州府

鹽務。並令省司差人勾當。先是諸州府除俵散蠶鹽徵錢外。每年末鹽界分場務。約糶錢一十七萬貫。有餘。言事者稱雖得此錢。百姓多犯鹽法。請將上件食鹽錢於諸道州府計戶每

戶一貫至二百爲五等配之。然後任人逐便與販。既不虧官。又益百姓。朝廷行之。諸處場務且仍舊。俄而鹽貨頓賤。去出鹽遠處州縣。每斤不過二十文。近處不過一十文。掌事者又難驟改其法。奏請重置稅焉。

蓋欲絕興販。歸利於官。場院糶鹽。雖多。人戶鹽錢又不放免。民甚苦之。

周廣順二年三月勅。青白池務。素有定規。祇自近年。頗乖循守。比來青鹽一石。抽稅錢八百。鹽一斗。白鹽

一石。抽稅錢五百。鹽五升。訪聞改法以來。不便商販。宜令慶州權鹽務。今後每青鹽一石。依舊抽稅八百

八十五陌。鹽一斗。白鹽一石。抽稅錢五百八十五陌。鹽五升。此外更不得別有邀求。青白鹽池。在鹽州北。池白池。瓦窯池。紐頂池。今出稅置吏。惟有青白二池。

三年十二月敕。諸州府并外縣鎮城內。其居人屋稅鹽。今後不俵。其鹽錢亦不徵納。所有鄉村人戶。合請

蠶鹽所在州縣城鎮。嚴切檢校。不得放入城門。

顯德元年十二月上。謂侍臣曰。朕覽食末鹽州郡。犯私鹽。多於顆鹽界分。蓋卑濕之地。易於刮鹹煎造。豈

五代會要 卷二十六 三二一

惟違我榷法兼又污我好鹽況末鹽煎煉般運費用倍于顆鹽今宜分割十餘州令食顆鹽不惟輦運省力兼亦少人犯禁自是曹宋已西十餘州皆食顆鹽

三年十月勅漳河已北州府管界元是官場糶鹽今後除城郭草市內仍舊禁法其鄉村並不有鹽貨通商逐處有鹹鹵之地一任人戶煎煉與販則不得踰越漳河入不通商界

麴

梁開平三年十一月勅聽諸道州府百姓自造麴官中不禁

後唐天成三年七月十三日勅應三京鄴都諸道州府鄉村人戶自今年七月後於夏秋田苗上每畝納麴錢五文足陌一任百姓造麴醞酒供家其錢隨夏秋徵納並不折色其京都及諸道州府縣鎮坊界及關城草市內應逐年買官麴酒戶便許自造麴醞酒貨賣仍取天成二年正月至年終一年逐月計算都買麴錢數內十分祇納二分以充榷酒錢便從今年七月後管數徵納榷酒戶外其餘諸色人亦許私造酒麴供家即不得衷私賣酒如有故違便仰糾察勒依中等酒戶納榷其坊村一任沽賣不在納榷之限其麴勅命到後任便踏造如賣麴酒戶中有去年曾買官麴今年因事不便買麴任開店者則與出落如覩新勅有情願開店投榷者則不計舊戶新戶便令依見納錢等戶例出榷此後酒戶中有無力開店賣酒者亦許其隨處陳狀其舊納錢並宜停廢應諸處麴務亦仰十分減八分價錢出賣不得更請官本踏

造。

長興二年二月赦節文。諸道州府人戶。每秋苗一畝。上元徵麴錢五文。今後特放二文。祇徵三文。二年五月敕。應三京諸道州府苗畝。上所徵麴錢。便從今年夏並放。其麴官中自造。委逐州減舊價一半。於在城撲斷貨賣。除在城居人不得私造外。鄉村人戶。或要供家一任自造。勅既下。人甚便之。其年七月。三司奏諸道州府申論。先有敕命許百姓造麴。不來官場收買。伏慮課額不迨。請準前麴法。鄉村百姓與在城條法。一例指揮。從之。仍據百姓已造到麴。務令送納入官。量支還麥本。

周顯德四年七月勅。諸道州府麴務。今後。往例官中禁法賣麴。逐處先置都務處。候敕到日。並仰停罷。據見在麴數。準備貨賣。兼據年計。合使麴數。依時踏造。候人戶將到價錢。據數給麴。不得賒賣。抑配於人。其外酒場務。一切仍舊。應鄉村人戶。今後鄉村自造米醋。及買糟造醋供食。仍許於本州縣界。就精美處。酤買其酒麴條法。依舊施行。先是晉漢已來。諸道州府皆權計麴額。置都務以沽酒。民間酒醋皆瀉薄。上知其弊。故命改法。

鐵

後唐長興二年十二月勅。今後不計農器燒器。動使諸物。並許百姓逐便自鑄造。諸道監冶。除當年定數鑄辦供軍熟鐵。并器物外。祇管出生鐵。比已前價。各隨逐處。見定高低。每斤一例減十文貨賣。雜使熟鐵。亦任百姓自煉。巡檢節級。勾當賣鐵場官。併舖戶。一切並廢。鄉村百姓。祇於係省夏秋苗畝。上納農器錢。

一文五分足。隨夏秋稅二時送納。

晉天福六年八月勅節文。諸道鐵冶三司。先條流百姓農具破者。須於官場中賣鐵時。却於官場中買鐵。今後並許百姓取便鑄造買賣。所在場院不得禁止攪擾。

鹽鐵雜條上

後唐長興四年五月七日。諸道鹽鐵轉運使奏。諸道州府鹽法條流元末。一槩定奪。謹具如後。應食課鹽州府省司。各置權糶折博場院。應是鄉村。並通私商興販。所有折博。並每年人戶蠶鹽。並不許將帶一斤一兩入城。侵奪權糶課利。如違犯者。一兩已上至一斤。買賣人各杖六十一斤已上至三斤。買賣人各杖七十。三斤已上至五斤。買賣人各杖八十五斤已上至十斤。買賣人各徒二年。十斤已上。不計多少。買賣人各決脊杖二十處死。所有犯鹽人。隨行錢騾畜等。並納入官。所有元本家業莊田。如是全家逃走者。卽行點納。仍許搬載腳戶。經過店主。并御下人力等糾告。等第支與優給。如知情不告。與賣鹽人同罪。其犯鹽人經過處。地方門司。廂界巡檢節級所。由并諸色關連人等。不專覺察。委本州臨時斷訖報省。如是門司關津口鋪捉獲私鹽。卽依下項等第支給一半賞錢。一十斤已上至五十斤。支賞錢二十千。五十斤已上至一百斤。支賞錢三十千。一百斤已上。支賞錢五十千。應食末鹽地界州府縣鎮。並有權糶場院。久來內外禁法。卽未一概條流。應刮鹹煎鹽。不計多少斤兩。並處極法。并許四隣及諸色人等陳告。等第支給

賞錢。欲指揮此後犯一兩已上至一斤。買賣人等各杖六十。一斤已上至二斤。買賣人等各杖七十。二斤已上至三斤。買賣人各徒一年。三斤已上至五斤。買賣人各徒二年。五斤已上。買賣人各決脊杖處死。如是收到鹹土鹹水。卽委本處煎煉鹽數。準條科斷。或有已會違犯。不至死刑。經斷後。公然不懼條流再犯者。不計斤兩多少。所犯人並處極法。其權糶場院員僚節級人力煎鹹池客竈戶般鹽船綱押綱軍將衙官梢工等。具知鹽法。如有公然偷盜官鹽。或將貨賣。其買賣人及過鹽主人。知情不告。並依前項刮鹹例。五斤已上處死。其諸色關連人等。並合支賞錢。卽准洛京邢鎮條流事例指揮。顆末青白等鹽。元不許界分參雜。其顆鹽先許通商之時。指揮不得將帶入末鹽地界。如有違犯。一斤一兩。並處極法。所有隨行物色。除鹽外。一半納官。一半與捉事人充賞。其餘鹽色。未有畫一條流。其洛京并鎮定邢州管內。多有北京末鹽入界。捉獲並依洛京條流科斷。欲指揮此後。但是顆末青白諸色鹽侵界參雜。捉獲並準洛京條流施行。慶州青白權稅院。元有透稅條流。所有隨行驢畜物色。一半支與捉事人充賞。其餘一半并鹽並納入官。欲並且依舊一斗已上至三斗。杖七十。三斗已上至五斗。徒一年。五斗已上處死。安邑解縣兩池權鹽院。河南府節度使兼判之時。申到畫一事件條流等。準敕牒兩池所出鹽。舊日若無文榜。如擅將一斤一兩。準元敕條。並處極法。其犯鹽人。應有錢物。並與捉事人充賞者。竊以兩池荆棘峻阻。不通人行。四面各置場門弓射。分劈鹽池地分居住。並在棘圍裏面。更不別有差遣。祇令巡護鹽池。如此後有人偷盜官

鹽一斤一兩出池。其犯鹽人並準元敕條流處分。應有隨行錢物。並納入官。其捉事人。依下項定支授給。若是巡檢弓射池場門子。自不專切巡察。致有透漏到棘圍外。被別人捉獲。及有糾告兼同行反告。官中更不坐罪。陳告人亦依捉事人支賞。應有知情偷盜官鹽之人。亦依犯鹽人一例處斷。其不知情連人。臨時酌情定罪。所有透漏地方弓射池場門子。如是透漏出鹽二十斤已下。徒一年半。一十斤已上至二十斤。支賞錢十千。二十斤已上至五十斤。支賞錢二十千。五十斤已上至一百斤。支賞錢三十千。一百斤已上。支賞錢五十千。前項所定奪到鹽法條流。其應屬州府捉獲抵犯之人。便委本州府檢條流科斷。訖申奏。別報省司。其屬省院捉到犯鹽之人。干死刑者。卽勘情罪由犯。申上候省司指揮。不至極刑者。便委務司準條流。決放訖申報。從之。

五代會要卷二十七

鹽鐵雜條下

周廣順二年九月十八日敕。條流禁私鹽麴法如後。一諸色犯鹽麴所犯。一斤已下至一兩。杖八十。配役五斤已下。一斤已上。徒三年。配役五斤已上。並決重杖一頓處死。一應所犯鹽麴。關津門司廂巡門保知有透漏。並行勘斷。一刮鹹煎煉私鹽所犯。一斤已下。徒三年。配役一斤已上。並決重杖一頓處死。犯私鹽若捉到鹹水。祇煎成鹽。秤盤定罪。逐處凡有鹹鹵之地。所在官吏。節級所由。常須巡檢。村坊鄰保。遞相覺察。若有所犯處彰露。並行勘斷。一所犯私鹽。捉事告事人各賚賞錢。以係省錢充。至死刑者。賞五十千。不及死刑者。三十千。一顆末鹽。各有界分。若將本地分鹽。侵越疆界。同諸色犯鹽例科斷。一鄉村人戶所請蠶鹽。祇得將歸。裏實供食。不得別將轉易貨賣。投託與人。如違。並同諸色犯鹽例科斷。若是所請蠶鹽。道路津濟。須經過州府縣鎮。委三司。明行指揮。一凡買鹽麴。並須於官場務內買。若裏私投託興販。其買賣人。並同諸色犯鹽麴例。一諸官場官務。如有羨餘。出剩鹽麴。並許盡底到官。如裏私貨賣者。買賣人。並同諸色人犯鹽麴科斷。若鹽鋪酒店戶及諸色人。與場院裏私貨賣者。並同罪科斷。一所犯私鹽麴。有同情共犯者。若是骨肉卑幼奴婢同犯。祇罪家長主首。如家長主首不知情。祇罪造意者。餘減等科斷。若是他

人同犯。並同知情科斷遣。若與他人同犯。據逐人腳下所犯斤兩。依輕重斷遣。一州縣城鎮郭下人戶。係屋稅合請鹽者。若是州府。並於城內請給。若是外縣鎮郭下人戶。亦許將鹽歸家供食。仰本縣預取逐戶合請鹽數目。攢定文帳。部領人戶請給。勒本處官吏及所在場務同點檢入城。若縣鎮郭下人戶。城外別有莊田。亦仰本縣預前分劈開坐。勿令一處分給。供使一應諸道。今後若捉獲犯私鹽麪人。罪犯分明。正該條法。便仰斷遣。訖奏。若稍涉疑誤。祇須申奏取裁。

顯德二年八月二十四日。宣頭節文改正鹽法如後。一瞻國軍堂場務。邢洺州鹽務。應有見塚貯鹽貨處。並煎鹽場竈。及應是鹽地。並須四面修置牆塹。如是地里遙遠。難爲修置牆塹。卽作壕籬爲規隔。內偷盜夾帶官鹽。兼於壕籬外煎造鹽貨。便仰收捉。及許諸色人陳告。所犯不計多少斤兩。並決重杖一頓處死。其經歷地分及門司節級人員。並當量罪酌斷。所有捉事。告事人賞錢二十千。一斤已上至十斤。賞錢三十千。一十斤已上。賞錢五十千。一應有不係官中煎鹽處鹽地。並須標識。委本州府差公幹職員。與巡鹽節級。村保地主隣人。同共巡檢。若諸色人偷刮鹽地。便仰收捉。及許人陳告。若勘逐不虛。捉事人每獲一人。賞絹一十匹。獲二人。賞絹二十四匹。獲三人已上。不計人數。賞絹五十四匹。刮鹽煎鹽人。并知情人。所犯不計多少斤兩。並決重杖一頓處死。其刮鹽處地分。並刮鹽人住處。巡檢節級所由村保等。各徒二年半。令衆一月。依舊句當刮鹽處。地主不切檢校。徒二年。令衆一月。一顆鹽地分界內。有人刮鹽煎煉鹽貨所犯。

並依前法。一今緣改價賣鹽。慮有別界分鹽貨遞相侵犯。及將鹽入城諸色犯鹽人。今下三司。依下項條流科斷。其犯鹽人隨行物色。給與本家。其鹽沒納人官。所經歷地分節級人員。並行勘斷。一兩至一斤。決脊杖五十。令衆半月。捉事告事人賞錢五千。一斤已上至一十斤。徒一年半。令衆一月。捉事告事人賞錢七千。十斤已上。不計多少。徒二年。配發運務役一年。捉事告事人賞錢十千。一諸州府人戶所請蠶鹽。不得於鄉村衷私貨賣。及信團頭腳戶縣司請鹽。節級所由等剋折糶賣。如有犯者。依諸色犯鹽例科斷。一如有入於河東界將鹽過來。自家界內有人往彼與販鹽貨。所犯者並處斬。其犯鹽人隨行驢畜資財。並與捉事人充賞。

漕運

後唐同光三年閏十二月。吏部尙書李琪上疏曰。臣伏思漢文帝時。欲人務農。乃募人入粟。得拜爵及贖罪。景帝亦如之。後漢安帝時。水旱不足。三公奏請富人入粟。得封關內侯。及公卿已下散官。本朝乾元中。亦曾如此。今陛下縱不欲入粟授官。願降明敕。下諸道。合差百姓轉般之處。有能出力運官物到京者。五百石已上。白身授一初任州縣官。有官者依資次遷授。次選者便與放選。千石已上至萬石者。不拘文武。顯示賞酬。免令方春農人流散。此亦轉倉贍軍之一術也。敕李琪所論。召募轉倉斛斗與官行賞。委租庸司下諸州府。有應募者。奏聞施行。

長興二年五月三日敕。應沿河船般倉。依北面轉運司船般倉例。每一石於數內與正銷破二升。

四年三月三日。三司奏洛河水運。自洛口至京往來牽船下卸。皆是水運。牙官每人管定四十石。今洛岸至倉口稍遠。牙官運轉艱難。近日例多逃走。今欲於洛河北岸。別鑿一灣引船。直至倉門下卸。其工欲於

諸軍僦人內差借。從之。尋命捧聖衛指揮使朱洪實鑿開河灣至贍國倉門。

周顯德二年正月上。謂侍臣曰。轉輸之物。向來皆給斗耗。自漢以來。不與支破。倉廩所納新物。尙破省耗。況水路所般。豈無損失。今後每石宜與耗一斗。

四年四月詔疏下汴水一派。北入於五丈河。又東北達於濟。自是齊魯之舟楫。皆至京師。

六年二月。命侍衛馬軍指揮使韓令坤。自京東流下汴水入於蔡河。侍衛步軍都指揮使袁彥。浚五丈河。以通漕運。

倉

梁開平四年五月。敕補開封府及河南河北倉吏。非舊典也。

後唐天成二年六月二十九日。戶部奏先準天成元年五月十五日敕。檢納夏秋苗子斛斗。每斗祇納一斗。官中納不收耗。人戶送納之時。如有使官布袋者。每一布袋。使百姓納錢八文。內五文與擎布袋人。餘三文。卽與倉司充吃食鋪襯紙筆盤纏。若是人戶出布袋。令祇納三文與倉司。

長興二年閏五月三日敕諸道州府所納兩稅斛斗今後每斗上納加耗二合準備倉司耗折其收到布袋錢仰官典同共繫署一一分明上歷支緡。

晉天福八年五月十五日三司奏天下今後諸倉請據人戶元納耗二升內一升依舊送納本色充備鼠雀耗折一升卽令人戶送納價錢兩文足與元納錢八文足共一十文足充備倉夫斗袋人夫及諸色吃食紙筆鋪襯盤纏支費從之。

周廣順元年正月勅節文其諸道州府倉場庫務宜令節度使刺史專切鈐轄掌納官吏一依省條指揮不得別納斗餘秤耗舊來所進羨餘物今後一切停罷。

疏鑿利人

周顯德五年十一月以尙書司勳郎中何幼冲爲關西渠堰使命於雍耀二州界疏涇水以溉田。

閉糶

後唐同光三年閏十二月十九日敕今歲自京已東水澇爲患物價騰湧人戶多於西京收糶斛斗近聞京西諸道州府逐道皆有稅錢遂不通行乃同閉糶宜令宣下京西諸道州府凡閉糶斛斗不得輒有稅錢及經過水陸關防鎮縣妄有邀難。

周廣順元年四月敕天灾流行分野代有苟或閉糶豈是愛人宜令沿淮渡口鎮浦不得止淮南人糶易。

三年七月敕沿淮諸州點檢淮南人所糴量倉。如是以驢羸爲馱及負擔過。卽放過。不得以舟車輦運過淮。先是淮南大旱。井泉涸竭。太祖愍之。命許博糴。至是聞吳人收糴入官。以備軍倉。詔止輦運過者。

泉貨

後唐同光二年三月敕。泉布之弊。雜以鉛錫。惟是江湖之外。盜鑄尤多。市肆之間。公行無畏。因是綱商夾帶舟載往來。換易好錢。藏貯富室。實爲蠹弊。須有條流。宜令京城及諸道行市行使錢內。點檢雜惡鉛錫。並宜禁斷。沿江州縣。每有舟船到岸。嚴加覺察。若私載往來。並宜收納。

天成元年八月中書門下奏。訪聞近日諸道州府所買賣銅器價貴。多是銷鎔見錢。以邀厚利。勅宜便行曉告。如原舊破損銅器及碎銅。卽許鑄造器物。如生銅器物。每斤價定二百。熟銅器物。每斤四百。如違省價買賣之人。依盜鑄錢律文科斷。其年十一月六日勅諸道州府約勒見錢。素有條制。若全禁斷。實匪通規。宜令遍指揮三司及諸道州府。其諸城門所出見錢。如五百已上。不得放出。如稍違犯。卽準舊條指揮。其沿淮諸州縣鎮。亦準元降勅命處分。其年十二月敕行使銅錢之內。訪聞夾帶鐵鑼。若不嚴設條流。轉恐私家鑄造。應中外所使銅錢內鐵鑼錢。卽宜毀棄。不得輒更有行。如違其所使錢不計多少。並納入官。仍科深罪。

二年七月十二日度支奏。三京鄴都並諸道州府市肆買賣所使見錢等。每有條章。每陌八十文。近訪聞

在京及諸道街坊市肆人戶。不願條章。皆將短陌。轉換長錢。但恣欺罔。殊無畏忌。若不條約。轉啓倖門。請更嚴降指揮。及榜示管界州府縣鎮軍人百姓商旅等。凡有買賣。並須使八十陌錢。兼令巡司廂界節級所由。點檢覺察。如有無知之輩。依前故違。輒將短錢興販。便仰收捉。委逐州府枷項收禁。勘責所犯人。準條奉處斷訖。申奏。其錢盡底沒納入官。奉勅。宜依度支所奏。

四年九月勅。先條流三京諸道州府。不得於市使錢內。夾帶鉛鐵錢。雖已約束。仍聞公然行使。今後有人於錢陌內。捉到一文至兩文。所使錢不計多少。納官。所犯人。準條流科罪。

清泰二年十二月勅。御史臺宜曉告中外。不得使用鉛錢。如違犯者。準條流處分。

晉天福三年三月勅。歷代鑄錢。濟時爲寶。久無監務。已絕增添。近來趨利之人。違法甚衆。銷鎔不已。毀盡日滋。禁制未嚴。奸弊莫止。須行重法。以息濫源。宜令鹽鐵使禁止私下行造鑄寫銅器。其年十一月詔曰。國家所資。泉貨爲重。銷盡則甚。添鑄無聞。爰降條章。俾臻富庶。宜令三京鄴都諸道州府。無問公私。應有銅者。並許鑄錢。仍以天福元寶爲文。左環讀之。委鹽鐵司鑄樣。頒下諸道。令每一錢重二銖四參。十錢重一兩。或慮諸色人接便。將鉛鐵鑄造。雜亂銅錢。仍令三京鄴都諸道州府。依舊禁斷。尙慮逐處銅數不多。宜令諸道。應有久廢銅冶處。許百姓取便開鍊。永遠爲主。官中不取課利。其有生熟銅。仍許所在。中賣入官。或任自鑄錢行用。其餘許鑄外。不得輒便雜鑄銅器。如有違犯者。並準三年三月敕條處分。其年十二

月敕先許鑄錢仍每一錢重二銖四參十錢重一兩切慮逐處缺銅難依先定銖兩宜令天下無問公私應有銅處有鑄錢者一任取便酌量輕重鑄造因茲不得入鉛并鐵及缺漏不堪久遠流行仍委鹽鐵使明行曉示餘準元敕指揮仍付所司

四年七月敕先令天下州府公私鑄錢近聞以鉛錫相參缺薄小弱有違條制不可久行前後祇官鑄錢私鑄錢下禁依舊法

周廣順元年三月二十八日勅銅法今後官中更不禁斷一任興販所有錢一色卽不得銷鑄爲銅器貨賣如有犯者有人糾告捉獲所犯人不計多少斤兩並處死其地分所由節級徒一年鄰保人杖七十其告事人給與當錢一百貫

顯德二年九月一日勅國家之利泉貨爲先近朝已來久絕鑄造至於私下不禁銷鑄歲月漸深奸弊尤甚今採銅興冶立監鑄錢冀便公私宜行條制起今後除朝廷法物軍器官物及鏡並寺觀內鍾磬鉦相輪火銖鈴鐸外其餘銅器一切禁斷應兩京諸道州府銅象器物諸色裝鉸所用銅限敕到五十日內並須毀廢送官其私下所納到銅據斤兩給付價錢如出限有隱藏及埋窖使用者一兩至一斤所犯人及知情人徒二年所由節級四鄰杖七十捉事告事人賞錢十貫一斤至五斤所犯及知情人各徒三年所由節級四鄰杖九十捉事告事人賞錢二十貫五斤已上不計多少所犯人處死知情人徒三年配役一

年所由節級四鄰杖一百。捉事告事人賞錢三十貫。其人戶若納到熟銅。每斤官中給錢一百五十。生銅每斤一百。其銅鏡令官中鑄造。於東京置場貨賣。許人收買。於諸處興販。其朝廷及諸州見管法物軍器官物。舊用銅製造并裝飾者。候經使用破壞。即時改造。仍今後不得更使銅。內有合使銅者。奏取進止。四年二月十一日。宣命指揮限外。有人將銅器及銅。於官場貨賣。支給價錢。如是隱藏及使用者。並準元勅科斷。其熟銅令每斤添及二百。生銅每斤添及一百五十收買。所有諸處山場野務。採鍊陶沙到舊例。銅每二十兩爲一斤。今特與十六兩爲一斤。給錢一百三十收買。兼知高麗多有銅貨。仍許青登萊州人戶興販。如有將來中賣入官者。便仰給錢收買。卽不得私下買賣。

諸色料錢上

梁開平三年正月詔曰。祿俸所以養賢而勵奉公也。朕今肇建諸色。已畢郊禋。職貢至多。費用差少。其百官俸料。委左藏庫依例全給。

後唐同光三年二月十九日。租庸院奏新定四京及諸道副使判官已下俸料。請降勅各下逐處支遣。兼除所置副使判官掌書記推官外。如本處更妄稱簡署官員。卽勒本道節度使自備請給。不得正破係省錢物。諸道藩鎮。請祇置節度副使節度觀察判官掌書記推官共五員。節度副使料錢每月四十千。依除實數錢廚料米一石。麪二石。內價錢三千。蒿六十束。柴三十束。春服絹一十五疋。冬服絹一十五疋。綿三

十兩。私馬二匹。草料節度觀察判官料錢。每月三十千。依除實錢廚料米六斗。麪一石六斗。內價錢二千。蒿四十束。柴二十束。春服絹一十二疋。冬服絹一十二疋。綿二十五兩。私馬一匹。草料節度掌書記料錢。每月二十五千。依除實錢廚料米六斗。麪一石二斗。內價錢一千五百。蒿三十束。柴一十五束。春服絹一十疋。冬服絹一十疋。綿二十兩。私馬一匹。草料節度推官料錢。每月一十五千。依除實錢廚料米六斗。麪一石二斗。內價錢一千五百。蒿三十束。柴一十五束。春服絹一十疋。冬服絹一十疋。綿二十兩。私馬一匹。草料留守兼判六軍。請置副使判官推官三員。副使依節度副使例。判官依觀察判官例。推官依諸道推官例。留守不判六軍。請置判官推官二員。判官依節度觀察判官例。推官依諸道推官例。四京府請祇置推官一員。如已有判官。卽不置推官。其請受準留守推官例。其料錢準百官例折支。所有廚料時服等。卽給本色。右奉敕。宜令諸道節鎮。依舊更置觀察支使一員。其俸料春冬衣賜。仍準掌書記例支遣。餘依租庸院所奏。

五代會要卷二十八

諸色料錢下

後唐同光三年二月十五日。租庸院奏。諸道州縣官并防禦團練副使判官等俸料。各據逐處具到事例。文帳內點檢舊來支遣。則例錢數不等。所給折支物色。又加錢數不定。難爲勘會。今除東京管內州縣官見支手支課錢。且依舊外。其三京併諸州。於舊日支遣錢數等第。重定則例。兼切循本朝事體。防禦團練副使判官外。其餘推巡已下職員。皆是本處自要辟請。圓融月俸贍給。亦乞依舊規繩。省司更不支給錢物。謹具如後。防禦團練副使判官副使。逐月料錢三十千貫。判官逐月二十千貫。刺史州元兼副使。有者請廢其軍事判官。所有月俸。亦是刺史已俸內支贍。三京少尹支料錢逐月三十千貫。赤縣令每月正受支料錢二十五千貫。考滿并攝。比正官支一半。主簿每月正授支料錢一十二千貫。考滿并攝。比正官支一半。畿縣令每月正授支料錢二十千貫。考滿并攝。比正官支一半。主簿每月支料錢一十千貫。考滿并攝。比正官支一半。司錄參軍每月正授支料錢一十三千貫。考滿并差攝。比正官支一半。諸曹判司官每月正授支料錢一十二千貫。考滿并差攝。比正官支一半。文學每月正授支料錢五千貫。考滿并差攝。比正官支一半。參軍每月正授支料錢五千貫。考滿并差攝。比正官支一半。諸州府錄事參軍。各依逐州上

縣令支州判司各依逐州上縣主簿支一萬戶已上縣令每月正授支料錢二十三千貫。考滿并差攝。比正官支一半。主簿每月正授支料錢一十三千五百貫。考滿并差攝。比正官支一半。九千戶已上縣令每月正授支料錢二十二千貫。考滿并差攝。比正官支一半。主簿每月正授支料錢一十二千貫。考滿并差攝。比正官支一半。八千戶已上縣令每月正授支二十一千貫。考滿并差攝。比正官支一半。主簿每月正授支一十一千五百貫。考滿并差攝。比正官支一半。七千戶已上縣令每月正授支二十千貫。考滿并差攝。比正官支一半。主簿每月正授支一十一千貫。考滿并差攝。比正官支一半。六千戶已上縣令每月正授支一十九千貫。考滿并差攝。比正官支一半。主簿每月正授支一十千五百貫。考滿并差攝。比正官支一半。五千戶已上縣令每月正授支一十八千貫。考滿并差攝。比正官支一半。主簿每月正授支一十千貫。考滿并差攝。比正官支一半。四千戶已上縣令每月正授支一十七千貫。考滿并差攝。比正官支一半。主簿每月正授支九千五百貫。考滿并差攝。比正官支一半。三千戶已上縣令每月正授支一十六千貫。考滿并差攝。比正官支一半。主簿每月正授支九千貫。考滿并差攝。比正官支一半。二千五百戶已上縣令每月正授支一十五千貫。考滿并差攝。比正官支一半。主簿每月正授支八千五百貫。考滿并差攝。比正官支一半。二千戶已上縣令每月正授支一十四千貫。考滿并差攝。比正官支一半。主簿每月正授支八千貫。考滿并差攝。比正官支一半。一千五百戶已上縣令每月正授支一十三千貫。考滿并差攝。比正

官支一半。主簿每月正授支七千五百貫。考滿并差攝。比正官支一半。一千戶已上縣令。每月正授支一十二千貫。考滿并差攝。比正官支一半。主簿每月正授支七千貫。考滿并差攝。比正官支一半。五百戶已上縣令。每月正授支一十一千貫。考滿并差攝。比正官支一半。主簿每月正授支六千五百貫。考滿并差攝。比正官支一半。五百戶已下縣令。每月正授支一十千貫。考滿并差攝。比正官支一半。主簿每月正授支六千貫。考滿并差攝。比正官支一半。右租庸使奏重定料錢。則例如前。如諸道舊有取田處。今後不得占留開破。並依百姓例輸稅。奉敕。宜依。

長興二年閏五月。起居郎曹琛奏。文武兩班。或請假歸寧。或臥疾未損。才注班簿。便住料錢。伏乞特降敕命者。敕今後文武官請準式歸寧。假及病疾者。並許支給本官料錢。其月二十四日。敕諸道行軍司馬副使判官已下賓寮等。考滿未得替人。宜令並全支俸料。元不在省司給俸者。不在此例。

清泰元年七月。勅洋王從璋。涇王從敏。每月各給料錢一百千。米麥各五十石。僦人衣糧各五十分。馬五

十五匹。草粟。

二王自方鎮入朝。留洛陽私第。故有是給賜。

二年十月。將作監丞襲封介國公。宇文頡奏。蒙恩襲封除官。無襲爵俸給。詔特給本官俸。晉天福六年二月。敕諸衛上將軍。逐月加俸錢二萬。

漢乾祐三年七月十六日。敕節文。諸道州府令錄判官主簿。宜令等第支與俸戶。逐戶每月納錢五百。與

除二稅外。免放諸雜差遣。不得更種職田。所定俸戶。於中等無色役人戶內置。不得差令當直。及赴衙參。如有闕額及不逮。明申州府差填。不得衷私替換。若是令錄判司主簿。除本分人數外。剩占俸戶。及令當直手力。更納料錢。並許百姓陳告。其陳告人與免戶。下諸雜差徭。所犯人追毀告身。更加力役。如令佐錄事參軍內有員闕。州府差攝。亦依例支與俸錢。差攝曹官。不得一例供破。定例如後。三千戶已上縣令。逐月一十二千。主簿六千。二千戶已上至三千戶已下縣令。九千。主簿五千。一千戶已下縣令。六千。主簿四千。錄事參軍判司。依本部內戶口。取最多縣分例支破。其錄事參軍。依縣令例。判司依主簿例。

周廣順元年四月。勅牧守之任。委遇非輕。分憂之務。既同。制祿之數。宜等。自前有富庶之郡。請給則優。或邊遠之州。俸料數薄。以至遷除之際。擬議亦難。既論資序之高卑。又患祿秩之升降。宜分多益寡。均利同恩。冀無黨偏。以勸助故。今重定則例。諸州防禦使。料錢二百千。祿粟一百石。食鹽五石。馬十四草粟。元隨三十人衣糧。團練使。料錢一百五十千。祿粟七十石。食鹽五石。馬十四草粟。元隨三十人衣糧。刺史。料錢一百千。祿粟五十石。食鹽五石。馬五匹草料。元隨二十人衣糧。仍取今年五月一日後到任者。依前定例支。其已前在任者。所請如故。

顯德五年十二月。中書奏。諸道州府縣官及軍事判官。一例逐月各據逐處主戶等第。依下項則例所定。料錢及米麥等。取顯德六年三月一日後起支。其俸戶並停廢。一萬戶已上縣令。逐月料錢二十千。米麥

共五石。主簿料錢一十二千。米麥共三石。七千戶已上縣令。逐月料錢一十八千。米麥共五石。主簿料錢一十千。米麥共三石。五千戶已上縣令。逐月料錢一十五千。米麥共四石。主簿料錢八千。米麥共三石。三千戶已上縣令。逐月料錢一十二千。米麥共四石。主簿料錢七千。米麥共三石。不滿三千戶縣令。逐月料錢一十千。米麥共三石。主簿料錢六千。米麥共二石。五萬戶已上州司錄事參軍。及兩京司錄。每月料錢二十千。米麥共五石。司戶司法每月料錢一十千。米麥共三石。三萬戶已上州司錄事參軍。每月料錢一十八千。米麥共五石。司戶司法每月料錢八千。米麥共三石。一萬戶已上州司錄事參軍。每月料錢一十五千。米麥共四石。司戶司法每月料錢七千。米麥共三石。五千戶已上州司錄事參軍。每月料錢一十二千。米麥共四石。司戶司法每月料錢六千。米麥共二石。不滿五千戶州司錄事參軍。每月料錢一十千。米麥共三石。司戶司法每月料錢五千。米麥共二石。諸司軍事判官。一例每月料錢一十千。米麥共三石。右諸州府京百司內諸司州縣官課戶莊戶俸戶柴炭紙筆戶等。望令本州及檢田使臣。依前項指揮。勒歸州縣。候施行畢。具戶數奏聞。仍差本州判官精細點數。後差使臣覆視。及有人論訴。稱有漏落。抵罪在本州判官。及干係官典。如今後更有人戶願充此等戶者。便仰本州勒充軍戶。配本州牢城執役。從之。六年十二月詔。諸道州府攝官。起今後支給本所諸官俸錢之半。

回鶻

回鶻本牙在天德西北。娑陵水上。距長安六千九百里。唐天寶中。安祿山犯闕。有助國討賊之功。累朝尙主。自號天驕。會昌初。其國爲黠戛斯所侵。部族擾亂。乃移帳至天德振武間。又爲石雄劉沔所襲。破之。復爲幽州節度使張仲武所攻。餘衆西奔。歸於吐蕃。吐蕃處之甘州。其後時通中國。世以中國爲舅。朝廷每賜書詔。亦嘗以甥呼之。

梁乾化元年十一月。遣都督周易言等入朝進貢。太祖御朝元殿引對。以易言爲右監門衛大將軍同正。弟略麥之石論思。並爲左千牛衛將軍同正。李屋珠安鹽上。並爲右千牛衛將軍同正。仍以左監門衛上將軍楊沼爲左驍衛上將軍。充押領回鶻還番使。通事舍人仇玄通爲判官。厚錫繒帛。押領歸國。又賜其入朝僧凝盧宜年思宜延錢等紫衣。

後唐同光二年四月。其本國權知可汗仁美。遣都督李引釋迦副使田鐵林都監楊福安等。共六十六人來貢方物。并獻善馬九匹。莊宗召對於文明殿。乃命司農卿鄭質將作少監何延嗣。持節冊仁美爲英美可汗。至其年十一月仁美卒。其弟狄銀嗣立。遣都督安千等來朝貢。狄銀卒。呵咄欲立。亦遣使來貢名馬。大成三年二月。其權知可汗仁裕。遣都督李阿山等一百二十人入貢。明宗召對於崇元殿。賜物有差。其年三月。命使冊仁裕爲順化可汗。四年正月。又遣都督掣撥等五人來朝貢。授掣撥等懷化司戈。遣令還。長興元年十二月。遣使翟來思三十餘人。進馬八十四。玉一團。四年七月。復遣都督李末等三十人入朝。

進白鶴一聯。明宗復召對於廣壽殿。厚加錫賚。仍命解放其鶴。

清泰二年七月。遣都督陳福海已下七十人。進馬三百六十四。玉二十團。至八月。敕回鶴朝貢使密錄都督陳福海可懷化郎將。副使達奚相溫可懷化司階。監使屈密錄阿撥可歸德司戈。判官安均可懷化司戈。

晉天福三年十月。遣使都督李萬全等朝貢。以萬全爲歸義大將軍。監使雷福德爲順化將軍。

四年三月。又遣都督拽里敦來朝。兼貢方物。其月命衛尉卿邢德昭持節就冊爲奉化可汗。五年正月。遣都督石海金等來貢良馬百匹。并白玉團。白玉鞍轡等。謝其封冊。

漢乾祐元年五月。遣使李屋等入朝貢方物。並白玉藥物等。七月。以入朝使李屋爲歸德大將軍。副使安鐵山監使朱相溫。並爲歸德將軍。判官翟毛歌爲懷化將軍。

周廣順元年二月。遣使並麾尼貢玉團七十七。白氍毹。牛尾藥物等。先是晉漢已來。回鶻每至京師。禁入官私下市易者罪之。至是太祖命除去舊法。每回鶻來者。私下交易。官中更不禁詰。由是玉之價直十損七八。

顯德六年二月。又遣使朝貢獻玉并礪砂等物。皆不納。所入馬量給價錢。時上以玉雖珍寶。無益國用。故因而却之。

吐渾

吐渾。本吐谷渾也。唐咸通中。會長有赫連鐸者。從太原節度使康承訓平徐方有功。朝廷授振武節度使。

復盜據雲中。後唐太祖逐之。乃歸幽州。李匡濤其部族散居蔚州界。互爲酋長。其氏不常有白承福者。自同光初代爲都督。依中山地石門爲柵。莊宗賜其額爲寧朔奉化兩府。以都督爲節度使。仍賜承福姓李名紹魯。其畜牧就善水草。丁壯常數千人。羊馬生息。入市中土。朝廷常存恤之。

後唐天成三年二月。其都督李紹魯等遣使進馬一百二十四匹。明宗嘉之。賜紹魯竭忠建策興復功臣金紫光祿大夫檢校太保。至四年八月。其首領念公山來朝貢。其年十月。別部首領薛冀堆進狀。乞授嵐州刺史。明宗在藩時。常與冀堆有舊。欲許之。樞密使安重誨力諫乃止。至長興元年三月。竟以冀堆爲嵐州刺史。仍賜名萬通。

清泰三年二月。以寧朔奉化兩府留後白可久。超授檢校司徒。副使赫連海龍。檢校尙書左僕射。兩府大夫李鐵匱。檢校尙書右僕射。

晉天福元年。高祖以契丹有助立之功。割鴈門已北及幽州之地以賂之。由是吐渾部族皆隸於契丹。其後苦契丹之虐政。部族皆怨之。復爲鎮州節度使安重榮所誘。乃背契丹。率車帳羊馬。取五臺路歸國。契丹大怒。以朝廷招納叛亡。遣使責讓。至六年正月。晉高祖命供奉官張澄等率兵二千。搜索并鎮忻代四州山谷中吐渾。還其舊地。然亦以契丹誅求無厭。心不平之。命漢高祖出鎮太原。潛加撫慰。其年五月。其大首領白承福及麾下念虎里赫連功德等來朝。九月。又遣首領白可久來朝。少主嗣位。絕契丹之好。數

召其酋長入朝。厚加宴賜。每大讌會。皆命列坐於勛臣之次。至開運中。捍虜於澶州。召承福等率其部衆。從行。屬歲多暑熱。部下多死。復遣歸太原。移帳於嵐石州界。然承福馭下無法。多干軍令。其子族白可久。名在承福之亞。因牧馬率本帳北遁。契丹授以官爵。復遣潛誘承福。承福亦思叛去。事未果。漢高祖知之。乃以兵環其部族。擒承福與族白鐵櫃赫連海龍等五家。凡四百餘人。伏誅。籍其牛馬。命別部長王義宗統其餘屬。

奚

奚本匈奴別種。卽東胡之地。人物風族。與突厥同。族有五姓。一曰阿薈部。管縣六。二曰啜米部。管縣四。三曰輿質部。管縣六。四曰奴皆部。管縣四。五曰黑訖支部。管縣三。每部有刺史。每縣有令。酋長號奚王。唐制兼饒樂府都督。居陰涼州。東去營府五百里。南去幽州九百里。幽州置饒樂府長史一人。以監之。人馬約二萬。後徙居琵琶川。在幽州東北數百里。出古北口地。宜羊馬。羊則純黑。馬趨前蹄堅。善走。以馳獵爲務。逐獸高山。自下而上。其勢若飛。語與契丹小異。饜以平底瓦鼎。煮糲爲粥。旣飪。以寒冰解之而食。每春借邊民之荒田種糲。秋熟乃來。持穫畢。則窖於山下。人莫知其處。所以木爲碓。斷椽爲臼。所受不過一斗。自天祐初。契丹兵力漸盛。室韋奚羣皆受制焉。故奚之部族爲契丹代守邊土。暨虜人虐其首領。去諸怨之。以別部內附。徙於媯州。依北山而居。漸至數千帳。故有東西奚之號。去諸卒。其子埽刺代立。後唐莊宗破

幽州賜埽刺姓李名紹威。

後唐同光元年十二月遣使朝貢。三年九月以莊宗誕節至遣使表貢方物。

天成四年埽刺因剪爪傷乃卒。其子素姑代立亦時遣使入朝。

清泰三年七月其首領達刺千遣通事介老奏其王素姑謀叛欲附契丹已處置訖。權知部落廢帝降詔以慰撫之。

晉天福元年高祖以契丹有助立之功割雁門已北及幽州之地以賂之。由是奚之部族復隸於契丹。自後常爲契丹之所役屬。開運三年十二月契丹犯闕其王拽刺以所部兵屯於洛陽及虜主死隨衆北遁。

五代會要卷二十九

契丹

契丹。本鮮卑之種也。居遼澤之中。潢水之南。遼澤去榆關一千一百二十里。榆關去幽州七百一十四里。其地東南接海。東際遼河。西北包冷陁。北界松陁山川。東西三千里。地多松柳。澤饒蒲葦。其族本姓大賀氏。後分爲八部。一曰旦利皆部。二曰乙室活部。三曰實活部。四曰衲尾部。五曰頻沒部。六曰內會雞部。七曰集解部。八曰奚盟部。管縣四十一。每部有刺史。每縣有令。會長號契丹王。唐制兼松漠府都督。幽州置松漠府長史一人監之。其後諸姓不常。唐會昌中。幽州節度使張仲武表其王屈戌。請賜印篆。爲奉國契丹之印。朝廷從之。其八族長皆號曰大人。稱刺史。內推一人爲王。建旗鼓以尊之。每三年第其名以代之。唐末有邪律阿保機者。怙強好勇。不受諸侯之代。吞侵隣部。兵力漸盛。嘗與後唐太祖會盟於雲中。結爲兄弟。其後僭稱帝號。以妻述律氏爲皇后。燕人韓延徽爲宰相。法令嚴明。諸部皆畏伏之。

梁開平元年四月。遣其首領袍笏梅老等來貢方物。至二年二月。其主阿保機又遣使來貢良馬。五月又遣使解里貢細馬十四。金花鞍轡。貂鼠皮裘并冠。男口一年十歲。名曰蘇。女口一年十一歲。名曰警。其妻述律氏貢朝霞錦。前國王欽德并其大臣。皆有貢獻。太祖命司農卿渾特。右千牛衛將軍郎公遠充使就

本國宣諭

三年閏八月。又遣首領葛祿來貢方物。太祖御文明殿。召葛祿等五十人。張讌賜金帛有差。至五年四月。又遣使實柳梅老來朝貢。

後唐同光二年三月。阿保機率所部入寇新城。其年七月。又率兵東攻渤海國。至九月。爲鄰部室韋女貞回鶻所侵。十二月。又入寇嵐州。三年二月。復入寇幽州。爲王師所敗。俘其首領衢多等。其年五月。又遣使拽鹿孟等來貢方物。

四年正月。阿保機復寇渤海國。又遣梅老鞮里已下三十七人。貢馬三十四匹。許脩和好。

天成元年九月。攻渤海國扶餘城。下之。命其長子突欲爲國主。號東丹王。其月二十七日。阿保機得疾而死。第二子元帥太子德光嗣立。德光本名曷屈之。慕中國之名。故改爲德光。初阿保機有三子。長號人皇王。次號元帥太子。次曰安端少君。及阿保機死。其妻述律氏。令第二子元帥太子德光。勾當兵馬。令少子安端少君。往渤海國代突欲。將立爲嗣。而元帥太子素爲部族所敬。又其母述律氏。亦常鍾愛。故因而立之。僞稱天顯元年。尋葬阿保機於西樓。番中地名僞諡大聖皇帝。其年十月。遣使設骨餒來告哀。明宗輟其月十九日朝參以禮之。其月僞平州守將領幽州節度使盧文進。率戶口兵馬車帳來降。至二年十一月。又遣使梅老等二十餘人朝貢。兼申和好之意。明宗命飛勝指揮使安念德。齎錦綺綾羅及金花銀器寶裝。

酒器等賜之。又賜其母述律氏繡被一張，并寶裝瓔珞。至三年正月，復入寇，陷平州而去。至其年五月，定州節度使王都叛命，潛相連構。其主德光遣首領禿餒，率雜虜數千騎入定州。至七月，又遣首領惕懾等，率七千餘騎來援，尋爲行營招討使王晏球等逆戰破之，勦戮甚衆。餘黨復爲幽州節度使趙德鈞襲之，殺獲殆盡，擒其首領惕懾等。其月王晏球又獲契丹絹書二封來進。明宗命宣示羣臣，莫有識其文字者。契丹本無文記，唯刻本爲信。漢人陷番者，以隸書之半，就加增減，撰爲胡書。同光之後，稍稍有之。其年八月，幽州部送所獲番將惕懾，已下六百餘人至京師。明宗皆赦之，選其尤壯健者立爲契丹，直其首領皆賜姓吉。時言事者以爲胡人悻戾，不可置於君側。俄而有首領吉趙實自京遁歸，奪船過河，至深州捕獲斬之。至其年閏八月，僞平州刺史張希崇來降。四年三月，定州行營招討使王晏球擒禿餒等二十餘人，獻於闕下，悉命戮之。

長興元年十一月，契丹渤海東丹王突欲，率番官四十餘人，馬百匹，自登州泛海內附。明宗御文明殿，召對及其部曲慰勞久之，賜以衣冠金玉帶鞍馬錦綵器物等。突欲進本國印三面，宣示宰臣。其年十二月，中書門下奏契丹國東丹王突欲，遠泛滄溟，來歸皇化，請賜姓名。仍准番官入朝例安排。謹按四夷入朝番官，有懷德懷化歸德歸化等將軍中郎將名號。又本朝賜新羅渤海兩番國王官，初自檢校司空至太保。今突欲是阿保機之子，請比新羅渤海王例施行。敕渤海國王人皇王突欲契丹，先收渤海國，改爲東

丹其突欲宜賜姓東丹名慕華授光祿大夫檢校太保安東都護兼御史大夫上柱國渤海郡開國公食邑一千五百戶充懷化軍節度瑞慎等州觀察處置押番落等使

二年九月復姓李名贊華三年五月授滑州節度使爲廢帝所殺

至二

年其契丹王母述律氏以其子突欲歸國遣使朝貢明宗深慰納之至三年三月禮賓使梁進德自契丹

報聘迴稱其王請放薊刺舍利還本國

薊刺亦定州所獲番將也

又稱去年十二月十二日其王帳前有大星晝隕聲

若雷震其月又遣使鐵葛羅卿進馬三十匹亦求薊刺歸國故也五月鐵葛羅卿迴明宗欲放薊刺等令

歸大臣爭之未決會幽州節度使趙德鈞上表論奏及易州刺史楊檀皆言不可遣其事乃止仍遣薊骨

舍利隨其使歸不欲全阻其請也其年七月又遣使都督述祿進馬三十匹

清泰三年五月晉高祖起義於太原九月官軍集於城下晉乃間道發使召德光爲援是月德光率部落

五萬餘騎至太原城下尋敗招討使張敬德楊光遠之兵降晉安大砦

晉天福元年十一月高祖踐位以德光有援助之力歃血爲盟結爲父子仍約歲輸絹十三萬匹割鴈門

已北及幽州所屬縣並隸番界德光又率兵迓高祖於潞州紮幽州節度使趙德鈞并其子樞密使趙延

壽而迴二年二月德光遣使子解里舍利梅老來聘三年十月又遣使來上尊號曰英武明義晉祖繼命

宰臣馮道趙瑩劉昫等齎寶貨珍幣歲時進貢不絕德光亦遣名王已下來至六年六月節度使安重榮

執契丹使拽刺等以輕騎掠幽州之南界高祖累遣中使齎詔開諭以契丹有助王之功不欲負其宿約

而重榮奸險肆志。竟誅拽刺等。馳檄天下。言契丹之罪惡。與襄州節度使安從進。連謀不軌。高祖命杜重威率兵討之。至貝州宗城縣相遇。重榮之衆大敗。至七年正月二日。收復鎮州。斬重榮首。漆之。送於契丹。至其年四月。高祖不豫。六月崩。少帝嗣立。八月。遣使郎五來致吊。兼獻衣服鞍馬等。至十月。又遣使大卿已下二十六人來聘。以高祖山陵有日。致祭故也。至九年正月。德光遣趙延壽。趙延照等。率兵五萬入寇。貝州少帝發兵屯守澶州。初。青州節度使楊光遠。構逆謀。乃繕治城隍。蓄聚芻粟。爲跋扈之計。屬歲不稔。餓殍相繼。朝廷以廩帑虛竭。軍用不給。仍發使郡縣。括借民家資財斛斗。海內嗷嗷。不堪其命。光遠遂以重利誘德光入寇。又以趙延壽等。皆中原人士。常有思歸之意。計羣匈盜國。晉祚不濟。則大福在己。其月。德光自河間率諸部兵入犯甘陵。陷之。巡檢使吳蠻。投井而死。河北大擾。少帝駐蹕澶州。命宋州節度使高行周等將兵以禦之。三月。德光自領雜虜十餘萬。來攻戚城。官軍拒之而退。又以趙延壽行魏博節度使。改封魏王。以延壽門人高融爲節度副使。統步奚及燕軍數萬營於南樂。四月。又陷德州博州。其年十二月。德光又率衆南下。攻圍鎮州諸邑。皆陷之。

開運二年二月。前鋒至邢州。鎮州節度使杜重威。差人間道告急。少帝欲親率大軍。渡河決戰。乃命鄆州節度使張從恩等將兵。合諸將之師。屯於邢州。時德光之衆。已及魏府。建牙於元氏。從恩等引軍而退。其月。又陷邢州。刺史沈斌死之。至三月。德光退。杜重威等率兵攻契丹之秦州。下之。迴及揚城。爲德光精騎。

所圍諸將等決力死戰。德光大敗。至三年八月。契丹所部瀛州刺史。僞言納款。少帝復命杜重威等率大軍迎降。至十一月。迴及鎮州之東垣。度與番相遇。十二月六日。遣前鋒奪橋。爲番軍所敗。其月十日。杜重威等以軍降於德光。命相州節度使張彥澤率漢騎二千。先入京城。至明年正月一日。德光自將大軍至京北。百寮素服。班於野次。匍伏請罪。皆命釋之。尋降授少帝檢校太尉負義侯。令挈其族及將相近臣等。於契丹黃龍府安置。二月。德光僞降赦。改國號大遼。稱會同十年。升鎮州爲中京。以燕王趙延壽爲大丞相。中京留守三月。德光自京率衆北歸。至四月十八日。死於纒城。其年五月。宣遺制。以永康王兀欲襲其僞位。永康王者東丹王突欲之長子。兀欲自以猶子。不當嗣位。且不奉祖母之命。其諸部首領素畏述律氏之酷法。復以阿保機死於渤海國。被殺者百人。今德光沒于漢地。慮必獲罪。如前同謀。以其月二十一日。領部族歸國。述律氏拒於石橋。番地名。其衆悉降於兀欲。命送述律氏於阿保機明殿以幽之。阿保機陵寢。謂之明殿。僞改會同十年。爲天祿元年。自稱天授皇帝。

漢乾祐三年十一月。兀欲率騎數萬南寇。陷邢州之內邱縣。深州之饒陽縣。

周廣順元年正月。太祖命左千牛衛將軍朱憲往修和好。兀欲亦遣使裹骨支報命。獻良馬四匹。太祖復命尙書左丞田敏。供奉官蔣光遂。銜命往聘。至其年四月。田敏等迴。兀欲遣使實六獻。碧玉金鍍銀裹鞍轡。并馬四十四匹。其月。太祖又命左金吾將軍姚漢英。右神武將軍華光裔。往使。至其年九月。兀欲爲部下

太寧王子燕王述軌所殺。述律德光子勒所部誅太寧王述軌。述律自立。號天順皇帝。改名璟。僞稱應歷元年。

顯德元年春。太原劉崇將圖南寇。述律使番將楊衮率虜騎萬餘以助之。三月。世宗親征。與崇戰於潞州。高平縣之南原。崇軍大敗。番衆棄甲而遁。二年三月。命許州節度使王彥超等築壘於李晏口。與番兵數千騎戰於安平縣之南。敗之。

党項羌

党項羌。古析枝之地。漢西羌之別種。其地東至松州。南接葉護。南雜春桑迷桑諸羌。北連吐谷渾。處山谷間。互三千餘里。種有數姓。自爲部落。一姓之中。復分爲小部落。有細封氏、費聽氏、析利氏、頗超氏、野辭氏、房當氏、米禽氏、拓拔氏。而拓拔氏最爲強族。俗皆土著。居有棟宇。織毛罽以覆之。其人多壽。或至百五六十歲。不事生業。好爲盜竊。前世或來朝貢。自唐寶應正元之後。皆率部族內附。居慶州。號東山部落。居夏州。號平夏部落。會昌初。命三使以統之。在邵寧延州界者。命侍御史崔君會主之。在夏州者。命侍御史李鄴主之。在靈武麟勝州者。命侍御史鄭賀主之。

後唐同光二年二月。遣使朝貢。十二月。其首領簿備香來貢良馬。天成二年九月。河西羌項如連山等來朝貢。進馬四十疋。

四年四月。敕沿邊置場買馬。不許蕃部至闕下。自上御極已來。党項之衆。競赴都下賣馬。常賜食於禁廷。

醉則連袂歌其土風。凡將到馬無驚良。並云上進國家。雖約其價直以給之。然計其館給賜賚。每年不下五六十萬貫。大臣以爲耗蠹中原。無甚於此。因降敕止之。雖有是命。竟不能行。其年九月。首領折遇明等來貢方物。十月。首領來有行來朝。進馬四十四匹。上御中興殿。閱所進馬。樞密使安重誨奏曰。吐渾党項。近日相次進馬。皆給價直。對見之時。別賜繒帛。計其所費。不啻倍價。請止之。上以爲國家常苦馬不足。每差綱收市。今番言自來。何費之有。外番朝貢。中國錫賜。朝廷常事。不可以止。自此番部羊馬。不絕於路。

長興元年正月。其首領來朝貢。授萬德懷化司戈。其年十二月。以党項折家族五顛都知兵馬使折之正。爲檢校尙書右僕射。簿備家族都督。簿備撒羅。檢校工部尙書。

二年正月。首領折七移等進馳馬。其年十二月。又遣首領來獻所奪得契丹旗號並馬等。

三年正月。以西路党項部族。劫掠使臣。及外域進奉。命邠州節度使藥彥稠等。奏誅党項阿埋三族。韋悉褒勒七千。往方渠顛已來。討其叛命者。其年二月。行營邠州節度使藥彥稠等。奏誅党項阿埋三族。韋悉褒勒。彊賴埋。廝骨尾屈。悉保等七族。七百餘人。又率兵自牛兒族入白魚谷。追及背叛黨白馬慮家六族。客戶三族。獲大首領連香八薩王。都統悉邨埋摩。侍御乞埋鬼。悉逋等六人。兼黨類二千餘人。獲馬牛羊數千計。至晚師還野次。其地無水。軍士方渴。俄有風雲自東而起。是夜初更。降雪一尺。軍中以爲神助。上令告捷使史萬山宣諭軍中。所獲牛羊等物。各令士卒自取。勿得收斂。以進奉爲名。

周廣順二年六月。以府州党項泥也六族防禦使歸化將軍泥香王子又泥也。大首領拓拔山並爲歸德將軍。三年二月。慶州刺史郭彥欽奏党項野雞族掠奪商旅。請出兵討之。時彥欽黷貨嗜其利。以州北野雞族多羊馬。作法擾之。番情獷悍。屢不從順。乃誣奏之。太祖遣中使齎詔撫安。部族旣苦彥欽虐政。不時報命。遂詔邠州節度使折從阮合寧州刺史張建武兵進討之。建武勇于立功。徑趨野雞族。追擊殺數十百人。有喜王族折思族殺牛族。彼無猜貳。聞官軍討伐。竟來餉餽。官軍利其財貨。皆劫掠之。諸族乃相聚。官軍至包山負險之地。逆戰敗之。投崖谷死者甚衆。折從阮保兵而退。太祖怒彥欽勒歸私第。左遷建武爲率府率。命前解州刺史鄭元昭爲慶州刺史。以招撫之。

于闐

于闐在京師西九千九百餘里。西南帶蔥嶺。與婆羅門相接。去三千餘里。南與吐番接。西北至疎勒國二千餘里。國城之東有白玉河。西有綠玉河。次西有烏玉河。其源同出於崑岡山。去于闐西一千三百餘里。每歲至七八月小水之後。取玉於河。謂之撈玉。官取之後。方許私取。禁令甚嚴。地多蒲萄。醞而爲酒。味極醇美。其俗好事祆神。唐正觀中。其王伏闕信來朝。復遣子入宿衛。其後亦時來朝貢。

晉天福三年九月。其王李聖文遣使馬繼榮進白玉白氎犛牛尾紅鹽鬱金礪砂大鵬砂玉裝鞞轡等物。其年十月。册聖文爲大寶于闐國王。命供奉官張匡鄴爲國信使。仍授入朝使馬繼榮爲鎮國大將軍。扶

風郡開國公。食邑二千戶。副使黃門將軍國子少監張載通。試衛尉卿監使殿頭承旨。通事舍人吳順規。試將作少監。

漢乾祐元年五月。復遣使朝貢。六月。以入朝使王知鐸爲檢校司空。副使張文達。判官秦元寶。爲檢校左右僕射。監使劉行立。檢校兵部尙書。

突厥

突厥之始。前書載之備矣。自號可汗。猶古之單于。妻號司賀敦。猶古之闕氏也。子弟謂之特勒。別部領兵者。皆謂之設。其大官屈律啜。次阿婆。次頡利法。次吐乞。次俟斤。並代居其官。而無員數。父兄死。則子弟襲其位。北番之中。最爲強盛。至唐室末。爲諸番所侵。部族微弱。亦嘗來朝貢。

後唐天成二年正月。其首領張慕晉朝貢。

長興二年正月。其首領杜阿熱來朝貢。

晉天福六年七月。其首領遣使薛同海。已下一十七人來朝貢。

五代會要卷三十

吐番

吐番在長安西八千里。本漢西羌之地。其種落莫知所出。或云南涼禿髮利鹿孤之後。其子孫以禿髮爲國號。語訛謂之吐番。國人號其王爲普贊。置大論小論以統理國事。無文紀。刻木爲約。其國王與臣下一年一小盟。三年一大盟。其俗隨畜牧。不常其居。然亦有城郭。都城號邏步城。屋皆平頭。貴人處於大氈帳。謂之排盧。不知節候。以麥熟爲歲首。唐貞觀中常來朝貢。自後吞併諸番。兵力日盛。屢爲邊患。河西隴右之地悉爲所取。至大中初其國亂。朝廷復得六關之地。至唐室末又爲侵據。唐分天下爲十道。河西隴右地沃壤。人物繁庶。開元天寶中置八監牧馬三十萬。雜畜稱是其西復置安西都護府。拒長安八千里。羈縻西番三十國。軍鎮監移大小三百餘。戍守之兵皆取涼州節度。及安祿山犯關。肅宗在靈武。盡召河西戍卒。收復兩京。吐番乘虛遂取西涼。隴華人百萬陷於腥膻。開成之際。朝廷遣使還番。過涼肅瓜沙城。邑如故。華人見漢旌使齊夾道泣訴。問皇帝還念陷番生靈否。當時已經再世。雖語言小訛。而衣服未改。至今涼州漢戶猶稱上代是鄆州。戍卒每帥守關。則請命於朝廷。

梁開平二年正月遣使朝貢。二月以吐番入朝使嗚未。首領杜論悉伽杜論心爲左領軍衛將軍同正。未蘇論乞祿爲右領軍衛將軍同正。

乾化元年十一月又遣使來朝。召對於乾元殿。賜金帛等遣之。

後唐天成二年十一月遣使野利延孫等入貢并番僧四人持番書二封人莫識其字

二年正月以入朝使野利延孫等六人並爲歸德將軍其年九月又遣使朝貢以入朝使閻薛羅等三人並爲歸德司戈十二月又以入朝使薛竭薛王子撥邇爲歸德郎將首領十人並爲歸化司戈

四年九月西涼府番官撥心等來朝十月首領撥里忙布蘭邇等來朝並授歸德司戈

長興三年二月又遣使朝貢三月以朝貢使左廂首領野利閻心爲歸德大將軍右廂首領錢心爲歸化郎將軍中廂首領李讀等並爲歸德司侯重云都督對兒六突兒雞等並爲歸德司陞其年七月復遣使入朝引對於端明殿問本番牙帳去京師遠近對曰在涇州西二千里

四年十一月遣使來貢召對於內殿賜以金帛仍各賜虎皮一張

晉天福四年十月罷延族大首領聶褒郎彝磨標昌訶尤羅祇褒等率其族朝貢

周廣順二年九月河西節度使申師厚奏吐番首領折逋支等請加恩命其月勅以吐番左廂押番副使折逋支右廂崔虎心並授銀青光祿大夫檢校工部尙書陽妃谷大首領沈念船授懷化大將軍左廂大首領錢千閻篤爲歸德大將軍沒林葛于凝盧伴邇折邇窮羅並爲懷化大將軍右廂大首領鹿悉迦阿羅岳騷奴並爲歸德大將軍沈念般毗與龍文温光積並爲懷化大將軍中廂首領岳阿西安九十並爲懷化大將軍又奏自涇州安國鎮至西涼府沿路三處控扼各立州名欲補大首領爲刺史又管州界部

落大首領三十餘人各賜空名告身並從之。

高麗

高麗本扶餘之別種其國都平壤城卽漢樂浪郡之故地在京師東五千一百里東渡海至於新羅西北渡遼水至于營州南渡海至于百濟北至靺鞨東西三千一百里南北一千里其官大者號大對盧比一品總知國事三年一代若稱職者不拘年限對盧已下官總十二級置外州縣六十餘大城置僣薩一人比都督小城置道使一人比刺史其下各有僚佐分曹掌事其王以白羅爲冠白皮小帶咸以金飾其俗多淫祀事靈星可汗箕子等神國城東有大隧名曰隧神常以十月王自祭之俗好經書至于庶賤之家各于衢路造大屋謂之局堂子孫晝夜讀書習射前王姓高氏世通中國常遣使朝貢

後唐同光三年十一月遣使廣評侍郎上柱國韓申一副使春部少卿朴巖來貢方物至四年正月授韓申一朝散大夫試殿中監朴巖朝散郎試祕書郎

天成四年八月復遣廣評侍郎張翮等五十二人來朝貢銀香獅子銀鑪金裝鋸鏤雲星刀劍馬匹金銀鷹繖鞞白紵白氈頭髮人蔴香油銀鏤剪刀鉗鉞松子等

長興三年二月復遣使大相王儒來朝其年六月以權知國事王建爲特進檢校太保使持節玄菟州都督充大義軍使兼御史大夫上柱國高麗國王七月又以其妻柳氏爲河東郡夫人

清泰二年十二月遣使禮賓卿邢順等來朝貢。

三年正月以入朝使禮賓卿邢順試將作少監副使崔遠試少府監主簿其年又遣使王子太相王規等來貢方物以太相王規爲檢校尙書右僕射副使廣評侍郎崔禹試將作監其隨行節級等三十餘人並授司戈司陞等職。

晉天福三年八月清州奏高麗國宿衛質子王仁翟乞放歸鄉里從之。

四年九月復遣廣評侍郎邢順等七十二人來貢方物。

六年八月其國王王建爲開府儀同三司檢校太師使持節玄菟州都督充大義軍使高麗國王命國子博士謝攀持節就冊之。

八年復遣大子大相王申一等來。

開運元年正月以入朝使王子大相守倉部令上柱國賜紫金魚袋王申一爲檢校尙書右僕射正朝守廣評侍郎柱國丹金魚袋柳迥酬檢校禮部尙書守廣評郎中韓李康試衛尉卿守廣評郎中朴玄信試太府少卿守兵部主事韋安試將作監主簿以進奉賀登極使正朝前守廣評侍郎柱國丹金魚袋金仁逢可檢校工部尙書副使禮賓卿柱國丹金魚袋金裕可試大府卿判官兵部郎中張規可試衛尉少卿二年其國王王建卒其子武嗣位十月遣使廣評侍郎韓元珪副使前禮賓卿金廉等一十八人來朝十

一月以權知高麗國事王武爲特進檢校太保使持節玄菟州都督充大義軍使兼御史大夫高麗國王仍命光祿卿范光政太子洗馬張李凝就行册命王武者王建之子本國中大族國中推而爲主有智勇兵力日盛以兵并三韓百濟之地東夷君長最爲雄盛漢乾祐末王武死其子王昭代立

周廣順元年正月遣廣評侍郎徐逢等九十七人來朝貢二月以權知高麗國事王昭爲特進檢校太保使持節玄菟州都督充大義軍使兼御史大夫高麗國王仍命衛尉卿劉皞通事舍人顧彥浦持節册之劉皞尋卒於路顧彥浦溺海而死

二年九月復以太僕少卿王演借衛尉卿充高麗國册禮使右衛率府呂繼贇借將作少監充副使

顯德二年十月復遣使王子大相王融來貢方物又遣廣評侍郎荀質來賀登極其年十二月授其國王王昭開府儀同三司檢校太師高麗國王

五年七月命尙書水部員外郎韓彥卿尙輦奉御金彥英使於高麗因命齋帛數千匹就彼市銅以備鑄錢之用

六年正月又遣其臣王子佐丞王兢佐伊王皇甫魏光等貢名馬織成衣襖弓劍等其年八月遣使進別序孝經一卷越王新義孝經八卷皇靈孝經一卷孝經雌圖三卷別序者記孔子所生及弟子從學之事越王新義者以越王爲問目以疏注文之是非皇靈者止說延年辟災之事及志符文乃道書也雌圖者止說月之環暈星之彗孛災異之應乃讖緯之書也其年十一月遣使貢銅五萬斤紫白水精各

二千顆

渤海

渤海靺鞨本高麗種。唐總章中，高宗平高麗，徙其人散居中國，置州縣于遼外，就平壤城，置安東都護府以統之。至萬歲，通天中，契丹李榮反攻，陷營府，有高麗別種大舍利乞仲象。大姓舍利官乞仲象名也。與靺鞨反人乞四比羽走保遼東，分王高麗故地，則天封乞四比羽許國公，大舍利乞仲象震國公，乞四比羽不受命，則天命將軍李楷固臨陳斬之，時乞仲象已死，其子大祚榮繼立，併有比羽之衆，勝兵丁戶四十餘萬，保據挹婁故地，至聖歷中，稱臣朝貢，中宗命侍御史張行岌就往宣慰，號其都爲忽汗州，以祚榮爲忽汗州都督，封渤海郡王，國自稱渤海，其俗呼其王爲可毒失，對面呼聖王，賤表呼基下，父曰老王，母曰太妃，妻曰貴妃，長子曰副王，諸子曰王子，代以大氏爲酋，終唐室朝貢不絕。

梁開平元年五月，其王大諲譔遣王子大昭順來貢方物，至二年正月，又遣殿中少令崔禮光來朝。

三年三月，遣其相大誠諤來朝，兼貢女口。

乾化二年五月，又遣王子大光贊來朝，貢方物，太祖厚有錫賜。

後唐同光二年正月，遣王子大禹謨來朝，五月，又遣王子大元讓來朝，莊宗賜金綵以遣之，八月，又遣姪學堂親衛大元謙試國子監丞。

三年二月。又遣使裴璆貢方物。進細女口。五月。以入朝使政堂省守和部少卿賜紫金魚袋裴璆。爲右贊善大夫。

天成元年四月。遣使大陳林等一百十六人來朝貢。進男口女口各三人。并人參昆布白附子等。其年七月。遣使大照佐等六人朝貢。先是契丹大首領邪律阿保機。兵力雄盛。東北諸番多臣屬之。以渤海國土地相接。常有吞併之志。是歲率諸番部落。攻渤海扶餘城。下之。改扶餘城爲東丹府。命其子突欲留兵鎮之。未幾。阿保機死。渤海王命其弟率兵攻扶餘城。不能克。保衆而退。

四年五月。又遣高正詞入朝貢方物。七月。以正詞爲太子洗馬。

長興二年十二月。遣使成文角來朝。

三年正月。又遣使來朝貢。

四年七月。以先入朝使成文角爲朝散大夫。右神武軍長史奏事。右錄事試大理評事高保。又爲朝散郎。右驍衛長史。並賜金紫。

清泰二年十二月。遣使列周道等入朝貢方物。

三年二月。以入朝使南海府都督列周道爲檢校工部尙書。政堂省工部卿烏濟顯。試光祿卿。周顯德元年七月。渤海國崔烏斯多等三十人歸化。

新羅

新羅。弁韓之苗裔。其國在漢樂浪郡之地。南東俱限大海。西接百濟。南隣高麗。東西千里。南北二千里。有城邑村落。其王所居曰金城。周七八里。衛兵三千人。文武官凡十七等。風俗刑法。與高麗略同。而朝服尙白。人多金樸兩姓。俗重元日相慶賀。以是日拜日月之神。婦人以髮繞頭。用綵及珠爲飾。髮甚鬢美。其王金眞。唐武德四年。封樂浪郡王。龍朔三年。又以國爲雞林州。授其王雞林州都督。世以金氏爲酋長。朝貢不絕。

後唐同光元年十一月。其王金朴英。遣倉部侍郎金樂。錄事參軍金幼卿。來朝貢。

二年六月。又遣使朝散大夫倉部侍郎。賜紫金岳來朝貢。授金岳朝議大夫。試衛尉卿。

天成二年二月。遣使張芬等來朝。其年三月。以新羅國權知康州事王逢規。爲懷化大將軍。新羅國前登州都督府長史張希巖。新羅金州知後官本國金州司馬李彥謨。並檢校右散騎常侍。其月。又以入朝使中散大夫兵部侍郎兼賜紫金魚袋張芬。爲檢校工部尙書。副使兵部郎中朴述洪。兼御史中丞。判官倉部員外郎李忠式。兼御史。其年四月。新羅國康州遣使林彥來朝貢。召對於中興殿。賜物有差。

四年二月。青州奏於登州岸獲新羅船一隻。進其寶貨。

長興二年四月。權知國事金溥。遣使金肅。來貢方物。

清泰二年二月。以入朝使執事侍郎金肅。爲檢校工部尙書副使司賓大卿李儒。試將作少監。

黑水靺鞨

靺鞨。蓋肅慎之地。後魏爲勿吉。在京師東北六千餘里。東至於海。西接突厥。南界高麗。北鄰室韋。其國凡爲數十部。各有酋帥。而黑水靺鞨。最處北方。尤稱勁健。俗皆編髮。性凶悍。無憂戚。貴壯而賤老。俗無文字。兵器有角弓楛矢。唐開元十年三月。安東郡都督薛泰。請於黑水靺鞨內。置黑水郡。以最大部落爲黑水府。以其首領爲都督。仍置黑水府長史一員。部落監領之。

後唐同光二年九月。遣使兀兒來朝。以兀兒爲懷化中郎將。遣還番。

三年五月。黑水胡獨鹿。遣使朝貢。

天成四年八月。遣使骨至來朝。兼貢方物。以骨至爲歸德司戈。遣還番。

長興元年二月。其首領兀兒。復遣使朝貢。

二年五月。青州奏黑水兀兒部至登州賣馬。

三年二月。青州奏黑水桃李花狀申父胡獨鹿卒。所有敕賜朱記。未敢行使。

南詔蠻

南詔蠻。本烏蠻之別種。在漢永昌之東。姚州之西。蠻俗謂王曰詔。其先渠帥有六。故號六詔。各有君長。不

相統攝。唐時中亦時來朝貢。

後唐同光三年閏十二月。魏王繼岌奏遣使齋書。招諭南詔蠻。時初平蜀川。乃募曾使南詔者。有秦州副

僖宗在蜀。命嗣王龜年使雲南。謫季父為副使。謫為判官。時不到阻。薜城祇達善。圍迴約。為甥舅。許降。安化公主雲南使來迎。公主次驛。報收復長安。黃巢東走。乃託以他歲而止。

天成元年十月。供奉官李彥楷。高品李光裕。雲南使迴。山後兩林百蠻都鬼主右武衛大將軍李卑晚。差

大鬼主傅能阿花等來朝貢。明宗御文明殿引對。百官稱賀。時李卑晚為寧遠將軍。大渡河南山前邛州

六姓都鬼主懷安郡王勿定標莎。為定遠將軍。

二年七月。以左金吾衛將軍烏昭遠。為左衛上將軍。入蠻國信使。其年九月。西川奏據黎州狀。申雲南使

趙和。於大渡河南起舍一間。留信物十五籠。并雜牋詩一卷。遞至闕下。初郭崇韜平蜀之後。得王衍昔獲

被止於界上。唯國信與蠻俘得往。續有轉牒。稱都督爽大和長國宰相布變等。上大唐皇帝。舅奏疏一封。

自鶴拓歷至幾美。白崖爽等。又入弄棟。演習白鸚鵡。邵膳裔爽等。又入平夷。新安遠標莎。差人轉送黎

州。其紙厚硬如皮。筆力逾健。有詔體。後有督爽。陀曾忍爽。王寶督爽。彌勒忍爽。董德義督爽。長垣忍爽。楊

布變所署。有彩牋一軸。轉韻詩一章。章三韻。其十聯有類。擊筑詞。頗有思本朝。媿親之義。語亦不遜。其籠

中。即返其國信。舊封猶存。復命左

衛上將軍烏昭遠往。皆不能去。

祥柯蠻

祥柯蠻。其地北去兗州一百五十里。東至辰州二千四百里。南至交州一千五百里。西至昆明九百里。無城郭。散居村落。多霖雨。稻皆再熟。無徭役。唯征戰之時。乃相屯聚。刻木為契。其法劫盜者三倍還贖。殺人

者出牛馬三十頭。乃得贖死。首領姓謝氏。唐室頻遣使朝貢。後唐天成二年八月。牂牁清州八郡刺史宋朝化等一百五十人來朝貢。進草豆穀二萬顆。硃砂五百兩。黃蠟二百斤。各賜官誥金帛遣之。

昆明國

昆明部落在黔州西南三千里。山路險阻。住止高欄。亦有羊馬。其俗椎髻跣足。酋長披虎皮。下者披氍毹。後唐天成二年八月。昆明大鬼主羅殿王普露靜王九部落各差使等。隨牂牁來朝貢。

占城國

占城國在中國西南。其地東西七百里。南北三千里。東暨海。西暨雲南。南真暨臘國。北暨驩州界。東北至兩浙。海行一月程。其衣服制度。大略與大食國同。所乘皆象馬。粒食稻米。肉食水兕山羊之類。獸之奇者有犀牛。鳥之珍者有孔雀。前世多不與中國通。

周顯德五年九月。其國王因德漫遣其臣甫阿散等來貢方物。中有灑衣薔薇水一十五瓶。言出自西域。凡水之需衣香而不斲。又貢猛火油八十四琉璃瓶。引對於內殿。賜以冠帶衣服等。其表文以貝多葉。檢以香木函。其年十一月入朝使甫阿散金婆叵羅辭。各賜繒帛有差。仍命齎金銀器一千兩。繒綵一千匹。細甲名馬銀鞍勒等。就賜其國王。

雜錄

後唐天成元年六月十日。御史臺奏。伏觀今月三日。入閣班退後。方引對朝貢番使。竊觀近制。頗失常儀。且月華門是宰相兩省近侍官常朝來往之所。外國番國朝見。不合出此門。而又殿廷班序。先後退北者。列其百辟。示彼四夷。俾觀多士之羽儀。以顯九重之嚴重。豈可衆官退後。番客方來。合自正門。直趨丹陛。此是向來事例。今辰忽有更張。竊以方屬中興。宜循舊典。伏乞宣付中書門下。重令參詳。永爲定制。奉敕。宜令太常禮院檢舊例申奏者。右太常禮院奏。臣謹按開元禮。以賓禮待番客。有六一番國王來朝。二戒番王見日。三番王奉見。四受番使表及幣。五宴番國王。六讌番國使。從開元定禮之後。本朝故事。對諸番客。又並於內殿引對。其殿名曰參殿。事在禮賓使客省使。不下外諸司。見今施行不一。近制惟回鶻番使。則正殿引對。況回鶻見居甘州。其地尤屬河西道涼州所管。每遣使進表幣。待以賓禮。皇帝御正殿。列百辟鋪陳盛儀。酌禮沿情。事恐太重。伏請今後準諸番客例。祇於內殿引對。不臨正朝。兼免乖越。又符故事。謹且詳酌如前。奉勅。四夷來王。歷代故事。前後各因強弱。撫制互有典儀。大番頒示於威容。則於正衙引對。小番但推其恩信。乃於內殿撫懷。憲府奏論。禮院詳酌。皆徵故事。咸有明文。正衙威容。未可全廢。內殿恩澤。且宜常行。若遇大番入朝。卽准舊儀。於正殿鋪陳立仗。百官排班。於正門引入對見。

四年二月。勅沿邊置場買馬。不許番部至闕下。

周廣順三年三月詔禁沿邊州城市兵仗於諸番部。